

廣通頗有人心。日本素無喪禮。而廣通獨行三年喪。每事必欲效唐與朝鮮。雖居日本。非日本人也。遂以臣事語廣通。通時相候問。而自以與清正佐渡守等有隙。絕不與佐渡守家知。又嘗從我國士人之在俘虜者及臣兄弟。求書六經大文。潛以銀錢助臣等羈旅之費。以資歸路。又嘗得我五禮儀書。郡學釋奠儀目於其但馬私邑。督立孔子廟。又製我國祭服祭冠。間日率其下習禮儀。至今年二月初九日。佐渡者自其私邑應家康命來伏見。大丘被虜人金景行稍解倭諺。臣等請其人。以倭諺書贈佐渡曰。十口空養。於爾無所益。四年孤囚。於我不如死。倘不欲殺。則願許出門。不許出門。則生無所欲云。則倭僧慶安力勸佐渡曰。思親懷土。彼此一樣。倘許出門。或有歸便。佐渡即將臣一家。出其門外。臣收合我國士人之曾結約束者。引出蒿卒在倭家者。前後所得銀錢。潛買一舡及舡糧。異國之人。獨經虎穴千里。恐有意外不測之患。遂往見舜首座及廣通。願借力出疆。則廣通求寺澤志摩守書。以備關市之譏察。且許蒿師一人。以教水路。至

對馬。乃許其還。臣遂率臣家屬十人被虜士人及蒿卒其妻女。並三十八人同船。四月初五日發倭京。船卒齟齬。風勢又不利。五月十九日。始到釜山。被虜欲出來者。例以馬島爲鬼門限。臣即爲一檄付歸倭。以告馬島之別阻塘。無以馬島爲疑阻也。○庚子八月初一日。承政院啓辭。小臣發倭京日。倭僧舜首座招大丘被虜人金景行。屬臣耳密語。昨見筑前中納言金吾。則內府將以明年再舉犯朝鮮。若然則吾亦當行云。秀吉生時。家康力主寢兵。今有是議者。必是內府與備前肥前等有隙。置之平地。則恐其生變。故欲送此輩於朝鮮。以銷其兵勢。今年之內。肥前之和事不成。則根本未定。朝鮮可無患。若成則動兵無疑。當在明年間。朝鮮不可不預爲之備。子歸須不忘今日之言。朝鮮無辜被秀吉兵禍。吾未嘗不氣塞。故今相告報耳。又有醫師理安。自金吾處來言。明年再舉。內府以其長子三河守爲將云。臣不勝駭惑。停行數日。聞見於諸處。則或曰。今年正月中。內府責五萬石以上倭之侍子。送質于關東。諸倭或送養子。或送親弟。惟清正越

中守等責其親母親子。內府又以正朝將朝倭皇帝於王京。清正等領兵甲。先上伏見。欲爲迎候。內府聞之。稱病不上來。倭人皆笑。內府爲怯。若州小將勝俊。方侍秀吉。本府在王京。聞家康將至。費黃金四十餘錠。以備饋。聞其稱病。甚懷失望云。清正等所欲。不在朝鮮。而家康未嘗一日忘此輩。日本數百年。四分五裂。關東爲一國。奧州爲一國。中國爲一國。四國爲一國。九州爲一國。信長既立。暫時統合。其末年。還復離析。秀吉既立。亦暫統合。今其身已死。其勢又將離析。則後必有如秀吉者。然後朝鮮再受兵禍矣。然世間事。朝更夕變。或終始堅凝。亦未可知。家康擁廣土衆民。據兩都形勢。以號令諸倭。心服者雖少。強從者亦多。姑爲不可犯者以待之。乃貴國之得計也。嵯峨院倭與一之辭輝元之謀主僧安國寺者。例聞其國政。其左右皆我國之人。而皆不忘思漢之心。歷路密招問之。則皆曰。數十年來。保無此患。倭輩方爭棧豆。所憂者蕭牆。何暇他國乎云云。前後所聞不同。故並爲上啓。○平調信者。義智之家老也。倭人稱楊川下野守。馬島之事。

皆在其掌握。義智則守成而已。臣等船過馬島時。義智方向倭京。調信爲義智居守。差一小船來問曰。向那邊去。臣等不得已以實告之。調信即送船糧菜把。令舌人再三請見。臣等不得已下見之。調信曲爲恭謹。溫言慎辭。令舌人傳言曰。秀吉之生於日本。天時也。上國之酷受兵禍。亦天時也。而上國每以壬辰之事。歸咎於此島。此島每欲自明。而前後差人。並不見還。故無路得達也。此島居二國之間。秀吉之侵犯。上國此島何能阻撻乎。故兵未動。而預告其期。欲上國預爲之備也。及大眾席卷而過。則此島不得不強從也。人事有翻覆。早晚日本衰弱。而上國富強。大軍渡海東征。則此島亦不得不強從也。二百年來。竊發倭船。或自大海犯湖南。而未嘗一至嶺徼者。皆此島爲之捍蔽也。今後上國一切不許通路。則此島雖不敢犯。上國他倭之過此島者。此島何辭以拒之。難從之請。皆秀吉爲之。今不復有是請矣。賜米亦不須更賜也。使臣亦不須高官。釜山太守差人奉禮曹公文來。此島中被虜之人。先可付回也云云。臣等退

問我國被虜人。則自壬辰交兵以來。諸倭之過對馬者。例徵舍館與薪菜。雖或不求之。未嘗不備給。蕭然煩費。極生蒼艾之心。撤兵三年。稍爲蘇息。故千方百計。必欲求通路而後已。每於我國人過海時。例爲接待。冀得上達云。臣等又謂調臣曰。俺等四年異國。本國之事。了無聞知。但聞 天兵充滿八道。調信曰。此島亦聞之。禮曹書啓。未可付一行否。臣等答曰。此島若欲爲書啓。專船送人可也。俺等不當持去。調信曰。極是極是云矣。臣聞火藥硫黃。非我國所產。行過馬島。此所餘船資。買硫黃三十餘斤。左水使李雲龍處。交付上來。○凡所謂將倭者。無一人稍解文字。其人散而自鬪。足以快一時之勝。而兵家機變。則若或與聞。茲乃俘人所嘗聞見。足以破萬古愚氓潰卒之惑。其宮室務極高爽明麗。而不事堅緻。問之則曰。兵禍數起。不保朝夕。故如是云。作茶室闢小穴。僅容出入。上客至。開穴迎入。飲茶其中。蓋其本心。非但欲以撲素示人。而啣盃立談。釁隙突起。故屏絕羣從。以防不虞云。其男子必佩刀劍。既帶刀劍。所治者唯戎事力役而已。惟

僧人不帶刀劍。或學醫術。或業商販。或事推卜。或供將倭家茶室之灑掃。此輩皆有妻子。飲酒食肉。雜處市肆中。或教授生徒。或尊誦梵唄。或誦法孔子。或放浪山野。說禍福行乞。此輩皆無妻子。不食肉。別處林藪間。倭男子削髮。十居四五。厭戎事力役。欲專身遠害者也。倭之爲將倭者。其官或曰寺。或曰院。或曰法印。不爲將倭者。其官始曰藏師。次曰首座。次曰東堂。次曰西堂。次曰和尚。次曰老長而極焉。其僧之治佛經者。或主南無阿彌陀佛。或主妙法蓮花經。各寺爭難。有同仇敵。治聖經者。或主孔安國鄭玄箋註。或主朱晦庵訓解。分門往復。各立黨與。其風俗好爭如此。有高照院者。大佛寺梵王也。其皇帝之叔父也。食邑一萬石。統攝六十六州諸山緇髡。歲正月畢來獻禮。有兌老長者。諂事秀吉。得實封二萬石。間有醫僧之稍解文字者。時事將倭隨到我國者。比比有之。而諸僧以僧論。僧官皆自倭皇給牒其風俗酷信鬼神。事神如事父母。父母死日。或不齋素。以神人之忌。初禁魚肉。齊明盛服。躡門擲錢者。填咽街路。神舍宏侈。金碧照耀。有天照皇大

神宮者。其始祖女神也。有熊野山權現守神者。徐福之神也。愛宕山權現守神者。新羅人日羅之神也。又有春日大明神八幡大菩薩小郎房等神。其麗不億。其約盟禁戒。必引此等神以爲誓。間有燃臂斷筋而不忍破盟者。必曰畏天道畏雷霆云。○倭奴之性。好大喜功。遠國舟楫之相通。常以爲盛事。商賈船舳之來者。必指爲使臣。臣在倭京時。倭賊盛傳南蠻使臣來到。國內喧騰。以爲美談。聞諸我國人。則商賈十餘。持白鸚鵡一隻來到。云。遠國來者。卒倭間或賊害。則恐絕其來路。必夷其三族。前年八月。福建商船向薩摩州。水邊倭卒預知其期。具船載兵甲。奪其寶貨。只留其人。其人等來訴薩摩州。義弘告家康。生致奪貨者於倭京。盡加轆掛。取其貨還其人。天竺等國。距倭奴雖遠。而倭奴往來不絕。福建商船及南蠻琉球呂宋等商船。則義弘及龍藏寺句管。我國行船。則正成及義智句管。驢騾象孔雀鸚鵡之來。歲歲不絕。而家康等例以金銀槍劍重償之。以無益換有益。故彼亦樂來倭市。○程道。自倭京至伏見。陸行三里。伏見至大阪。水

陸皆十里。大坂至攝津州之兵庫。水行十里。左右皆陸。兵庫至播磨之寶津二十里。寶津至備前之牛窓十里。牛窓至備後之戶望二十三里。以上左右皆陸。戶望至周防州之上關三十五里。海口極狹。潮水迅疾。故謂之關上。關上至長門州之下關三十五里。海門相對。廣狹如我國錦江口。制船極難。下關至間島二十五里。居下關博多一岐右邊陸路已盡。海接嶺南之左道云。而浩無津嶼。自間島直渡一岐。則四十八里。渡于肥前之唐津。則二十一里。唐津至名瀨屋三里。名瀨屋至一岐十五里。一岐至對馬之芳津四十八里。芳津至豐碕三十五里。豐碕至釜山三十八里。東南北風皆可舉帆。自豐碕望見釜山金海熊川昌原巨濟等處。歷歷可數。機張以北則海水浩濶。風勢稍不利。則必有失船之患。閑山以西則水路遙遠。不可容易過涉云矣。倭一里我國數則三千三百里八月二十七日。余捕名虎。己亥秋冬間。兩南之界。惡虎猝起。晝夜咬人。不知其數。如南原之宿星嶺。求禮之石柱。順天之松峙。長水水分院。咸陽八

良等處虎患滋甚。不饒多人日害五六。竟致人物不通。而山底列邑累月被害者。幾至二百餘人。自今夏以後。山谷之人結寨張網。聚宿一家。虎亦凶神。破網毀柵。闖入作害。一虎橫行故在南原則無雲峯害本村連咬兩人。監司李弘老移關列邑。使之措捕。而列邑無如之何。余以可捕之意告府使。使徵於前防禦捕虎之弊。不敢出計。余患之。私設弓弩於里門。以爲保家之計。是夜三更。惡虎闖入。遂中弩顛倒於庭除而走。誘虎入弓弩翌日余領奴僕追蹤所之。虎伏於家南山藪。余終日進退侵躬。虎乃突入殺害一僕。即斃。余納于防禦。防禦不敢隱獻方伯。自後虎患永絕。峴途無事。

大東野乘卷之二十八終

大東野乘卷之二十九

亂中雜錄四

趙慶男撰

庚子下

巡察使爲勸以義氣。出以米粟。以補軍餉。以濟大事事。目今頑醜未殲。國家皇師遽班。邦域無藩籬之限。門庭有朝夕之懼。臣民之生死未定。國家之存亡未決。倘或天心不悔。楚氛復惡。則其將扶老携幼。駢首於兇鋒之下耶。抑可爲負固守儉。以圖自強之勢耶。自有賊變以後。有牛馬者。或馱或騎。遠走奔避之。猶恐不及。有快船者。卷而載之。窮島遠嶼。之以爲樂地。無復有聚軍作五。抗拒兇鋒之爲得計。吁亦惑矣。試以丁酉事言之。以陸則深山窮谷。搜殺無遺。以海則風濤駭浪。賊逼之。其顛仆道路。爲魚爲肉者。不知其幾萬人也。以此觀之。則無寧據北山之上。蓄糧器之資。無事則鍊藝休養。有變則以逸待勞。作保障於一隅。爲根柢於邦國。不亦順且快

乎。當職不才承命來接本道。物力之凋敗。已到十分。人心之難危。倍於前昔。不量非人。妄銳圖報之志。尋常對語。慨有奮發之懷。而無兵可教。無食可依。志大才疎。着手何處。顧惟笠岩山城。形勝第一。浮於百二。往在中亂。修城儲峙。將欲固守。而臨亂蒼黃。又無主者。因以潰散。至今士子言及咄咄。因其舊而繕修。就於斯而操鍊。一以爲緩急依歸之地。一以爲左右策應之便。庶乎其可矣。茲以募集緇流若干。營建房室。修毀葺破。已有月于茲。稍待粗完。當職稱爲本營領率管下。入接恒處。且有計矣。所患振廩同食之餘。公奴匱馬。按穗供軍之役。私蓄盡矣。常稅不給於國用。窠合盡歸於舟師。雖有斯城。無兵則不可以爲城。雖有斯兵。無食則不可以爲兵。言念及此。如墜深井。壬辰以來。本道士子之勞心勞力於王事者。勤且苦矣。或糾合義旅。遮截方張之賊。或募集財帛。供給行在之需。以至男負女戴。飛藟輓粟。相望於道路。俾無乏軍興之患者。其終始士子之功。爲如何哉。式至今日。一道之稍可以爲恃者。惟在於此城。而城守之本。不出于

足食。則却將向來勤苦。畢竟致力於此舉者。其不在於吾黨士子耶。世人之徒積而不知能散者。或遇一庸錫。稱說慈悲。則傾困倒廩。猶且不辭。當職之人乞求。既與庸錫有間。而餉軍之資。又非慈悲浮誕之歸。則雖有穀而迷道不悟者。亦且欣然從之。況於識道理之士子。吾不必多告焉。但以瘡殘之餘。繼有賦役之煩。一年之畊。無半歲之蓄。十口之家。乏數月之糧。嗷嗷赤子。若在水火之中。不忍以科外之歛。重剜心頭之肉。幸賴列邑諸賢使君。須與境內一二前朝官若生員進士儒生之有計慮者。思所以得粟便宜之策。畧依義穀之例。多者以斛。小者以斗。雖至升合之微。從其貧富。量力募聚。以補萬一城守之餉。而土壤足以成大。細流可以就深。他日湖南根本之計。將自今士子之力始矣。豈不盛歟。子敬指困。無使專美於往古。車達運粟。亦將並稱於來今。凡我同志。盍各勉旃。

九月。經理萬世德。監軍杜潛。領大軍俱回天朝。○天兵撤還之後。逃留本國者。其數甚多。天朝差官絡繹推刷。逃兵等招集徒黨。綁拿委官李承

龍葉靖國等。歐打刃傷。破開獄門。奪取在監逃兵十五名。馳出興化門外。屯結作陣。本國發兵。揀捕。咨報經理及遼東等衙門。差護軍朴廷亮。管押解送。其後落後者。前後數百餘名。節次拿解于遼東及鎮江衙門。○尹繼先。遼川夢游錄。萬曆庚子之仲春。坡潭子鎖直西清。殆有日矣。平明銀臺承命召侍從臣五人。授封書。暗行于諸道。坡潭子亦忝其中。聚宿漢濱。拆書視之。所受道乃湖西也。歷行列邑。因達于忠州。客裡光陰。忽漫三月。東風吹暖。澌水清蕩。叢骨齊白。芳草又青。九載之間。戰場已古。野鼠山猩。見日而潛伏。飢鳥嚇鳶。向人而譟呼。羸驂倦策。默想當時。良家之選。大閱之兵。或因金華之自薦。或被石壕之催點。腰金負羽。衽革攬金。藏利器而不戰。憤主將之無策。束手迎敵。延頸而受刃。齎心而飲恨。浪死之魂。爲沙虫。爲猿鶴者。不知其幾千萬人。憤氣上結。陣雲昏黑。冤聲下逝。大川嗚咽。傷心慘目。有如是耶。因悲吟慷慨。作詩題三篇。其絕句曰。戰場芳草幾回新。無限香閨夢裡身。風雨過來寒食節。鬪饑苔碧又殘春。其律曰。烏鳶飛

盡渚禽栖。落日沙場路欲迷。憶得當時空脉脉。忍看芳草又萋萋。鋏衣填水琴灘咽。朽骨撐郊月岳低。誰使將軍名譽早。悔教車馬浪征西。其詩曰。東竹嶺南鳥嶺中。原獨據青丘勝。誰教雲鳥陣平郊。聞道將軍夜有令。背水無功束萬手。淮陰誤人千載後。不知鑿輿幸巴蜀。無語溪邊骨已朽。骨已朽不足惜。但恨吾君費衣食。憑河未售匹夫勇。堪笑人稱萬人敵。復命未幾月。出宰花山。官閑牒疎。披覽遺稿。邊城月出。畫閣鈴噤。清夜未央。寄枕思想。恍惚之間。有一大蝴蝶。栩栩然導引而去。越驀山川。奄至一處。雲烟帶慘。石溪瀉怨。飛走定栖。舉目無人。彷徨獨步。倚樹沈吟。俄而疾風號怒。殺氣漫野。乾坤如漆。不卞咫尺。唯見一隊燈炬。自遠而至。萬夫喧嘩。漸邇而聞。坡潭子凝精佇立。毛髮盡竦。急避於林藪之中。覘其所爲。追逐叫號。僅卞其形。或無頭者。或無右臂者。左臂者。或別左足者。右足者。或腰存而無脚者。或脚存而無腰者。或漲腹而蹣跚者。蓋溺水也。披髮滿面。腥血相射。四肢酷慘。不忍見。叫天一聲。寤擗痛哭。山岳動搖。流水亦住。既而

雲散月高。萬籟寂然。白露爲霜。蒹葭蒼蒼。寒庚寥聞。廣野如鍊。諸鬼拭淚而言曰。天崩地坼。此冤無已。月白風清。如此良夜。何可做一場語。以永今夕。齊聲而歌曰。生既不用。死且何爲。生我者父母也。死我者誰。休養恩深。公事家急。大丈夫有一死。固不足惜。歎將軍之易言兮。胡至此極。歌竟。衆鬼接肘而坐。相與語曰。高堂白髮。甘旨誰供。小閨紅顏。怨淚空多。將信將疑。既見鞍馬之還。靡室靡家。只煩紙錢之招。言念及此。能不鬱悒。中有一鬼。微哂曰。何用屑屑也。此間無乃有世間客。竊聽耶。坡潭子料其已知。趨謁翼如。齊起而長揖曰。豈非伊昔過此者也。其時留贈。吾輩謹領之矣。其詩與律。深得諷刺。而絕句淒切。使人不能自讀。其所謂泣鬼神者也。今夕何夕。幸見君子。往事如雲。陳不可悉。其中有一二可言者。寄與吾子。以傳世上。不勝幸甚。乃自舒曰。將者三軍之司命。兵者一人之制用。苟或非賢。必矣債事。中原州忠形勝。實爲南紀。草帖乃天設之稱雄。竹嶺是地利之足恃。一夫當關。萬夫莫開。難於蜀道。百人守險。千人不過。危若井陘。刊木

作柵。裂石爲車。則北軍焉能飛渡。南風不吹。死聲以逸待勞。將士高枕。爲主制客。勝敗如局。惜乎申公。計不出此。挾其嚴威。復於自用。金從事之請。豈無據乎。李巡邊之言。良有理也。不入于耳。敢決於臆。蓋其言曰。離舟之賊。難步如鵝鴨。倍道之敵。無策若犬豕。平郊大野。可以撲滅於一麾。高山峻嶺。焉用把截於二路。遂退陣於彈琴臺上。遣哨探于龍湫水邊。三令擊鼓。五衛含枚。無故驚軍者。斬。孫子之制法。置之死地後生。韓信之出奇。膠柱鼓瑟。守株待兔。孝元之誅。安敏之刎。本由此矣。健兒爲血。壯士爲魚。又何慘哉。尤可笑者。凝霜大劍。耀日長槍。指揮而閃爍。踴躍而叫怒。乃敢臨戰。易陣。鳴金偃旗。堂堂林林之形。雲擾鳥散。赳赳洸洸之士。狼顧鼠拱。遂使超關挾舟之勇。蹶將角逐之力。竟爲腥膻。當時之事。尙忍言哉。有善戰之將。無善戰之卒。奚但吾屬可斬。以不世之才。建不世之功。吾於此誅何言。訖愀然。涕淚如雨。既而累累然。一丈夫羞色遍顏。俛首低面。趨起其足。囁嚅其口。作揖告之曰。孤人之子。寡人之妻。怨叢于身。余雖有罪。今日之

言。烏得不卞。僕系將種。系出侯門。氣纔食牛。性好馳馬。味三世之戎。學萬人之敵。一枝攀桂。限欠號榜之魁。百步穿楊。實學猿臂之善。謬見知於明主。濫蒙恩於邊帥。當北胡蠢茲之時。作西關屹然之城。雷掃一劍。血盡肝腦。雷勤三軍。鼓盡巢穴。江東懼張遼之名。兒不能啼。塞北伏李牧之威。馬不敢前。功微報重。位滿志高。騁乎淄澠之間。金帶在腰。出入承明之廬。玉音嘉汝。邊塵一驚。烽火三月。及承推轂之命。即決裹革之志。榻前之懇懇。感動天聰。閫外之將將。悉委余躬。虜在目中。兵運掌上。初期袒臂而撻甲。不悟開門而引賊。自用則小。忘古人之訓。輕敵必敗。同馬服之子。豈人謀之不臧。抑天意之莫佑。魚麗未編。蠱毒先吹。勢旣據北山者勝。地形雖便。人競蹈東海而死。大事已去。嗚呼曷歸。余獨何爲。遂將八尺之軀。忍投萬丈之流。驚濤駭浪。洶湧澎湃。而難洗此羞。清灘急湍。悲咽怨呼。而爭訴余懷。時或雲沈溪口。月印潭心。魂踽踽而靡依。影熒熒而獨吊。光陰倏忽。鬱抑未開。幸逢吾君。得敷心腹。噫項羽以拔山之力。蓋世之氣。百

戰百勝。而竟敗於烏江。諸葛抱臥龍之才。扶漢之忠。五出五還。而無效於祈山。天實爲之。人曷故爾。誰怨誰咎。彼蒼悠悠。悲歌流涕。不能自抑。有頃旁有一人。揚眉睜眼。顧謂申公曰。甌已破矣。事旣往矣。成敗有數。是非已定。更何足縷縷。今夜有若諸君且至。適值方外人來。在這裡迎之上坐。請觀吾輩之樂可乎。坐未畢。車馬駢闐之聲。四面雲集。或張旌擁旗。劍戟森森。或佩符垂印。衣冠草草。呵前導後。奄至臺下。白面書生。紅顏武夫。逡巡揖讓。升降坐席。忽焉檣櫓簇鞦。伊軋川路。雲航飽風。舳舻千里。遂繫纜于蘆洲。有大將軍。擁黃帕而下。衆賓齊起迎之。將軍乃先據第一座。即右也。左座之首。高僉知命敬也。次崔兵使也。次金原州也。次任南原也。次宋東萊也。次金淮陽也。次金從事也。次金倡義也。次趙提督也。右座之次。黃兵使也。次李兵使也。次金晉州也。次劉水使也。次申判尹也。次李水使也。次李僉使也。次鄭萬戶也。南行之座。有曰沈監司。曰鄭同知。曰申兵使。曰尹判事。曰朴校理。曰李佐郎。曰高臨陂。曰高正字。下座僧將也。金從事告諸左

右曰。有俗士在此。可邀以致之。僉曰諾。然後坡潭子亦占末席。坐既定。金盤綺餅。羅列左右。哀絲豪竹。雜沓上下。樂未央。將軍呼鄭萬戶者曰。爾其堆牛殺馬。投膠飲流。與衆樂樂。乃援桴鼓之。聲動天地。諸鬼趨蹌雀躍。嗥呼使氣。第一座高僉知進曰。今日之樂。樂則樂矣。嘉賓在座。盛宴難再。盍退諸軍。各言其志。將軍即令撞鉦而麾之。三星未傾。玉兔當空。群動收聲。樹影縈射。令衛士酌金荷葉盃。巡以數三。春生肌上。和氣藹然。左則把筆吟詩。右則彈琴作樂。不平之鳴。自下以上。高正字進曰。不離膝下。叨陪陣中。奉甘旨於昕夕。勤定省於晨昏。將士不利。翁兒同死。丕寧之奴。斷一臂而難救。卞壺之妻。哭二子之何慙。骸骨相撐。魂魄共游。遂吟曰。地下三綱重。人間萬事虛。尙堪隨杖屨。行色問何如。高臨陂又進曰。以羽林之孤兒。抱終天之極痛。恐犬子於虎父。忘隼翼之鷄披。泣血枕戈。刻骨難報。舍生取義之徒。如霰斯集。關興張苞之捷。指日可待。竟投肉於餓口。未遂願於瞑目。遂吟曰。風雨年年過。沙場骨亦苔。平生報仇志。一寸未成灰。李佐郎

又進曰。業承父兄之箕裘。口誦聖賢之糟粕。既乏經綸之才。難籌廟堂。又劣金革之勇。不脫豺虎。一封之書寄妻。丈夫可笑。二枚之橘投兒。冤鬼足憐。悲慘之情。曷其有極。遂吟曰。身佐青油幕。胡窺細柳營。雲龍忽顛倒。豺虎已縱橫。劔碧萇弘血。花紅杜宇聲。無人收白骨。芳草遍郊生。朴校理又進曰。年纔十八。名冠三千。金馬玉堂。一蹴翱翔。御爐青烟。三接從容。榮寵旣濫。殃禍且至。誰知暫辭於龍墀。奄致全沒於虎穴。走馬之才。腐儒固拙。活人之命。皇天何恃。家鄉杳杳。形影悽悽。遂吟曰。白面人中少。紅蓮幕裏開。聲華雖籍甚。天命已衰哉。路遠魂何托。年深骨亦摧。月明青鎖闥。夜夜獨歸來。尹判事又進曰。簪纓之族。從列之臣。時不齊而命窮。天不順而事誤。獨拔於多士。終仆於亂兵。萱衰春老於庭闈。而音耗隔絕。山高水長於湖橋。而道路復遠。逐明月而還家。托悲風而號樹。遂吟曰。桑弧少不習。陣馬老難騎。殘命何多舛。浮名早被欺。天昏望雲處。日暮倚闥時。寂寞孤魂在。空山哭子規。申兵使又進曰。早中武選。粗演兵書。超籍西銓。典鎖北

門。值時運之蹇屯。痛。變輿之播越。率甲冑而踰彼鐵嶺。會元師而陣于臨津。欲雪國耻。兼報兄讐。催兵渡水。暴虎憑河。士馬皆血。雖悔曷追。乃歌曰。江之水兮悠悠。魂一去兮不復還。風蕭蕭兮吹岸。陰雲蔽天兮白日寒。誰無兄弟兮何獨孔酷於吾門。江魚之腹兮藏余之骨。歲久年深不忘者存。鄭同知又進曰。早習詩書。未學軍旅。幸摘科第。久縻爵祿。任擯接於戎馬。位登躋於貂蟬。福過災生。恩深死輕。魂墜於矢石之間。骨朽於沙塲之上。長懷惻惻。歲月駸駸。遂吟曰。驕鋒一犯蹴城濠。烏鵲橋邊殺氣高。早識書生事征戍。且將馳馬慣弓刀。沈監司又進曰。受命賊藪之裡。莅任板蕩之餘。宗社旣墟。望長安而腐心。兵力未盡。據畿甸而鳩率。衣不暇於解帶。志空篤於報國。朔寧之喪師。敗雖無智。鍾街之梟首。購幸有子。死得其所。余復何言。遂吟曰。碧山深處掩官扉。候馬中宵去不歸。魂散劍鋒鶴鶴盡。曉天寥落月斜輝。鄭萬戶乃提劍而起舞。歌落帆之曲曰。念國家之有急。唾列郡之無男。生與將軍同事。死與將軍同所。仰天何愧。俯地何怍。

志氣豁達。格調悲壯。其歌曰。檣高百尺兮大帆如雲。碧海茫茫兮波不生。紋。左釜山兮右馬島。填醉眼兮微醺醺。身先死兮志未遂。嘯壯氣兮千雲端。大丈夫不可瑣瑣兮。何用悲乎一彈丸兮。李僉使又進曰。雖非百夫之特。自許一介孤忠。疏勒守城。報耿恭之都尉。赤壁焚舟。勉程普之右督。若戟之紫髯。久臨於河隈。如林之青雀。總懸于手下。要剗對馬而填海。豈意搏鵬之摧翮。魂飛勇盡。恨塞滄溟。遂吟曰。大海深如許。孤身怨有餘。壯心售未了。鯨浪碧磨虛。李水使乃起而請曰。一心爲國。死旣已矣。往不可追。今何足說。願爲諸大人一戲謔兮。鞠長腰唾老拳。爲拖櫓樂之狀。醉唱其歌曰。斗柄長傾兮潮水欲上。長年楚老兮舟可以放。王事靡盬兮將軍令嚴。扶桑咫尺兮且掛長帆。申判尹又進曰。賤子之懷。旣陳梗槩耳。遂吟曰。國中名譽早。身後是非多。一敗還關後。悽然撫劍歌。劉水使又進曰。英雄非惜死。惜其浪也。良將不貴速。貴其神也。緬當日之有人。罵老夫之多怯。駟迫如羊。袒裼制虎。受國恩者二三。死固宜也。鑿戰卒者千百。慘何忍言。

弓摧而奮拳。劍及而破頭。豁暴荒原。悲奏大江。遂吟曰。背水羸兵搏老浪。一人無策萬人亡。山河細草年年綠。惟有行人指戰場。金晉州又進曰。幸荷赫天之靈。粗有金城之績。褒榮踰分。感激捐軀。虜騎之疆。暫頓於盱眙。子奇之勢。復合於睢陽。羅雀而掘鼠。計窮殺馬。折骸而易子。意息牽羊。志益專於三坂。身忽顛於一丸。殊渥未答。壯懷難紓。乃歌曰。樓之石兮蠹蠹。下有長江兮瀉寒碧。壯士久圍兮邊塵黑。炮聲震天兮如裂竹。泰山兮鴻毛。血染兮戰袍。地濶兮天長。長飈時起兮怒號。李兵使又進曰。當賊鋒大越于雲峰。伊天將獨守於帶方。陷南原之賊來自求禮而曰雲峰傳聞之誤麾我兵而列陣坐觀。悶國恥而單騎直赴。管下惟三十餘人。城外則百萬其數。九攻難却。一陷何酷。危儆莫洩。積屍同腐。遂吟曰。蛟龍城古殘雲斷。烏鵲橋荒落照寒。白骨叢中多歲月。壯夫華髮夢衝冠。黃兵使又進曰。微躬不足以用。孤堞倚以爲重。風舉威於萬旗。雨胎禍於一隅。彈自中額。賊紛上城。天亡非戰罪。事將奈何。繩斷有其處。人孰咎我。飲輟登陴之血。裹訖出戰之瘡。遂作築城

之歌曰。淫雨連旬兮禾頭生耳。古城崔嵬兮崇極而圯。萬杵馮馮兮勗哉與士。賊若攀登兮吾屬且死。金淮陽又進曰。右座皆壯也。豎儒其續乎。淮陽崎險。素稱三面。老夫蒼黃。未團一兵。唯知守土而不逃。頗幸據床而自滅。手持印綬。血漬朝衣。遂吟曰。淮山嶸嶸淮水滔滔。孤魂躑躅事與心違。萬古長夜。知我者誰。溫序有魂。我往從之。趙提督又進曰。粗明識見。衆嘲狂癡。燭兇醜來欺之謀。叫大義斥絕之疏。郇模之持筐。真可痛者。徐福之徒薪。豈偶然哉。刎首未決於犯境。釋耒專爲於勤。王。挫銳摧堅。上黨之呼嗒動天。乘暗取敗。錦郡之肝腦塗地。男兒不屈。義死如歸。遂吟曰。孔曰成仁。孟曰取義。讀聖賢書。所學何事。風疾草勁。主辱臣死。傳檄雲雷。誓心天地。歷募三千。赳赳多士。西原大捷。威震列壘。輕敵錦山。竟致齎志。日居月諸。朽骨叢裡。魂尙忸怩。爲國之恥。金倡義又進曰。適值蛇虺之毒。蹂躪金湯。不量蛟蠻之力。糾合義旅。草野閑居。敢云柱厲之不知。江都形勝。使學景仙之先據。久覘漢陽之窟。縱未掃蕩。往守晉山之城。實有深慮。天不

助順事終難救。空餘落落之懷。渾逐啾啾之鬼。遂吟曰。昏鴉啼散月臨城。樓觀荒墟宿草平。唯有竹林摧不盡。每年風雨笋齊生。金從事又進曰。文竊四海之聲。力挽六鈞之力。卓犖平生。不拘小節。龍灣之犯。實觸邦憲。扞獄之囚。坐韜奇策。恭承霈澤。不憚赴難。睥睨醜類之跳梁。剋期勦滅。莫救元戎之敗衄。厥罪惟均。遂吟曰。彈琴臺迥淺灘鳴。時爲孤臣作不平。憶得誤編開府幕。幾回虛說左車兵。溪邊骨朽丹心在。地下魂單白日明。肯向圓扉頻泣鏡。沙塲暴露亦恩榮。宋東萊又進曰。身縻海鎮。驚息邊烽。變出昇平之後。人或倉卒之間。其誰與守。連帥已遁。謂我何往。城門可閉。泰山鳥卵之勢。已料其敗。義重恩輕之字。謹寄于家。罵彼羯狗。寧饒杲卿之舌。蠢茲島夷。解封王蠋之墓。欲忠其國。何愛乎身。遂吟曰。分符猶未絕。東漁臣死封疆罪有餘。身世已憑三尺劍。庭闈只寄數行書。悠悠歲月黃雲老。落落襟期碧海虛。千里孤魂歸不得。古城風雨獨躊躇。任南原又進曰。適當危時。猥蒙寵擢。所受南原形勝。實是東國喉舌。共天兵而戮力。

擬江淮之保障。雲梯亂舞。月暈漸重。慨軍孤而勢弱。慘援絕而鼓沈。封疆失守。而自蹈兵刃。土臣則當死。楊元力戰。而難保首領。王法則有憾。遂吟曰。豺貅一隊下天關。橫截龍城意氣閑。猛勢直衝飛將去。孤臣只有片魂還。金原州又進曰。以百里之殘州。當萬數之勍敵。既不能臨機而制變。又不忍修齋而誦經。退保雉岳。尙帶魚章。謂山險而難攻。奄土崩而易敗。孤城血肉。舉室刀槍。老夫恩甘萬戮。妻子死何一時。遂吟曰。雉岳山高三里城。白頭朱綬保殘兵。無端一化妖鋒血。惟有寒溪日夜鳴。崔兵使又進曰。身不滿晏嬰之七尺。心則雄謫仙之萬夫。奮於討賊。糾合湖嶺之南。嘉乃錫爵。再拜關塞之書。守隼墉而敵愾。類螳臂之拒轍。城頽巨港。身墜高樓。遂作賦曰。緬島夷之猖狂。侵我疆兮匪茹。鼓振武安之瓦。血走俊儀之渠。舉鄆郢兮旬日。越巴蜀兮。鑿輿九廟塵兮不血。萬姓嗷兮爲魚。一介臣兮無他。伏大義兮其徐。提三尺而迅起。士爭赴於羽書。軍容動兮天地。壯氣衝兮斗墟。爰紫泥之有命。曰玉麟之分余。誓乾坤而扼腕。期醜類

之掃除。守晉陽之孤堞。忍寇至而去。諸締巡遠兮呼兄。撫士卒兮吮疽。慨敵強而力孤。嘆志大而才踈。天不佑兮奈何。殲我良兮士沮。望西方兮慟哭。空血指而書裾。樓之高兮百尺。魂煢煢兮靡所如。春風吹兮草綠。秋月明兮天虛。怨年年兮不歇。化彩霓兮長嘯。高僉知又進曰。寧爲棄物。未堪多難。圖功狼曠之已黜。傳檄文山之仗義。顯戮陰誅之句。縱未泣於黃巢。聞鷄擊揖之言。皆得孚於東心。驅兵犬羊之穴。悵一去而不返。舍生熊魚之取。雖百死而何悔。况有二兒。不負兩全。遂吟一律曰。聖代忘金革。邊臣閉玉關。星躔端北拱。鯨鬣駭東奔。列郡腥塵漲。長空血雨昏。夷陵白起火。蜀棧翠華翻。皓首三朝老。丹衷一寸存。檄傳明日月。盟定動乾坤。風掣旌旗迥。天晴鼓角喧。無謀輕犯敵。有劔重酬恩。寂寞千年怨。淒涼二子魂。古塲春盡後。苔碧自生痕。將軍乃愀然蹙眉。顧謂左右曰。人各有死。天不可恃。既聽君等之言。亦告余懷之悲。生長太平。未效一勞。解竹符而登壇。深辱聖明之知。值弁服之越海。自分一死之輕。聚舟師而橫截。置湖路於

奠安。火賊艘三百餘數。勢莫能當。擁閑山五六其年。虜不敢窺。將忽易於臨戰。功竟虧於爲山。殘兵片舸。再受於敗軍之後。維櫓下帆。七捷於急湍之上。遏逋賊於曳橋。隕將星於露梁。鳴鼓揮旗之令。分付豚犬。誓海盟山之句。感動魚龍。遂吟曰。萬舸迷津一枕安。六年桑海動波瀾。雲暗馬島彈丸小。霜肅轅門尺劍寒。誓指山河心已許。恩同天地報還難。出師未捷身先死。留與英雄淚不乾。吟竟。有僧將俯伏而進曰。本出緇髡之徒。幸賦忠勇之性。脫僧衣而着鐵衣。頓忘六戒。提法鼓而作戰鼓。思效七擒。轉鬪凶鋒。深入賊窟。及獲有死之榮。終免無君之誚。遂吟曰。子子孤魂去不來。亂山青走鬱崔嵬。人間莫道輪回說。一鎖泉臺怨未開。將軍贊然曰。此僧也。其人也。亦足以張吾群。賡和之命。屬諸坡潭子。即一揮而就曰。今夕何夕。歲云徂。古臺霜月連平蕪。精忠報國大將軍。夜會賓客臺之隅。義氣撐空劔戟寒。轅門此樂人間無。日休堂中好勇子。霽峯襟期冰映壺。干城雉岳老太守。帶方任君懷壯圖。東萊松栢後凋姿。從事雄奇龍鳳雛。堂堂

大義孰先倡。名冠湖南聲價殊。提督元稱慷慨人。淮陽自是書生迓。三世登壇李氏子。復有黃公眞丈夫。金侯血渾保障身。劉帥霜驚憂國鬚。司空恩寵涵天地。水伯威名動舳艫。英雄誰似李僉使。萬戶胆力非常龜。容儀端重沈方伯。氣岸軒昂鄭中樞。南門鎖鑰小元帥。判事風流君子儒。山籍曾編玉署名。星官夙佐金華謨。高家雙壁伴鸞翔。梵宮靈師餘鶴寥。千年此會知難再。萬古芳名自不孤。坡潭之子何幸耳。綠酒金樽同一娛。把筆吟哦記盛事。詩成滿紙揮明珠。書呈左右擊節而歎息。曰。文詞清健。意氣激切。而足下之才。可謂高矣。作賦縱云退賦。吟詩無補衛國。以子之才。兼業武藝。操弓走馬。何所不可。文足以華國。武足以禦侮。吾等已矣。子其勉之。坡潭子起而謝之曰。願安承教。乃辭而下焉。長川之畔。有衆鬼拍手而咲。問其由。蓋譏元統制均也。蟠其腹。啞其口。面色如土。匍匐而來。擯不能參。倚岸箕踞。扼腕長嘯而已。坡潭子乃大噱弄之。欠伸而覺。乃一夢也。撫枕追想。歷歷可記。以其官爵。考其姓名。將軍乃舜臣也。高僉知則敬命

也。崔兵使則慶會也。金原州則悌甲也。任南原則鉉也。宋東萊則象賢也。金從事則汝吻也。金倡義則千鎰也。趙提督則憲也。金淮陽則鍊光也。黃兵使則進也。李兵使則福男也。金晉州則時敏也。劉水使則克良也。申判尹則礪也。李水使則億祺也。李僉使則英男也。鄭萬戶則運也。沈監司則岱也。鄭同知則期遠也。申兵使則砧也。尹判事則暹也。朴校理則篋也。李佐郎則慶流也。高臨陂則從厚也。高正字則因厚也。僧將則靈圭也。坡潭子有志者。若有一人。死於國事。未嘗不爲之嗚咽。或慕其義。或嘉其節。或歎其績。或悼其命矣。夢裡相逢。皆吾平生所欽仰者。有是心。故有是夢也。乃作祭文具薄奠。登華岳之上。哭望南雲。俯臨西海。招魂而祭之。其辭曰。坡潭子采首陽之薇。酌凝碧之池。敢告二十七人之靈。靈其有知。余本書生。半世垂帷讀青史。嚶嚶然古之人。精忠苦節。掩卷而於戲。歸來萬古宇宙。謹得一二男兒。以華夏之盛。若是其小。而惟我三韓。雖稱禮義之邦。舊時東夷。臨危不急病。攘夷之士。二十七其麗。噫。神承聖繼。造無疆之基。二

百年休養教化。多士若茲。舟師統制。寔天挺之神姿。分闔有命。雄據邊陲。閑島截海。歲月六朞。易將之舉。元出於賊謀。非誤師期。速敗績之後。以九船殘卒。屢捷碧波。功可以勒鍾。露梁之戰。公臨將死。分付旗鼓。子用其命。走生仲達。籌策尤可奇。高霽峰文章。不足以稱。而慷慨起兵。戮力扶危。委身於賊藪。舍生取義。堅確不移。觀其募義之檄。使人讀之不覺涕洟。崔兵使之爲人。落落靡所羈。初聚義旅。匪虎伊熊。西關尺書。好爵爾縻。終覬晉陽。壯志未施。雉岳山城。崔嵬峩嶷。拍天幽深。金使君相地。實占險巖。妖鋒一犯。勢孤兵疲。閤門蹈刃。腥血淋漓。南原乃湖南門戶。任侯簡受。而雄大藩籬。楊元二千餘騎。壯耀軍威。狂寇猖獗。合力而張毒。如鳥如鴟。外絕虻蚍蟻子之援。云獨何爲。三里之城。一朝瘕瘕。東萊宋斯文。以瀟灑出塵之標。江海一麾。變出不虞。勢若干鈞之重。則於一絲。鉄扉牢鎖。誓心神祇。臨死有十六字。觀者哽咽慘切。悽其壯哉。金從事也。攀桂第一枝。力擾四十斤鉄椎。磊磊吾生。自比太過。而縲紲非罪。劔柱其熙。國家有難。佐幕於千

乘。而時運不利。人亡恨遺。倡義之士。先據西南要害。以振綱維。復遏擁兵。力戰而疲。身死名垂。提督識見。始謂之。如龜當立。蘇修好之日。恐或禍胎。挾苦而持刀。五日伏青規。賈策郇筐。衆皆謂癡。子眞癡耶。聞變即起。叫義孜孜。西原之捷。羽檄交馳。深入錦山。蹈詐履期。身殲事誤。大績一墮。金先生可人也。具朝服佩印綬。守土不離。迂儒雖不鑿敵。而不朽其身。淮水清漪。黃公將一城倚重之望。擁楯登陴。彎弧射賊。渾於徧裨。義軀一顛。鼓聲奄衰。李公當孤堞已搖殆。而率數騎而赴難。不憚其危。輕將千金。蓋恥爲頓堂堂乎。金侯力存晉山者誰。勳高報隆。玉音曰咨。長城忽摧。恨不見巡遠之業。赫赫丕丕。劉公宿將。心篤馬革裹屍。而臨陣之敗。矢盡立死。允符千著。申公背水之陣。恩弘報蔑。其斃也固宜。而八千健兒。又何隨水伯眞百夫之特。僉使乃八尺猗猗。運亦壯士。何志氣之不卑。畿伯同樞。俱以清朝名宦。翱翔乎丹墀。受命危難之際。捐軀不悔。其揆一揆。復兄之讐。公何汲汲。一刻爲遲哉。尹政堂有嚴慈。騎省郎官。玉署論思。同死於非命。

未滿一噫。高門挺秀。二介白眉。無忝爾所生。實秉天彝。靈圭出於緇髮。顛越王家。力欲扶持。嗚呼彼蒼者天。其意難窺。胡然而生。胡速奪之。冤氛烈氣。寥乎天地之間。鬱不得披。雷轟雲結。風慘悽而吹。不足以怒也。不足以悲也。惜乎以公等之才。處文恬武嬉之時。應緩急於倉卒。以不閑之兵。縱未折箠苔。而循國而忘身。節義小不虧。則馮鄧李郭。同稟資也。倘或公等一二輩。天假數年。或至於斯。則吳薪越膽。生聚教訓。張五六師。而使桑海馬島。鯨鱉蛟螭。潛伏而潛縮。不敢掀鬣而振鬣。嗚呼死不復生。往者難追。在地為高山大海。在天為北斗南箕。仰之彌高。涉之無涯。花山峭壁。四海之涓。魂兮歸來。庶感吾詞。○罷全羅兼防禦使。○始納田稅于海倉。亂生

辛丑慶長六年萬曆三十九年

春二月。遣宣傳官。召全羅監司李弘老。陪道上京。即還道。因兼尹全州。他道皆然。如嶺南之兼大丘府使湖西之兼公州牧使是也 ○天朝恩賜 大內殿誥命冕服。因亂

倫失順。差賀節陪臣趙挺。奏請補 賜回來。 賜 國王及懿仁王后誥命冕服。其誥命曰。朕惟王者持危舉廢。莫厚于仁。立國安人。莫大乎禮。故禮者勿恥足以振之。國恥足以興之。雖文章物采。無敢廢也。爾朝鮮為國。素敦禮教。懋篤忠敬。稱我優嘉。自頃年以來。越在草莽。典章文物。幾乎蕩然。朕為爾洗滌兇妖。恢還土宇。固我師武臣力。亦不可謂非爾秉禮之效。否則軍旅安經。政令安行。順物不守。事乃大逆。尙有今茲之捷乎。今王諱以誥命冕服。奔迸莫守。遣使來誥。祈得賜如初。夫事上莅下。須此修容。復漢威儀。朕所矜許。是勅。尙方製給。仍錫之誥。余尙敬哉。 朕不以禮假人。爾毋以菲廢禮。藍縷啓楚。大布興衛。薪膽霸越。皆王今日事。懋哉。母忝 朕命。王妃朴氏。誥命畧云。早以嘉耦。作配大邦。頃遭播蕩。聿來胥宇。宜膺新命。錫舊章云云。遣陪臣黃慎奉表謝 恩。出改 ○遞李元翼。以李德馨為體察使。自京巡下嶺南。因到全羅左水營。即還嶺南留星州。三月十一日。日光相盪。未幾。有星隕于西海。三角山有雷聲。漢水又赤。○

移統營于巨濟。統制使李時言自全羅左水營換入巨濟。巨濟水使裴興立換出全羅左水使。

夏六月。倭使又來。以被虜人前縣監南忠元等二百餘人進貢。本道左水營虞侯報云。本月二十一日。荒嶺山烽燧軍宋己必等進告捕捉走回。前縣監南忠元等招內。我國人男女并二百五十口。倭人八名。分載四隻出來云云。賊情則追于取招馳。啓次。水使即爲狀啓爲有如乎。當日南忠元更招內矣。身少時。特蒙天恩。除授青山縣監。前後八年而遞。還朝從仕。未久。鎮川本家下來。及其丁酉之亂。挈家屬慶尙道聞慶尙州等地。往來避亂爲如乎。賊兵還下時。子息二人。并清正陣被虜。未久。入送日本。倭酋秀吉。令給賊將增田右門衛。同倭家止接。日與本國士人河東居鄭昌世。京居朴彥瑛。尼山居宋廷秀等相議。常謀逃。出次對馬島主平調信平義智等。以去年我國使人朴希根持來書意。家康處面議事。大阪入來是如。聞奇即時。求見而進。則同調信。前日通信往來時矣。身爲青山縣監。因

字義智考大
故二年久家康
二四一初事
七河久

其支應差使員。相知面目。調信對曰。朝鮮全盛之時。我等修好相通。多受爵祿之恩。故平生一念。服膺難忘。不幸壬辰之役。大失交隣之道。關白臨死之秋。悔心求和之意。凡在聞見。衆所共知。曾將此意。欲達于朝鮮者。亦有年矣。偶然去夏朝（壬辰壬午）鮮使朴希根持禮曹公文傳于此。旋即渡海後。滄海隔遠。久未答通。汝等願還時。兼送倭使。以答禮曹公文爲良結。倭人八名。一時出送。本月二十一日。釜山前洋下陸。爲有在果。同時出來。右人等段。或壬癸甲丁酉年被虜是齊。日本賊情段。關白死後。關東大將家康者。以關白子秀賴倚立爲主。假攝政權。擅弄國柄。無異關白。統合一方。關東中納言景勝據城而叛。（壬辰壬午）往年六月。家康舉大兵。直向關東。後西京留鎮大將毛利輝元。因據王城而叛。領西路諸將。攻破家康之城。因此直向關東迎戰。家康之軍。反見大敗。西路諸將石田治甫部。及僧將安國寺。小西飛平。行長等。皆被斬殺。家康自關東。直向西京時。盡屠諸邑。獨不誅輝元。而削髮爲僧。盡奪食邑。安置京城外。爲有在果。此外興兵之事。未可詳知云云。

納招被虜之人五百二十名。今更照名查閱。則二百三十一名。依 體府從事官分付。近地之人。即送本土。其餘以萬戶孫文彧。領送于 體府。小名居鄉列錄。上使云云。○吉雲節蘇德俞等伏誅。雲節慶尙道善山人。故直講誨之子。德俞全州人。汝立三寸姪也。己丑被逮。遂蒙恩。安置濟州。至是雲節潛入濟州。與俞密謀不軌。爲俞妻所覺。節先發告。牧使趙徹拿送。德俞等于京誅之。本道兵使安衛。前水使金億秋等。辭連被拿到京。蒙宥。遣御史于濟州。按撫餘民。雲節以先告蒙 宥。其後以 恩典不及。頗怨望。還囚處斬。已丑逆謀。有吉三峰者。而不得捕。今此雲節頭有三角兒號。三云則無此疑。

冬十二月。設量田。○天使至京。留十日還。一路蕭然。主事官賦詩曰。來如獵狗去如風。收拾朝鮮一境空。猶有青山移不動。將來模得畫圖中。倭人橘智正等。三次出來。密問天兵有無。情形叵測。願得水兵將一員。量帶先鋒數百。督同本國邊將。訓連兵卒。使聲聞遠播等情。順付賀節陪臣金玜。奏聞于 帝。

壬寅

慶長七年 萬曆卅年

春正月元日。大雪。

二月。召鄭仁弘拜大司憲。有旨云。久聞高義。十年之前。自是之後。卿歸故山。歲月悠悠。逮壬辰之變。作。卿乃仗劍討賊。遮陣一面。山林之下。爲國效死。播遷之中。未嘗不發歎興懷。猶未能召致左右。弼予不辟。遺賢之失。予固不免。爰拜銀臺絲綸之任。以期朝夕。贊襄。卿乃引病不來。良用缺然。不敢更勞。夙夜機務之煩。茲以卿爲司憲府大司憲。以總朝綱。夫積學。所以將欲有爲也。獨善其身。豈君子之所欲哉。切宜思之。辭故山之烟霞。擲耒耜而一起。即今春日。載陽。行程甚穩。卿其乘駟上來。 御詩云。百死心猶鉄。求和不可聞。如何倡邪說。悖義惑三軍。此必倭使再來求和。時廷議不一。故作。

夏四月。因朝議。賜舟師勤苦人賞料。二十一日。開場試所慶尙道釜山巨濟全羅道鯨島古今島。鉄箭五矢三巡。片箭三矢三巡。鳥銃三柄二巡。三技中二技各一中。得叅。合取一萬七千餘人。六月中放榜。○忠清道人。

告驛卒華鉄逆謀。逮捕誅之。辭連緣坐者甚衆。列邑騷擾。光陽前牧使鄭
溥。南原前縣監金軾。出身尹遇等。皆被拿蒙宥。 啓請海科入格人。充
秋七月。全羅監司韓浚謙。以舟師五番射夫。未准 啓請。海科入格人。充
數赴防。

九月。朝廷以當初海科之設。專爲舟師勤苦之人。而內地之人。亦皆赴舉。
混列榜中。事甚未便。 啓請初試施行。因定會試二運設場。兩右道先赴。
二十一日。聚京開場。鉄箭五矢。一巡一中。騎一次二中。鳥銃三柄一中。取
中二技。後講武書一經。○有星。隕于京中及慶州。

冬十一月二十七日。兩左道海科會試。至明年正月。合聚放榜。凡一千六
百餘人。

癸卯

慶長九年
萬曆廿年

春。革長興兼兵使。還設康津。本內廂。臺官文勵等死。先是。長興士民。不任
侵苦。累上言疏。未得蒙 允。至是移營。本府人文益明時在京。首相尹承

勳問移營便否。益明日。移之便則便矣。但銀價四十同。人不聊生。尹相大
驚。詰諸都堂。次知臺官文勵。姜籓。南倬等。以尹相抱東西之嫌。構誣虛端。
勵等竟被現坐死。

夏六月。盜殺前叅判柳熙緒前府使黃克中。○大風雨。揚沙拔木。屋瓦皆
飛。沿海舟船。全數撞破。兩南尤甚。漂人家不知其數。百禾損盡。

冬十一月。忽刺温野人。自內府領兵馬。突至江邊。屠殺向化獐子。獐子數
百。遁越江水。入鍾城鎮。忽賊移兵向我曰。不還遁胡。願交一戰。遁胡曰。我
等不死。事將不測。出還本土。並仗劍死。忽賊盡收餘衆而去。自後胡中消
息。未得探知。

甲辰

慶長九年
萬曆廿年

春。倭人橘智正又來。懇乞通信。 命僧統攝唯正往日本。詳探賊情。時人
有詩曰。莫道廟堂三老在。安危都付一僧歸。○撫院遼東大官差原任遊擊劉
興漢。到本國邊上。偵探倭情。無論緩急。不時飛報。事攻○移設統營于固城

豆籠浦。

夏六月。倭大船一隻。到慶尙道唐浦。爲水兵所捕。

冬十二月。平安監司書狀。信川郡守馳報云云。境內有恠誕之人。止接于山非家。所謂恠誕者。康加屎其妻香台等。捉來囚禁。許接山非及其夫金享福。自現進告云。康加屎本是龜城邑內之人。率妻去十月來宿。留連向家。次有奇男三人。傍家。從雲天間下云。掃舍宇以待。亦爲去乙。如其言。虛正室陳席之際。果是所謂奇男有三。不見形跡。從天來云。家內入坐。觀之。則長男鬚長尺許。眼大。面如錚盤。坐體壯偉。次男鬚長五寸許。面貌廣好。坐體亦壯。三男鬚長四寸許。面亦廣好。坐體亦壯。皆着黑冠。三男黃冠。亦服黑色。似假所見極嚴。一見之後。不敢再視。飲奉一如常人。供進則食飲皆半。炮肉雉鷄亦爲食。破匙箸之聲。動如平人。夕飯亦如此。大槩有若人形。言語微細而難聽。其母傍坐問說。因言。三男稱號聖人。稱號神人。稱號生佛。翌曉出去。自房中悠然而逝。只見出家之形。厥母言內。長男生下陰

門。次兩男脇間產下。皆是今年產。長未周年間。壯大如此。且孕第四子矣。家一日留宿後。所居龜城地。前項第四子亦出右脇。不日壯大。未幾還到。第三子已爲婚嫁。率美娥生兒。稱云亦携第四子偕來。如前入坐。家外來跡不見。正是虛誕之事。康加屎招內矣。祖父晉州人物。作罪入居宣沙浦矣。身同浦胎生。退計五六年間。良女香台作妻爲旒。第十一朔今年四月。產男陰門。即不知去處。又孕二男。第三朔六月產左脇。又孕三子。第三朔八月產出左脇。後三子并即出去。不知所向。殊無父子之分。不勝感慨。三男天間已爲婚嫁云。率美娥服色。有若平人矣。身率妻還來龜城。四男懷孕第三朔。亦出右脇。從雲天間往來。去留不得知之。其妻香台亦然。供招不勝駭恠。并爲囚禁。爲有在果。此不過虛誕無形之事。恐有興妖惑衆之弊。如是馳。啓云云。○以叅判韓浚謙拜都元帥。以趙揖姜弘立爲從事。浚謙巡下嶺南。

乙巳

庚辰
丙午

亂中雜錄四

春正月十八日。忽刺温野人聚徒入寇。陷潼關堡。殺僉使金伯玉而去。北虞侯成祐吉追擊敗之。收我國擄人而還。時北兵使李用諄病遞在途。祐吉追餞于中路。潼關賊警猝至。祐吉馳還營中。率留防軍數千。夜渡江直走初部。乘其未備。突發鏖戰。賊衆敗散。我軍不分老幼男女。廝殺貫槊。盡收被擄男婦而回。○畢論軍功錄勳。上尊號曰至誠大義格天熙運。又元勳壬辰賊變。大駕西幸。群臣跋涉扈從。終致回鑾之慶。錄扈聖功臣李恒福等八十六人。協力宣武功臣李舜臣等十八人。丙申李夢鶴逆變。嬰城固守。克清兇孽。錄靖亂功臣洪可臣等四人。事

三月。北兵使金宗得虞侯成祐吉領兵渡江。伐野人部落。大敗奔還。拿鞠宗得。以李時言爲北兵使。

夏四月。惟正還自日本。刷還我國男婦三千餘口。初正渡海致日本。托以盤游諸國玩賞山川。倭人益奇之。肩輿邀請。殆無虛日。及至大坂。首言交和寧國之事。次言刷還我人之言。家康以爲壬辰之役。吾實未知。兩國無

事。相安太平。不亦可乎。即令刷出被擄人物。使與俱還。但以要時羅事歸曲。惟正曰。我國與日本。雖是萬世不忘之讐。而交隣之約。素不負汝。一倭有無。何關勝敗。而兵退之後。謀殺往來之使乎。某年某月。要酋回自中原。我國如前接待。同年某月日。護送于釜山。今已累年。日本以此歸咎。必是諱隱。要開釁隙。不然扁舟滄海。應有漂溺之患耳。倭酋等猶以爲然。更不言及。要正再來。惟正將還。先送探舡。歷報朝廷。兼陳渡海之日。令舟師諸將屯聚釜山。以壯軍容。俾嚴率倭之瞻視云云。是日統制使李慶濬。領舟師赴釜山。風遲未及。竟誤師期。正以刷還人付李慶濬。使之隨便分送。慶濬分付諸舡。聽其所之。舡將等逢授男女。爭先恐後。繫之維之。甚於搶掠。或問所係而不能答。則少時被搶者徒知朝鮮而不并稱己奴。美女則知其所係及父母名字者多。縛投其夫于海。而任爲己物。如此者非一。天高聽卑。事乃聞焉。即罷李慶濬。以李雲龍代之。因令各道水使。摘發邊將之恣行是事者。水使等視爲文具。竟不發告。

五月。北胡多輸糧草。儲置江邊。備邊司令下三道。調兵赴援。全羅監司張晚。虜其調發之際。有奸吏操縱之弊。馳巡列邑。親自點抄。雖極悶迫。軍無怨意。○都元帥韓浚。謙自慶尙。巡到全羅左水營。本道監司張晚迎候于水營。

秋七月初六日。元帥監司自順天到南原。未久。元帥還朝。○大雨水溢。嶺南關東尤甚。名山盡崩。嶺左則安東等六七邑。關東則旌善等五六官。幾半漂沒。人畜死者不知其數。深山喬木。顛拔漂流。漢洛二江填塞不流。

丙午

夏四月初二日。南原軍器庫失火。凡千器械。及貢木百餘同蕩失。○奴忽二酋。情形叵測。咨請劉游擊。差人宣諭於忽酋。又移咨撫院總鎮。宣諭於奴酋。傳曉忽刺温。毋再動兵。擾害朝鮮。又將北虜構釁。懇乞勅諭等情。順付賀節陪臣李尙信。具由奏聞。事○帝遣翰林院修撰朱之蕃。刑科都給事中梁有年。頒皇太孫誕生詔。因降勅諭。節該往以倭情叵測。朕

令遼東撫鎮。差人到爾國哨探。經今三載。督撫稱邇來海上。並無動靜。遣官徒自煩擾。令爾國自行探報。以省供應之需。王宜及時淬勵。乃心嚴督。着實修舉。仍遠偵密探。不論有無警息。每兩月一報。鎮江游擊衙門轉報。如有重大情形。不時馬上馳報云云。事○玩球國中山王世子尙寧。移咨爲申酬厚儀事。關酋肆逆。神人共憤。天亡驕虜。海宇騰懼。矧今天朝神武大振。貴國威令更張。則餘孽旣行勦滅。凡爾醜虜。莫不喪魂落膽。日後豈復有匪茹之關酋者哉。間或逆萌。敝國職在藩封。誼屬友邦。自將戡念共分。遙偵豫探。馳奏天朝。轉左右以聞。幸無遠慮云云。仍將錦絹二十端。黃石絹十端。花文絹十端。土扇二百把。送來。事○日本國王源家康。盡革平姓。自主國政。修書送使。請通信。禮曹以僉知全繼信。持答書送日本。且以犯陵之事歸曲。繼信與倭使橘智正。渡海至大阪。宣諭是意。家康即拿二倭。稱犯陵賊。俱使出送。

冬十月。全繼信等與倭使智正回還。留智正于釜山。拿二倭上京。年皆二

十餘。決非壬辰犯順之倭。即梟藁街家康書意大槩。壬辰之事。誓非所知云云。智正在釜山。待通信回答使。本國以僉知呂祐吉為上使。弘文修撰慶暹為副。丁好寬充書狀官。治行李。仍具奏聞于天朝。○陪臣閔夢龍回自京師。齎到兵部咨。海夷犯搶朝鮮。遣差諭令各守邊界。不許侵殘。屬國自取罪戾。遣陪臣柳夢寅奉表謝恩。事攷○是年宣宗昭敬大王四十年。查古典。設增廣別科。領議政柳永慶。久當權軸。擅弄國柄。與奪在手。賄賂公行。南邊守將。船米直納。一為訓練都監所奪。又有萬戶者。爭貨其門。莫定肅拜。前叅判尹安性有詩云。都監坐得全船米。萬戶來爭肅拜名。若使此言聞塞外。東倭北狄自然平。

丁未

慶長十二年
萬曆廿四年

春正月十二日。回答使呂祐吉等。自京下嶺南。百僚出餞。前叅判尹安情有別詩云。使名回答向何之。今日和親意未知。試到漢江江上望。二陵松栢不生枝。贈別之詩甚多而此詩膾炙人口使過楊子驛。大風驟至。折落旗竿。一行驚

駭。至慶州留一朔。

二月。呂祐吉等進釜山待風。二十九日。渡海向日本。○罷各道兼監司。○建州衛胡酋奴兒哈赤。驅動大軍。將六鎮近境藩胡。搶掠搬移。軍勢日熾。穿過本國鍾城。陣於烏碣崑下。與忽刺温大軍相遇。大破之。又從慶源東門外。取路回軍。具由咨報撫院總鎮等衙門。以憑轉奏。事攷鐵山郡守柳旻彌串僉使康孝業等。領兵下海。遇賊船三隻。互相搏戰。殺傷相當。點看載船物件。則有天朝人衣服文書。似係上國之人。未及卡別。而致此相殺。備由具本。順付陪臣姜縉。奏聞于帝。事攷

聞事攷

戊申

春正月。前叅判鄭仁弘上疏曰。伏以。臣遠伏南陬。窃聞玉候未豫。越自

春間而萬機依舊。裁遣不滯。意謂無妄之作。宜有勿藥之喜。而藥不可試。日月頗積。以至十月之交。尤有不安節之候。中外遑遑。遠近憂懼。未浹旬日。旋有乃瘳之慶。此誠天地之所眷佑。神明之所扶持。宗社之幸如何。臣民之福如何。然竊聞常日尙有元瘴一樣之教云。遠地傳聞。不勝悶慮之至。臣身在嶺外。距都城近千里。年踰七十。衰朽內劇。疾病外乘。龜縮田廬。頓無筋力。迄未從嘗藥之後。罪戾深重。無所逃遁。瞻望北闕。無以爲心也。臣受國厚恩。報效無路。朝夕而死。泉壤之下。長抱無窮之憾。則今雖不能自效於輦轂之下。豈合身逢聖明之世。遽焚遇遯之章也。獨念聖候尙未盡瘳。而遽以狂瞽之說。仰塵天日之鑑。臣雖至愚。豈不知不安於心也。第以宗社危疑之兆。明在目前。國家存亡之幾。迫在朝夕。蓋有不容噤嘿者。故冒萬死開一喙。擬爲垂死之日報國之地。不欲爲姑息婦寺之忠。而竊自附於愛君以德之義。惟殿下垂察焉。臣竊聞之道路。去十月十三日。自上下傳播之。教領議政柳永慶。心忌元任大臣。揮斥

盡去。使不得叅看。累上防啓。獨與時任共之。至於中殿下諺書之旨。便回啓曰。今日傳教。實出群情之外。不敢承命。臺諫戎使不聞。政院史館因秘。聖旨久不傳出。永慶有何陰謀兇計。不欲人知。乃至於此。噫。中殿塞淵之旨。深體殿下之意。爲國家遠大之計。雖古之高曹馬鄧之賢。亦莫之過。而永慶極力搪塞。無所忌憚。秘其不當秘之。聖旨逐其不當逐之元任。中外傳聞。輿情駭憤。噫。國事非一家之事。原任有與聞之例。臣不敢知永慶之使不叅知者何意也。國君有故。則二君之監國處守。古今之通規也。臣不敢知永慶乃謂群情之外者欲何爲也。臺諫不得聞。則非國政也。其事也。政院史館同爲秘密。則知有私黨。而不復知爲王事也。臣請嘗陳之。殿下深念宗社之重。劇量玉體之候。思以委諸儲君。就閑調護。聖明之教。公明正大。如青天白日。臣庶所當共聞。萬物可以咸覩。况以原任之臣。反不使叅知。其陰兇詭秘之狀。恣行胸臆之情。明若觀火。不可復掩矣。噫。永慶則固有奸矣。原任諸人亦豈得無失也。有政既

可與聞。則豈可聽永慶之專恣。默默被逐如群羊而已。凡有事。必使廣議於賓廳者。乃所以防權奸專橫之患。而畢竟如此。則將焉用彼相哉。至謂出於群情之外。則所謂群情者何所指也。若其私黨所不欲。則特以若干輩陰謀兇計。指爲群情。而欺罔君父之耳目歟。若以爲國人之所不願。則或傳或攝。以係人心。以定國本。而靜攝玉體。過召永瘳之慶。朝著搢紳之情也。都人士女之情也。海隅蒼生之情也。凡有血氣者之同情。而謂非群情。是顯有無君之心。而敢爲盍朝之鳴也。臣不敢知先蔽聖志。擇於諸子。正位東宮。非殿下之知子乎。懿仁聖哲。撫若己出。載在玉冊。非殿下之本意乎。大駕西幸。命使分朝。稱爲大小。委以監撫。百僚稱臣。非殿下之明教乎。命入侍病。念釋玆在玆。名言允出玆在玆者。非殿下之聖慮乎。世子入侍之後。中夜涕泣。露立禱天。致元聖請命之誠。非殿下之所知乎。凡此數段。無非聖衷之所眷。天日之所臨。國之所知。而永慶之携貳如此。是無二君也。反殿下也。玉體之疾。雖未全瘳。稍向平安。

亦世子誠孝動天之致。國人傳聞。莫不感泣。咸曰。聖上教訓之得其道如此。世子之仁孝格上下如此。聖父之有賢子如此。國家之保無窮矣。若以物情之多小言之。則傳攝調護之舉。國人之所同願。國人之外。復有群情乎。執其言而原其心。則異時將欲自爲彌遠。而濟王我東宮也。永慶於東宮。危疑之情已露。猜隙日甚。其自爲謀。宜無不至。殿下爲永慶能復以吾君之子視東宮乎。其勢將不止此。必售其奸計。得以甘心而後已也。竊意朝廷宜有請劔之人。自十月至于今。佇乎有聞。聞其無人。則方在要路者。無非永慶之私人。知有永慶而不知有殿下。寧負殿下而不欲負永慶。臺諫之不言。永慶之爪牙也。大臣之循默從患。永慶之羽翼也。政院史館之私秘。聖旨。永慶之腹心也。殿下股肱大臣。而大臣如此。耳目臺諫。而臺諫如此。喉舌政院春秋史館。而政院史館又如此。殿下孤立於上。而無蟻子之倚。有賢嗣。而將不相保。臣見賊殿下之父子者。永慶也。亡殿下之宗社者。永慶也。禍殿下之國家。臣庶者。

亦永慶也。噫誠使世子初不被擇而爲嗣。則亦一王子耳。曷嘗有動搖危疑之憂。至於此也。是則殿下始焉擇之爲嗣。終焉納之不測之地。殿下何有於一兇臣。而反不免貽禍於賢嗣也。宋高宗季世之中主。又無疾病之故。而擇宗室子晉安王爲嗣。因以遜位曰。付托得人。吾無憾矣。史氏特筆爲美事。君子稱爲堯舜之禪。今世子之爲權攝。以親則誕生之子也。以人則仁孝之德也。以時則玉候之未豫也。以誕生仁孝之子。因不豫之日。而有傳攝調護之命。則爲大臣者。所當將順之。猶恐不及。乃反包藏禍心。喚私爲公。謂非群情。是可忍也。孰不可忍也。况向在寇亂之中。小朝南下。撫軍監國。久係一國之望。大駕反國之後。還位潛宮。前規已成。事理明正。今爲權攝。乃是昭明之舉。了無纖芥之疑。而永慶誣罔沮抑。箝制陰喉。專恣脅逐。一詢目而爲前古所未有之事。兇浮安老。道路以目。將有不忍言者。此正所謂蔓難圖也。抑永慶之有此舉措。欲以媚悅殿下。爲固寵專國之計耶。此在庸君昏主之時。則固可逞也。殿下之乾

剛無私不勝。殿下之高明無幽不燭。而乃敢如此。臣竊惑之。苟非愚妄。恐有所懷也。臣聞易曰。不過防之。終或戕之凶。伏願殿下深惟宗社之計。更鑑前代之轍。審察奸兇之情。防之益嚴。而不慮其或過。亟舉永慶動搖東宮謀危宗社之罪。一正常刑。使繼恩昌齡之奸。不得更作於他日。以固國本。以幸宗社。爲億萬年無疆之休。如以臣言爲過慮。則先加妄言之誅。以快奸黨之心。則臣得罪於聖明之下。而不死於永慶之兇禍。誠所幸也。非所懼也。臣固知自古直言權奸之罪。如張綱之劾奏梁冀。胡銓之請斬秦檜。俱被陰中。爲禍甚酷。竊念古人於隣國弑君之臣。雖已告老。猶得請討。况在本朝。反君誤國之兇。豈合以身在散地。而緘口齟舌。辜負聖明。甘爲不忠之臣。自干天地鬼神之誅。殛也云云。時北警危急。擬大舉武科。定本月二十二日開場。嶺右士子等陪此。○柳永慶陳疏曰。伏以臣伏見疏上京連日留門仍致紛擾退定科期前叅判鄭仁弘之疏。狼藉辭說。專以臣動搖東宮謀危宗社爲目。橫加惡名。無所不至。人臣遭此窮天之冤。極地之痛。若不明白。卞別於天日。

之下。則生不得自立於人世。死不得瞑目於地下。豈敢以煩瀆爲嫌。而不盡其痛迫之辭乎。伏願 殿下垂察焉。上年十月。自上感傷之瘳。遽發於久攝之餘。群下罔知攸措。其時臣以藥房提調。方在差備門內。政院傳以 命召三公之教。旋有密符之下。臣與左議政臣許瑒右議政臣韓應寅。合符之後。待 命於差備門外。俄而政院傳言。退待於賓廳。臣與左相詣于賓廳。則原任大臣已不在矣。臣等奉承傳攝之 教。竊伏惟念蒼黃之際。特有此 命。其爲 宗社大計。蓋鞏根本之圖者。出尋常萬萬。臣等非不知將順 聖旨。而第自上不得親御萬機。纔一兩日耳。偶感之瘳。自當勿藥有喜。一日二日。庶幾乃瘳。顛顛群下之望。惟在於此。而 內旨遽下於此時。回 啓中所謂今日之 教。出於群情之外者。實爲此而言也。況 王世子聞有此 命。急遑之中。益增悶迫。廢食流泣。不知所爲。凡在臣庶。孰不爲之感動乎。臣等之不能遵奉者。曲折如斯。而今其言曰。揮斥原任大臣。使不得叅看。累上防 啓。獨與時任共之。臣等未至賓廳。原任

大臣已出去。則所謂揮斥者。臣實未曉也。自上既命召三公。臣等又勸三公 命召之符。其時回啓之事。當在時任。故臣等相議回 啓。而其備忘及啓草。注書例爲持去。其後臺諫之聞與不聞。非大臣之所與知者也。王世子聰明仁孝。出於天性。毓德春宮。十有七年。臣民之所共戴。宗社之所付托。儲任素定。國本已固。而仁弘乃敢假托傳禪之事。陰圖嫁禍之計。故作兇慘之說。無所不用其極。一則曰携貳如此。一則曰猜隙日甚。一則曰兇謀秘計。一則曰謀危之計已露。至以爲賊 殿下之父子。其言之兇慘誣罔。非但不忍言。亦所不忍聞。仁弘之爲此說。未知所指者何意。所稱者何事也。方今 聖明在上。元良在下。止慈止孝。兩宮歡洽。王季文王之爲父子。無以加矣。仁弘乃敢以無形罔極之言。只欲構捏臣身。而不知自陷於窮兇極惡之地。其計慘矣。而其心則妄也。彌遠宋之賊相也。而仁弘比之於臣。構陷之狀。可謂極矣。而至舉濟王之事。疑之於不敢疑之地。其心所在。尤不可測也。大抵臣與仁弘。素無纖芥之嫌。只於壬辰年間。

暫挾小憾。仁弘雖老妄。亦豈以此構陷臣。至於此極也。此必有所以然之故。而臣亦莫究其端也。臣猥以久防賢路。罪戾山積。前後遭謗。非止一再。而唯思反咎。未嘗自別。今之被誣。非但禍及一身。實是係關宗社。自有此疏。心骨俱驚。肝胆摧裂。席藁待罪。而數日已過。刑章不加。人臣負此惡名。一日未雪。則是一日悖逆之臣。不得不籲呼於聖明之下。伏願殿下。察臣自效。推覈實狀。以正臣罪。以謝人言。國家幸甚。臣不勝痛迫戰慄之至。謹昧死以聞。○玉堂筍子。臣等伏見前叅判鄭仁弘之疏。以領議政柳永慶。動搖東宮。謀危宗社。爲罪案。不但構陷搢紳。至於語涉君父。許多辭說。極兇極慘。有非人臣所忍聞者。臣等自見此疏。肝膽欲裂。不知仁弘果聞之道路。而有此說耶。抑聽人指喉。而爲此謀耶。嗾仁弘之心所在。臣等雖不敢知。而槩以疏中之辭。叅以臣等所覩者而言之。上年十月初九日。自上感冒之瘵。遽發於久攝之餘。大小遑遑。魂魄俱失。咸造在庭。無復朝議。越二月十二日。有命召三公之教。繼有密符之下。其時

領議政柳永慶。以藥房提調。在差備門外。左議政許瑒。右議政韓應寅。與諸大臣。會于賓廳。承命合符之後。三公會于差備門外。政院又以三公。往會賓廳之。教傳之。則三公未離坐。召錄事先以下來告之。則原任大臣。或欲避入西邊壁後者。或避出備邊司者。即出備邊司。而三公到賓廳。則原任皆不在。傳攝之。命必下於此後。則彼疏中所謂揮斥盡去。使不得叅看者。果何說乎。當時命召者。只時任大臣也。傳攝之。命既下於時任。則回啓之際。獨與時任相議者。理所然也。彼疏中獨與時任共之者。亦何言也。此則臣等時在闕中。耳所聞目所覩者然也。至於疏中以累上防。啓爲言。臣等尤不勝痛憤焉。聖候違豫。久在調攝。軫念萬機。之或曠。益懋宗社之大計。有此傳攝之。教。此雖出於聖上鞏固根本。鎮定危疑之盛意。而以臣子至情。豈可安於心而遽爲承順乎。是以當其命下之日。非但大小臣僚莫不憂遑悶迫。至於王世子。下令于講院。曰。罔極未安之。教。又下於今日。予懷之悶迫。曷有極哉。惟願師傅賓

僚盡心竭誠。與百僚協同籲呼。必以回天爲期。此意往諭于師傅。期於回天而後已。此則非惟臣等所聞。臣光立忝在宮官。以此往復於師傅。下令之事。亦在於講院日記。則世子之牢讓傳攝。非出於至情乎。以此觀之。則大臣之防啓。亦出於此。而回啓中所謂出於群情之外者。世子之情。亦其一也。彼仁弘執此而爲辭。不亦痛乎。彼疏中又以政院史館秘聖旨不出爲言。此間曲折。已盡於政院之啓。史館之疏。則此豈永慶所知者乎。今方聖明在上。元良在下。慈愛極矣。誠孝至矣。兩宮之間。和氣藹然。况我王世子。正位春宮。十有七年。人心已屬。天意已定。册命未降。而皇勅累下。天朝之所共知。宗社之所付托。孰敢有異志於其間哉。今者仁弘之疏。求所以構陷永慶。而不知其陷於動搖。君父離間兩宮之罪。其計則巧。而其意則妄也。噫。聖上之慈愛既如此。世子之誠孝又如此。雖使百仁弘交亂。豈有因此致說。而有間天理乎。大抵仁弘遠在千里之外。豈但聞之道路而爲此無形不測之說乎。其間必有所以然

之故。柳永慶作相七年。爲失志蓄憤者所疾怨。

乘時抵隙。欲一

傾陷者。非一朝一夕之故。始焉載寧之獄。中焉聖壁之榜。終焉藥房之事。竟不得遂其奸謀。今乃拈出啓辭中一段。做作無根之說。傳播中外。假仁弘之手。陰試鬼蜮之謀。又嗾挺元之輩。有若子之論。而雄唱雌和。表裡相應。上惑天聽。下擾人心。必欲嫁禍於不測之地而後已。向使此輩得遂其計。則其禍豈止於空國而已乎。幸賴聖明洞燭奸狀。一則曰。群小之中。欲陷領相者。做作訛言飛語。以播於南中。一則曰。不獨傾領相。一時臺諫侍從。盡歸之罪網。一則曰。奸人含沙射影之計。無所不至。語涉君父。此真無君叛逆之罪也。至於答挺元之疏。聽人射影之嗾。聖教及此。豈但一國臣民之福實。宗社萬世無疆之休也。奸兇之膽。已墮於冥冥之中矣。但聖教夜不能寢。晝則不食。此則雖出深惡痛疾之至意。而自上方在靜攝之中。遽有如此之教。臣等尤不勝憂悶之至。嗚呼。動搖東宮。天下之極惡。謀危宗社。天下之大罪。如仁弘。乃以此而誣告。固難逃

於常刑。而此特聽人陰喉。爲其發蹤者耳。管蔡流言。二公不卞。周公居東。罪人斯得。則今之罪人斯得。亦豈遠哉。抑臣等之所慮者。仁弘挺元之計。既不得售於天日之下。而未知前頭復有何等奸謀兇計。更出於千萬里之外哉。况北虜跳梁。春塲正急。宵旰之所憂勤。廟堂之所綢繆。而科舉之設。亦爲此也。四方舉子。雲集京師。而一自兇疏之入。上自宰執。下至臺侍。不安其位。氣像愁慘。至於科期再退。多士暴露。怨咨之聲。有不忍聞。臣等竊恐土崩瓦解之漸。非朝即夕也。伏願聖明深念宗社之重。益明好惡之辨。痛絕奸人。以安朝廷。亟行科舉。以鎮人心。國家幸甚。朝廷幸甚。○備忘記曰。鄭仁弘欲令世子速受傳位。其自爲謀。則自以爲於世子盡忠。而其實則不忠甚矣。諸侯之世子。必受天子之命。然後方可謂之世子。今世子未受册命。是天子不許也。天子不知也。一朝遽受傳位。萬一。天朝詰之曰。汝國之所謂世子。天朝未許封。而汝王私自傳位。汝王之職。亦天子之職。非汝王所自擅便者。世子亦何敢私受。無乃

中間有所以然之故耶。橫加不測之名於世子。而詰問大臣。則將何以結末耶。予則特因一身之悶欲退。而大臣謀國。豈可不爲周遍。此豈躁妄人之慮哉。大臣豈但以許退舊君爲不忍而已乎。今因仁弘之疏上。而予心不安。夜不能寢。晝則食不下咽。而大臣臺諫皆不安其職。可謂無前之大變矣。政院知悉。○命嶺南呈疏士子等下獄。竄鄭仁弘。安置于江界。又以李爾瞻李慶全等陰喉仁弘。並遠竄。○遣陪臣柳澗。將奴酋情形。具由奏聞。聖旨著遼東撫鎮官。選差的當員役。宣諭奴酋。各守邊疆。毋相侵擾。出攷事

二月初一日。宣宗大王昇遐。在位四十二年。壽五十二。今上即位。遣陪臣李好閔。告訃于天朝。因奉表請諡。又具王大妣奏本。請承襲。出攷事○以李元翼爲領議政。李恒福沈喜壽爲左右相。召還鄭仁弘李爾瞻李慶全。加仁弘資憲。拜漢城判尹。李爾瞻等皆拜官。削奪柳永慶等官職。因命安置永慶于慶興。金大來于慶源。李弘老于大靜。李孝元于巨濟。成俊耆于南海。

緣坐甚多。○十四日。掌令尹讓持平閔德男獻納尹孝先正言李士慶任名不詳。○臨海君珪。久蓄異志。私藏軍器。陰養死士。自上年十月。大行大王違豫之時。非但多聚賊黨。亦多締結名將。召集武士。日夜潛圖不軌之事。國人所共明知。及至賓天之日。未發喪之前。公然出去其第。移時後始爲奔入。情跡綢繆。顯有指揮兵家之狀。今在咫尺之地。托以營造。鉄椎環刀。裹以空石。多數入之。不測之禍。迫在朝夕。請存宗社大計。亟命大臣兵曹。從速處置。流之絕島。以全聖上友愛至情。以定中外群心之危懼。答曰。予兄豈有如此之理乎。予見啓辭。不勝悶泣。問于大臣而處之。備忘記。國家不幸。有此公議。同氣之間。罔知所爲。徒自痛哭而已。先王遺教。丁寧在耳。予不忍負也。諸大臣商議善處。務爲保全之計。幸甚。鵝城府院君李山海。領相李元翼。領府事李德馨。沈喜壽。李恒福。許頊。韓應寅。啓曰。流之絕島。此乃保全之至意。斯速處置宜當。答曰。流之絕島。不忍爲也。而已爲出去。堂上武將擇差。率軍守其家。以防意外之事。○兩司

再啓。請流珪絕島。不允。又啓。高彥伯朴名賢。陰蓄異志。請速拿囚。命拿鞫。○副提學宋應詢等。連三劄。請流絕島。答曰。問于大臣處之。○兵曹啓曰。珪即刻以衣裏面。如婦人樣。負於人出去。本曹郎廳望見而覺。急急追尋。入置門外。備邊司定將圍擁。答曰。知道。已言于三司。○十五日。禁府啓曰。定配議大臣李山海珍島爲可。但固守防守。俾絕民害。嚴其津渡。以其國疑。李德馨。李恒福。喬桐亦絕島。無關遠近。因念珪悖亂放縱。旣聞之熟矣。謂之異謀。則姑未得其詳。放之不齒。已嚴公議。思以安全合申私恩。倘水土霧露。震撼驚憂。守臣不謹護。藥餌無所及。使聖上友愛之情。長抱無涯之痛。則豈非有司之罪乎。今計置之官家近地。豐其餼資。免致困乏得矣。賢相此議真是愛君之誠。豈知判府事奇自獻議。送其衣服妻妾。使之相倚爲生。傳曰。依議施行。○二十日。臨海珍島之行。已過湖西。傳曰。定配南方未穩。急遣宣傳官。移置喬桐。

三月。大司憲鄭述伏以。臣草野微蹤。性本愚陋。學又空疎。重以疾病沈痼。

昏鬪癘廢。不齒恒人。幸而遭逢大行大王。拭拔任使。隆恩盛眷。極天靡窮。緣臣筋力不逮。退伏居多。前在安東。亦以病去。常念 聖恩如天。臣罪如山。惴惴憂懼。食息不寧。不謂一國臣民。舉皆無祿。弓劍遽遺。慟纏幅員。其在微臣。殞割偏深。不計顛赴。扶曳寸進。僅得上來。既伸望 闕之哭。又得祇謝嗣服之下。老病濱死之身。情願已遂。退死何憾。第惟總府 恩命。病難勘冒。呈告政院。未及上啓。而霜臺異 恩。忽出於千萬思慮夢寐之所不及。驚惶震惕。手足顛倒。此非獨臣心竊自恠訝。四方遠近。莫不咤異。以爲名實不稱。舉措乖當。則豈不深爲新政之羞也。臣之庸駑無狀。臣實自知。臣不敢虛飾仰誣 天日。亦滿朝人人所共灼知。而不敢諱也。頃日 聖教之下。人莫不感悅傳誦。以爲一言興邦之慶。而賤臣姓名。猥玷其間。繼又有此非常之命。在臣榮幸。誠爲不世之遇。而其奈辱 聖上簡擢之明。犯惟帝其難之戒。實由身何哉。臣固不敢自愛。而恐貽朝廷之累。所以憂惶悶蹙。不知所裁者也。且凡官除拜。必考解由。明在成憲。歷代世守。金

石不撓。在他庶僚。猶不可犯。况長於風憲。爲法所主。糾檢百司。觀瞻四方。其爲任責如何。先自壞了。將欲以抑非笑。而抗顏面明眼目。而論是非。臣誠知其決無是理也。方今 聖御初臨。梓宮在殯。逆變起於至親。覈處之際。必有恩義兩盡之理。元兇出於先臣。王法之行。當有緩急的中之宜。須得剛直平正。審微明理之士。主張一時之公論。使我 聖上盛德誠孝。極盡無憾。光映史冊。爲百代瞻仰。寧有如臣暗劣偏識。敢爲之犯禁叨冒。祇誤一時之事機哉。然臣之所陳。皆只論臣之分義。有所不安焉爾。至於臣之悶迫難堪之私。則又不得不爲之自列於天地父母之前。設使臣感激 鴻恩。他不敢計。惟思以奔走効力爲恭。而積病漸敗。擢頽莫振。蓋臣之所患非偶然。敢冒發於朝夕之比。臣年今六十有六。自少受氣虛薄。爲百病所萃之身。呻吟痛楚。未嘗有一日之安。未及五十。衰白已甚。今迫七十。枯悴轉劇。頑痰塞胸。則呼吸若絕。咳嗽遽發。則五內如翻。脾胃大敗。臍腹癘痛。腰脊之疼。肢節之酸。皆所甚焉。而此外煩不敢仰瀆者。證目實多。暫

接人事。百體俱病。神氣沈倦。昏昏瞶瞶。如不能終日。雖欲勉。其路無由。只合乞休歸田。銜恩待盡。臣用敢冒萬死。犯瘴疾。籲呼陳訴。仰伸悃悞。伏願聖慈。特賜矜察。亟命遞職云云。答聞卿久矣。今見疏。深嘉至論。顧予寡昧。遭此罔極之痛。又值無前之變。思與諸賢共濟國事。卿於此時。豈可以常規小節爲嫌而辭退乎。雖有疾病。調理行公。正色立朝。以振頹綱。初七日呈○領相李元翼五度呈辭。遣史官諭以出仕。疏曰。伏以衰朽無用之臣。遭逢不世之遇。殊恩異數。前後稠疊。內醫寶藥。晨夜看救。大僕煎粥。日復繼餽。乃又中使臨門。賜以肉物。因宣聖旨。反覆丁寧。繾綣懇至。不啻若慈父母之詔諭愛子。臣雖至頑。亦有寸心。寧不激昂奮發。思所以報效乎。臣之所大悶者。六七年來。久罹痼盲之病。僅延縷命於閑養之中。數旬勞動。舊瘡輒作。衰暮之年。無望更蘇。聖旨有曰。今後勿復呈辭。臣猶且連章乞免。煩瀆不已。則人臣分義之所不安也。不復連章乞免。而身帶重任。晏然久臥私室。則人臣分義之所不堪也。雖使出死力。曳載趨朝謝

命。而謝命之後。公廳之會。一向稱病。則亦人臣分義之所大不敢也。以彼以此。俱不得其當。臣之情事。狼狽至此。兢惶跼踖。不知所以爲計。況今逆獄方起。事體至重。臣忝首相。久未叅鞠。人臣分義又何如也。伏聞近日被鞠各人。或有言其不軌之事者。雖未得其曲折之詳。而聞來不覺髮豎而體粟。獄起於至親之間。以殿下天至之友愛。其憂傷慟迫。宜無所不至。恩義兼盡。必已有定筭。此則臣不敢有言。至於徒黨之逆狀顯著者。則當按律處之。尙何議爲。但念崑岡之火。玉石俱焚。大獄之下。冤死者必多。蓋以罪名甚多。推事甚嚴。連逮之人。逐名議鞠之際。或有事狀之不甚明白者。推官雖心內疑之。而旣不得明知其必不然。故亦不敢遽請平反。倘非自上。因罪求請。因情議罪。開闔於常格之外。則無辜之人。可免陷於刑獄。刑杖一加。終無生理。豈不惻然。殿下自在潛邸。仁心仁聞。播於遠近之民。仰殿下愛人好生之德。積有年矣。茲當嗣服之初。恐有匹夫匹婦之橫罹。敢以此爲說焉。古人云。以恩遇之。故而效忠者。中人以下者之

所爲。臣是庸人。平日所養。本乏忠節。今以瞽說。欲效忠於殿下者。亦無非恩遇激之使然也云云。答。見卿劄辭。深嘉誠悃。予於哀疚之中。遭此無前之變。恩義輕重之際。固知攸處。今則端緒已出。辭連之輩。不可不問。然當與大臣議處。卿可安心善攝。待差以出。日呈○備忘記。大臣與國同休戚。而呈辭相繼。氣像不好。未知有何所失。而得罪於諸大臣。政院宜知予意。匡救其失。日下○鄭迷伏以。臣迂愚癡病。衰悴已劇。唯思待盡溝壑。不勸齒錄朝端。何意蒙被大遇。遽加擢拔。置之臺列。累控辭免。異恩愈隆。環顧慙懼。心膽如隕。今既累日。憂迫轉深。夜不能交睫。食不能下咽。臣學無所得。無以上補於聖德。性亦踈謬。動輒舉措乖常。重以舊疾。日益增重。常在痛楚之中。精神形骸。日益漸敗。將至於不可以支吾。決不得終始自力。以遂畢忠之願。臣之狼狽窘蹙。亦已甚矣。伏願殿下。特諒臣衷。使之得免死歸之願。則至治之下。庶無一夫不獲之憾。此臣之所以激切祈懇之至情也。惟是區區愛君之心。終不能自禦於狗馬之誠。欲望殿下。

萬善俱備。一疵不存。此實出於赤誠如火。不敢誣也。且殿下之寵臣。非所以私臣。必以山野愚戇。隨事列陳。無所顧忌。則臣豈敢有懷隱默。以孤殿下之望哉。殿下方煢煢在疚。而又值此前古罕有之變。雖出於事係宗社。有不得已焉者。而臣伏想殿下之私。則先王眷眷之末命。常耿耿在耳。悶悶皇皇。夙夜靡寧也。臣連日得叅推鞠之末。竊觀獄情。連累多濫。時日遲延。何由審克制中。以彰聖朝明允之理乎。且其逮繫。亦多宗戚之臣。未畢按詰。經殞杖下者相繼。如果有與謀之實。而罪合顯戮。則其不得取服。固已爲失刑矣。或不及知情。而間有含冤就死者。則彼雖有親疎之間。而實分宗社氣血之一脉。或因風聞。未出賊口。締結詭秘之跡。亦未盡發。此亦豈不深可傷哉。殿下毓德春宮。至仁之聞。敷暢四達。登御之初。遠近延頸。莫不欣欣然如將飢而待飽。將寒而待溫。今日累然羣囚。亦皆其類。而至澤未蒙。冤爵先結。則新化之下。亦一不幸也。伏願聖度留神焉。臣竊聞巷議。臨海不軌之圖。已盡敗露。而徙處之後。自

內時遣存問。賜衣賜食。所以施友愛之至仁者。迥出千萬。夫臨海既已自絕于天矣。而聖上之所以待之者。乃如是。傳聞所及。興起激勵。以爲彝倫之大補者。何可量哉。往在中廟朝。因王子之變。獄起不測。仁宗大王時在儲宮。憂遑悶迫。陳疏乞解曰。天顯之親。一氣而分。喘息呼吸。相爲流通。友愛之情。自不容已。雖有非常之變。出於慮外。而古之人。猶有以恩掩之者。又引孟子之說。以爲兄弟之間。不藏怒焉。不宿怨焉。兄爲天子。弟爲匹夫。可乎。民間至今傳誦。今日聖上之處之者。暗與同符。豈非前聖後聖同一揆也。漢文帝時。淮南王長謀反事覺。赦徙蜀。袁盎曰。早逢霧結病死。陛下有殺弟之名。帝曰。吾特苦之耳。未幾長果死。帝哭甚悲。臣常恨其不早聽盎語也。聖上同氣之中。與之同胎。只有臨海。先嬪早世。兄弟二人。零丁同長。寢食不相離。臣知殿下至懷。尤有所不忍焉。而自構大孽。罪窮天壤。仰貽殿下憂哀迫切之痛。此臣所以心益腐而腸欲裂者也。伏念叅酌恩義。變通善處。豈無其道乎。唯在殿下深思。不以公盡

法之義。公聽達聰。益昭中正之德。命推鞠大臣。勉加明慎。獄不必盡究。人不必盡問。罪不必盡覈。法不必盡施。寧有不經之失者。存乎其間。而臨海亦蒙不死之貸。涵濡大恩。以畢其生。則光武之反側自安。而文帝之尺布斗粟。無復謠於今日矣。舉國臣民。咸仰大聖人處變之無憾也。以爲聖上之友愛如此。聖上之至仁如此。聖上之處難如此。聖上好生之德。出乎尋常如此。人心洽然。四方咸悅。史筆書之。後世則之。豈惟爲新服收拾人心之至要乎。抑可以上慰先王在天之靈。亦有以仰答近日天心仁愛之警。豈不幸甚矣乎。昔者漢明帝治楚王英之獄。因侍御史寒朗之疏。惻然意解。以致天旱之雨。愚臣感激不世之恩。恐無一言而去。敢於乞退之章。披肝瀝血。妄達無諱。伏冀危慄。仰俟鈇鉞之降。答不幸遭此天倫之變。日夜疚懷。罔知所爲。從當議處。毋庸固辭。○備忘記。予以薄德。遭此天倫之變。屈法伸恩。當有自出之地。今之論議。似爲亂倒。俱有後弊。政院知悉。○河大謙等承服就戮後。癸丑錄翼社功臣許箴

等四十八人。○新授資憲大夫漢城判尹臣鄭仁弘誠惶誠恐頓首頓首。謹齋沐百拜。上言于 主上殿下。伏以上天降災。大行大王奄棄臣民。殿下方在憂疚罔極之中。而莫大之變。又起連氣之人。伏念 殿下未勘多難。傷痛尤甚。集蓼之悶。臣庶所同也。臣以言事得罪。命竄西陲。臣聞命登道。剋期趨 命。第以衰朽已甚。癘病亦劇。扶曳前進。不免引日。淹滯日子已多。行路不遠。遲違 上命。罪當萬死。而行入畿內。雷雨遽下。臣驚惶感泣。無以爲心。臣雖衰病。竊欲奔哭 闕下而歸。故寸寸而來。未及都下。特命又下。授以本職。臣感懼之極。撫躬環顧。不知所由。臣叨被 先朝收用。了無涓埃之補。殿下嗣服之後。又無夙夜之勞。而超陞之 命。乃至於此。此臣驚恠踏踏。不能自定者也。臣聞古人於君臣之際。知無不言。言無不盡。必如此然後。情義洞然。上下交孚。臣請以區區微末之情。仰塵天日之鑑。伏願 殿下垂察焉。臣於 新命。不敢供職者。有三焉。臣伏見。三司之請宥臣罪。以伸公論爲急。殿下之快下俞音。以從國是爲重。

而因陞以高顯之秩。區區之身。獨不以全私義爲念乎。臣自被竄 命。日未過期月。行未半謫所。而旋蒙 赦宥。是誠 殿下軫臣衰病。性命或斃於道路。天地罔極之 恩。臣何敢形容於頰舌間也。然負罪之身。得免死歸足矣。遷謫之行。不遠而復。亦幸矣。獨念成命近在新月。梓宮尙在殯殿。而臣抗顏於鷓班。若初無罪咎之人。則誠荷 聖明洞照昭雪之恩。在臣區區分義。豈得自安於心也。臣於新命。不敢供職者。此其一也。竊聞。臣前上一封。誠未動天。辭不達意。天威震動。教辭甚峻。使 殿下亦不自安。若無所容。閭巷傳聞。不勝藉藉。臣驚懼哽塞。涕淚自下。臣求所以安國本。而適足以危之。是實無功而有罪。况可有超叙之典乎。與臣同被竄 命。如李爾瞻李慶全等。平生或僅有一見之知。或全無面目之分。而被構於形影之外。俱陷於不測之禍。殿下赦宥之。官爵之。固其宜也。若臣則豈合與二人同歸於無罪乎。魯仲連一言而有功。猶不肯受封爵。今臣以一言獲罪。以罪媒爵。臣雖無狀。獨不愧於心乎。誠使 先王嘉納臣言。得有

今日而爵命奄加。猶有魯連之恥。况有罪而受爵。庸非可愧之甚者乎。臣於新命。不敢供職者。此其二也。臣聞孔子之言曰。甚矣吾衰也。後賢繼之曰。行道者。身老則衰矣。聖人且不免老衰之歎。况庸衆人乎。臣年踰七十已久矣。往在壬寅年間。嘗被召命。黽勉供職。已不堪任。固請退去。自壬寅年以來。又七年于茲矣。垂老之人。月異而時不同。一年甚於十年。今以七年前所不堪。而責任於七年之後。決無可堪之理也。况先王之制。七十而致仕。爲仕止之大閑乎。然此時設大閑以示人耳。士君子仕止之義。宜不拘於此也。况年踰七十。加以病廢者乎。如此而猶復冒昧。則此誠舍龜朶願。得罪於聖賢之門也。臣雖無狀。豈不知自愛也。臣於新命。不敢共職者。此其三也。臣負此三不勤。而猶復濡滯供職。竇直取爵。跡涉干澤。則恐殿下亦未必不疑其心也。臣筋力固不能供職。分義亦不合少留。然臣豈合終無一言而去。孤負聖恩。抱無窮之恨也。嘗聞易曰。幹父之蠱。有子考無咎。孔子曰。幹父用譽。承以德也。書曰。知今我初服。凡人君追

孝之道。不全在哀痛哭泣之間。實在於幹蠱之盡其義。祈天永命。繫國勢於苞桑。壽宗社於億萬年。然後方得爲大孝矣。然則幹蠱致孝之要。顧不在嗣服之初乎。今殿下時乘御天。初嗣曆服。天神之眷佑方新。民庶之漸向方切。此正日進聖德。惟新政教。上當天心。下副人望之秋。即孟子所謂。雖有鎡器。不如待時者也。臣伏見近日聖教。所先者用人之術也。所急者保民之政。外攘之務也。中外歡欣。再見堯開舜闢之天地。殿下乘勢有爲。事半而功倍者。蓋無復加也。然臣聞學者殖也。伏願日進聖學。滋殖本源。使德可久業可大。然後其及者愈遠而無窮矣。臣伏見六經之書。無非帝王圖治之術。其中本末兼備。綱目俱舉。爲諸經貫串者矣。如大學一書。而明德新民之要。開卷了了。特在殿下。着實躬行。不以聲音笑貌爲而已也。如此而朝廷總攬權綱。選任大臣。勿貳勿疑。舉直錯枉。而朝廷正。朝廷正則浮薄躁進之徒。嗜利蔑義之輩。不能側於其間。屏跡自遠。而四分五裂。億萬其心之習。庶幾少革。而平蕩正直之風。庶幾得見。明

德明於一國。允升大猷。如車推而輪自進。船發而纜自行矣。殿下方在憂疚中。而臣亦病不能毛舉餘事。畧陳梗槩。殿下誠能留意。以幸我東國。熙萬世之鴻號。則是臣留一言。爲盛治之具。不猶愈於以老醜之身。虛拘都下。將不免獻身之誚乎。如此則不獨臣之幸。實朝廷之幸。宗社臣民之幸也。伏願殿下垂察焉。批省卿陳疏。忠欵至矣。予當體念。卿讀書林下。高風蓋世。先王眷遇之意。已著於鳥獸草木知名之教。頃日之事。豈先王之本意哉。顧予昏庸。叨承大業。遵先王之志。圖任舊德。卿於此時。豈忍愒然不爲共貞之計乎。雖有疾病。善攝行公。勉留朝右。以輔寡昧。○鄭仁弘因下嶺南。遣禮官追挽。教曰。始聞卿來詣闕下。雖在哀疚之中。心頗傾慰。思與卿共濟艱危。而不俟終日。渡漢以南。眇予一人。不勝缺然。無以爲懷。卿山林月長。學問功深。清名直氣。爲一世所推仰。自我先朝。眷遇特隆。綸綍之音。宛如昨日。卿尙記否。念卿疇昔。身雖退處。心罔不在王室。其在今日。果於忘世。飄然而去。無乃國事爲無可奈。

何。寡昧爲不足與有爲。而長往不返者乎。予甚愧焉。予雖不足久稽天下士。古人有追先王之殊。欲報於後嗣者。卿獨無意於斯也。此誠何時。棄予如遺。茲遣禮官。以踰予意。幡然而來。副予渴望。○鄭迷啓。昨日臣以所患賤疾甚重。敢告政院。適持平李爾瞻辭單先已入啓。故還送于本府。命牌之下。未得起動。不能親承聖教。不勝孤負之至。且臣本踈愚。不識事體。唯有愛君一心。出乎本性。蒙被殊遇。感激忘身。深思納君於無過之地。敢將悃幅。於盡陳無諱。伏見備忘傳教之辭。臣不可仍冒執法之官。請命罷斥。答。偶然言及。安心勿辭。○領府事李德馨。伏以臣本庸陋。蒙被先王渥恩。二十有九年。生成之惠。報答無路。誓以一死徇國家之急。此臣之素所畜積也。弓劔忽遺。攀號罔極。而殿下以重离繼照。御極當天。萬物咸新。欣若更生。臣之蠢愚。思欲以未及報於先王者。移效於殿下。以畢其送往事。居之至悃。豈有量哉。茹哀銜感。夙夜耿耿。適仍狗馬疾急。委頓不起。廢仕移告。只俟嚴譴。乃蒙天地至仁。曲加軫念。旣降溫諭。

繼以醫藥。感激惶恐。涕淚自零。抑臣所患。發於積傷。寒熱交戰。逐日無減。大獄方殷。久闕參鞫。席藁私室。無所逃死。伏見二十二日下政院之教。心魂駭喪。隕越罔措。即欲扶曳。埃罪瘡痛。方苦震悼。沉眩益以靡定。黽勉而作。既失趨謝。有懷含默。又乖無隱。則從前願忠之志。進退無所據矣。茲敢力疾剝肝。以達其一二。伏願 聖明垂察焉。前在 大行大王昇遐之時。臣等承 命入 御寢。伏見正終受遺之義。嚴截明白。欽服而退。在外廷聞或有過慮之說。竊自訝焉。及乎扈衛久不撤。而外間頗疑臨海。臣私謂臨海之愚悖。國人所知。依順和君例。已安置于外。而武士交結王子者。顯有大明律。宮奴爲害民者。誅戮無惜。先事善處。 啓撤兵備。何不可之有。去月十四日入賓廳。與領議政李元翼等。座間語及此事。而已三司密啓。命下賓廳。夫肆狂縱。悖亂。招無賴。宗室武士。而作射契。聚頑悍。叛奴白徒。而爲私養。多集銃劍弓矢。攘奪奴僕貨利。恣行不義。而歛怨於國家。其爲逋逃主。而招不測之說。則至上年十月而極矣。苟有聞者。孰不爲

竦然。但當 聖上嗣服之初。干係至親之變。有難遽處。而今乃發矣。此事既發論。則邦有常刑。難以親私之。况其類之縱臾者。得情致辟。尤不可少緩。第肆之平日爲事者。狗馬玩好也。貢物方納也。射獵遊燕也。以王子之尊。有要於此。而請一見。則宗室武弁無知無識者。誰不以一見肆面爲榮。幸而樂赴哉。若此之人。則未必盡爲叅知逆謀。而辭語一逮。終無以審克。傍觀之徒。疑懼重足。宗室武士人。不知自保。亦可慮也。且各道投稱宮奴者。其類極多。今盡破家亡命。倘相聚山谷。則其患非細。害民之甚者。題名購捕。按法訊誅。以快民心。其餘罪不至死者。掛榜諭集。毋令久逃可也。當此萌芽生長之節。庭鞫久設。號哭載路。人心似沮。除端緒已出。承服應斷罪者外。不緊被逮者。速命議處。則舉國咸抃。祝於 聖德矣。伏聞肆之赴配所也。自上遣中使慰問。逮至喬洞。連賜饋遺。肆自絕于 殿下。而殿下益敦天倫之愛。凡在聽聞。莫不感泣。往年柳船三省之獄。外廷有未安之說。諸臣狼顧。莫敢開口。臣竊自憂。懣以爲事。苟大於此者。將靡然設

一言耶。乃敢冒進妄言。幾死於肆之手。臣於彼時。但愍舉朝愛薄於君父耳。今外間多以此獄連逮。漸濫爲慮。而無一人盡言。臣竊恠焉。抑又惟念妖邪鬼物。跳踉昏夜。大陽中天。盡爲屏滅。雖有乘暗而作陰謀者。今則破膽效死之不暇。有何慮乎。周成王之喪。召集諸侯。兵衛甚嚴。此蓋召公畢公懲三叔之變。而布置周密。以大鎮人心者。若久爲此舉。則反以召疑矣。行宮扈衛。經月猶設。非但觀瞻未安。貧寒軍卒。裹飯久直。或蓄怨咨。毫有民怨。則其損於新政者大矣。諒賜米布。以慰其勞。斯速罷撤。以安衆心。凡人疑則懼心萌。懼心生則防患之計勝。輾轉差誤。小人乘間。則末流之禍。終至滔天。深可懼也。頃日天乃雨土。雨草。實雨雹。又出流星。白氣之變。上穹仁愛。所以警告。殿下者。至深切矣。魏相明堂奏有曰。春興兌治。則饑。夏興坎治。則雹。禮記月令篇亦有行令于時之失。伏願 聖明深省焉。全恩臣伏見周頌成王免喪。朝廟作閔予小子之詩。其詩曰。閔予小子。遭家不造。熒熒在疚。於乎皇考。永世克孝。念茲皇祖。陟降慮止。維予小子。夙

夜敬止。繼序思不忘。成王喪畢。延訪群臣。作訪落之詩。其詩曰。訪予落止。率是昭考。於乎悠哉。朕未有艾。將予就之。繼維判渙。維予小子。末堪家多難紹。慮上下陟降厥家。休矣皇考。以保明其身。成王思慕武王以圖繼述。此二詩懇切反覆其意。無窮深味。其夙夜敬止。繼序思不忘之句。則成王之敬。無一刻懈怠。故能繼武王永世之孝。事先則此敬著於陟降之時。事天則此敬存於對越之際。敬之一篇。又述群臣之戒。而深發其義。內而力學於己。外而求助於臣。以盡其敬。想其喪畢而敬如此。則當喪而盡誠孝者。必至矣。聖人謂。居喪敬爲上。哀次之。瘠爲下。况帝王之孝。異於匹夫。蔬水哭泣。小禮細節。非所論也。推愛親之心以愛人。而無所疾惡。推敬親之心以敬人。而無所慢易。愛敬盡於事親。而德教加於民。此人主之孝也。事親如事天。事天如事親。薰爲太和。養有群生。此人主之孝也。斷一樹以時。殺一獸以時。推不忍之心。而施之親親。仁民愛物之間。此人主之孝也。敬則必孝。孝則必仁。以至一家興仁。一國興仁。皆此孝之效也。大喪未經卒哭。則群

下之所當議者。唯喪禮而已。山陵而已。保護聖躬而已。矧在於二十七日之前乎。殯寢未冷。哀疚方劇。殫論政事。逐日頻煩。臣竊傷之。而況聖明於經年嘗藥之餘。哀毀太過。玉體清羸。調攝方急。假有罪關國家者。叅酌公議。一時論啓可也。今日論一人。明日論一人。又明日論一人。啓章上疏。紛沓於政院。連惱睿覽。恐致心慮不寧。臣竊愍之。進言亦有所宜。如先朝之失政。盡諫於大行大王之時。則爲可矣。到今言之。是不忠也。謀危請封。發語於鄭仁弘遠竄之日。則爲可矣。到今言之。是希望也。處事幽闇。自附效忠。則是利身而賊君也。請罪權臣。出於相識。則是前附而後賣也。凡士之患得患失者。唯以好官爵爲念。懵學蔑識者。唯以隨時論爲是。不計事體。不顧廉恥。不擇是非。權勢所在。蹇裳爭赴。搏擊將作。攘臂爲功。朝廷之累。因此多矣。深恐日後。又有以殺戮導殿下者。伏願聖明深省焉。謹喪禮審邪說爲治之具。莫先用人。拭目更化。所係爲大。頃者下教銓曹。勿論彼此。唯賢才是用。士無不鼓舞而願立朝矣。第數年以來。

時事日非。逢迎揣摩之習。赴附攀結之態。積痼難醫。倘非乾剛快斷。痛革前弊。則情僞易眩。偏黨難祛。絜矩而得其平。豈不難哉。且樸直盡忠者。其言易厭。便佞多才者。其言易合。用舍倒置。例由於此。必慎世之人主。明觀公聽。使輿論無壅。端本清源。邪徑不開。天君湛然。鑑明水止。臨下燭物。不爽毫髮。然後擇言於逆心遜志之間。求諸道而逆者。是忠也。進之親之。求諸非道而遜者。是佞也。斥之遠之。正大光明者。是君子也。引而用之。回互隱伏者。是小人也。察而退之。好惡定於上。而趨向變於下。則正直登庸。諂諛遠屏。朝著自清。嘉言罔攸伏矣。堯舜明目達聰。而九官相讓。周文灼知克見。而庶常吉士。伏願聖明深省焉。親賢遠奸古之帝王。教養世子。傳輔之德義。師教之道訓。保其身軀。教諭其德。而仁孝禮義之道得矣。安護其身。而容貞詞氣之養正矣。於是又選端士正人。博聞有道術者。使與世子居處出入。日見正事。日聞正言。日行正道。其從容導迪。浸漬涵暢。變化氣質。養成德性。蓋如此。故教得以左右正。則國本正。國本正而治平之基業著。

矣。三代教諭之方。卓乎不可尚已。粵在我朝。仁廟爲東宮。中廟特選李彥迪等。以委輔導之任。講論啓沃。至今以爲美談。此殿下家法之所宜監也。曩者聖教特下。首擢林下之士。繼拔李基嵩。破格除拜臺官。噫。殿下此心。足以爲三代之治矣。推此心而得人。以任之。何事不可濟哉。天眷東方億萬年之洪業。東宮生有異質。玉度金相。岐嶷夙成。自受冊以來。中外延頸歸心。歡傳遠邇。翕然嚮服。太平之祥。已垂於此。此實宗社無疆之福。此實臣民難遇之慶。殿下有此附托。顧何憂哉。第春秋方弱。輔導爲急。習慣少成。宜擇所與。若太公望之不與鮑魚。恐養以非禮。疏廣之却外家監護。不以私示天下。皆可爲取法者也。臣每念聖上在儲宮。春坊僚屬。銓曹全不慎擇。龕鄙冗雜。欲引進於三司者。輒先試于此。以爲通華貫之路。翊衛之官。亦不問人物。但觀私囑。以爲宰相子弟發軔之地。臣竊痛焉。今小陽重明。中外係望。唯慮輔導之官。未盡其所職。自今宮僚除拜。宜勿循流例。妙簡一時知學有行義之人。久任輔導。若祖宗朝故事。至

於翊衛之官。遴選自守著名者。使之奉引左右。濟濟可觀。則日與親近。補益多矣。今日國事。無大於此。伏願聖明深念焉。教養世子人主一身。國家之本。即位臨政。又人主之始也。其致謹於正始者。寧可忽乎。董仲舒曰。爲人君者。正心以正朝廷。正朝廷以正百官。正百官以正萬民。正萬民以正四方。人君爲朝廷之標準。而心又爲酬酢萬事之樞紐。心得其養。誠存而妄可去矣。心安其止。靜定而動能應矣。察一念於善惡之幾。戒一事於喜怒之節。清明在躬。權度合理。以爲建中立極之本。非殿下正始之急務乎。誠意正心易家人之初九。閑有家。悔亡。上九。有孚威如終吉。初九於治家之始。能以法度防閑。是以悔亡。上九居至尊之位。內盡至誠。而有自律之嚴。乃獲終吉。治國在於正家。正家在於反身。儀于閨闈。以基治化。使內言不出。外言不入。內外肅然。請謁杜絕。以爲刑家御邦之本。非殿下正始之急務乎。嚴肅宮禁易曰。幹母之蠱。不可貞。程傳以爲。子之於母。當以柔異輔導之。使得於義。若仲已剛陽之道。遽然矯拂。則所害大矣。西山真德秀謂。人君之事母

后尤不可不知此義。仰唯 聖明。方抱至慟。皇皇莫及。所欲孝而盡子職者。唯 慈殿耳。至誠將奉。先意承顏。怡怡愉愉。終始無間。以為教民興孝之本。非 殿下正始之急務乎。尊奉大妃管蔡以殷叛。周公奉行天討。閱其失道。而作常棣之詩。愴然憫惻之情。温然篤叙之意。溢於言外。 聖上之經變。盡倫。惟在友于諸王子。頻賜 教諭。不迷于非義。益篤 恩愛。無替於懿親。使宮掖之間。和氣休洽。以為產祥降祉之本。非 殿下正始之急務乎。愛恤同召公告成王。以誠小民。為祈天命之本。以疾敬德。為誠小民之本。天命至嚴而常顯。民情至微而可畏。萬事之得。或以一舉之失。而召災。萬人之悅。或以一夫之怨。而生亂。能保小民。乃能保天命矣。目今民散久矣。民怨極矣。南倭有難處之機。北鄙有自亡之勢。憂虞之象。已迫於朝夕矣。此時收拾人心。最為急焉。陰陽少愆。常念民事之或失。教令一下。惟恐實惠之未霑。寅畏罔間。好惡與同。以為保民祈命之本。非 殿下正始之急務乎。收拾民心子遊宰武城。以非公事。不至其室。而取澹臺滅明。司馬光除諫官。亦

取不通書問之人。彼以一宰一官。取人猶若是。人主之擇人。尤當謹於此也。勿用卑諂之人。全取方正之士。使名器漸重。 朝廷自尊。以為觀聽取舍之本。非 殿下正始之急務乎。賢士取漢時竇廣國。賴絳灌擇師傅之力。稱為退讓君子。樊宏陰興。俱以榮勢盈滿為戒。清靜謙約。宗族染其化。兩漢之世。后戚之家。盡罹禍敗。獨此數人者。以忠謹自持。全其寵祿。慶流苗裔。名顯史策。真可謂後世法矣。上念漢文之无私。下追郭劄之密讓。保其福祐。以為清朝美化之本。非 殿下正始之急務乎。无私外戚商高宗。以納誨輔德命傅說。而傅說以從諫克聖。復于主。人君有從諫之實。則下人不命亦諫。譬如江海能容。何憂百川之不歸朝哉。君子觀山澤通氣之象。虛以受人。虛者無我之謂也。擇合而受之。非虛也。隨量而用之。非虛也。法語之善。從而改之。異與之言。悅而釋之。舍己從人。虚心好問。以為檢身制事之本。非 殿下正治之急務乎。容受直諫太甲曰。今王嗣厥德。罔不在初。又曰。慎終于始。新服景命。無疆惟休。亦無疆惟恤。事在謹初。曷不勗焉。前月伏見

聖教深自悞損。藹然有求助之至意。奉讀以來。赤心銘服。欲以芹曝之誠。少酬其宿願。而疾病乘之。精神昏憤。期待堯舜。言不盡懷。惟幸 聖明財擇焉云云。答。天變實由予不德。兢惕罔措。獄事予亦不知所爲。卿須從速出仕。叅翰善處。二十九日啓下

夏四月初一日。司諫趙正立伏以。臣微末一小官耳。本無一藝可紀。一善可錄。而自 先朝猥蒙謬 恩。屢有除命。逮我 殿下。一月之內。再降召旨。前後恩寵。夢亦驚感。而每呈辭章。一味病退。跡涉不恭。罪合萬死。然臣之實情。有不然者。安敢避煩瀆之嫌。有所隱諱於父母之前乎。臣自少別無宿疾。已亥年以後。連遭一家切迫之喪。非一非再。長哀大慟。自不覺精神日耗。元氣日去。脾胃日敗。痰冷日積。以致難治。加以心恙尤重。有若風病之人。如此尙能出爲世用乎。此臣之所以五六年退伏田廬。俟死無悶者也。且心者事君之本也。心若受病。微官細務。尙不能堪。况諫官乎。諫官之職。爲任至重。雖使無心恙者當之。一或臨利害死生之際。計較之念

纔動。則心緒便亂。是非倒謬。阿諛苟容。失身誤國。無所不至。况臣心恙。不特一念之動。而積年成痼。全體迷亂。一有驚動。惶惑失措者乎。諫官之尤不可堪明矣。若有可堪之勢。當此 聖明始初清明之治。凡有志氣者。莫不延頸佇足。願立於朝。臣獨何爲苦心辭退。將枯死於寂寞之濱。而莫之知悔也。以臣之病勢言之。決無從仕之望。若蒙科外 恩典。特許歲久屏居。安心調理。幸或差瘳。更見脩門。則有病無病。皆是 聖恩。豈無捐軀報國之日乎。伏願 聖慈。俯察微臣閔迫之情。亟遞臣職。以安愚分焉。臣旣以賤疾。不能赴 召。又無一言以答 聖恩。則臣之平昔愛君之心。反歸虛地。安敢噤默。以負素心。臣竊窺 聖上天資仁孝。學問淵深。不恥下問。不憚改過。一聞規諫。便即開納。惟勤惟慎。將以大有爲也。則此真千載一時。而盡言不諱之秋也。第念國家遭此罔極之痛。 殿下方在哀疚之中。臣民言事。似非其時。姑撮其切於喪禮。急於救時者。而畧獻焉。伏惟 聖明垂察焉。三年之喪。自天子達於庶人。三代共之。一自短喪。喪制蕩然。千

百帝王同蹈謬轍。得罪於彝倫。貽譏於萬世。其間雖或一二君之可稱。或泥於邪說。或不合古禮。何足道哉。獨宋孝宗。几筵則衰絰行禮。公朝則布素視事。以終三年。故朱子稱其破千古之惑。豈非彼善於此者乎。伏願殿下。戒前代不盡親喪之失。體高宗亮陰三年之制。勿爲謬習所拘。勿爲俗說所移。斷自宸衷。期以必行。則庶無悔矣。然禮有恩制。權制之說。若一向不量氣力。哀毀過禮。則亦非終孝之道。一遵中庸之喪。以盡喪禮焉。禮喪人子事親之道實難。而帝王之家爲尤難。何者。宮闈之間。禮貌至嚴。情意易阻。而閹宦妾婦之徒。又從而投間抵隙。交構百端。必使離間而後已。雖在天性之親。猶或如此。況殿下之於大妃殿。以義處恩。非常道乎。伏願殿下。鑑前代至親乖隔之變。盡其誠孝。極其歡愛。使讒說無從相間。以親兩宮焉。尊奉大妃兄弟者。同受父母之氣。一體而分。恩愛之切。豈間彼我。其間或有勢位相逼。嫌怨日積。則兇謀或逞。雖大舜周公之聖。有所不免者。然骨肉之變。處之極難。恩亦不可傷。義亦不可廢。叅量恩義。斷以至

公。然後天理人情。並行不悖。不然則必有偏重之悔矣。伏願殿下。恒存悶惻憂懼之念。勿以一毫私意計較其間。可施王法則施之。可全天倫則全之。善處同氣之變焉。全恩大凡人心操舍無常。若不常切照管。必陷於爲惡。學問思卞之功。何可須臾廢也。今我殿下。窮格之功。雖至。見道或未甚洞快。涵養之力。雖盡。操心或未甚堅固。而遽遭賓天之慟。兼御萬幾之煩。心神安得不傷。意思安得不亂。應接事理。安得無失常過中之害也。伏願殿下。哀慕哭泣之餘。每以操舍存亡爲念。一日十二時。逐時照檢。使一意一慮。毋入於私邪。又於尋常日用語默動靜之間。嚴肅整齊。惺惺了了。以明聖學焉。正人君之職莫重於得相。相得其人。則群賢登庸。而君享其福。相非其人。則衆邪並進。而國隨而亡。此必然之理也。今我殿下。即位之初。首黜權奸。爰立賢相。一國臣民。莫不相慶。皆以爲世道可回。至治可期。而當初問政之際。未見委任之意。反示自用之漸。是徒有得相之名。而誠無任賢之實矣。伏願殿下。求相之際。慎於未得之前。而必

得其人。委之於既得之後。而必用其言。賢邪進退。政刑輕重。必與之面議。而勿爲讒說所惑。愈久愈信。使盡其忠。以責任賢之效焉。信任賢相人主。身居萬乘之尊。手握雷霆之威。若不虛心受諫。孰肯忤旨以言其過乎。頃者竊聞之。道路人有陳疏者。下教曰。言雖狂直。固當嘉納。以開言路。至哉。王言。眞所謂一言興邦者也。殿下之所尙既如此。不患讜論之不至。第未知讜論之來。果能有採納之實耶。眞能採納。則言路日益開。聖德日益彰。豈非國家無疆之福也。如或不然。終無採納之實。則前日下教中。嘉納之說。恐未能見信於人民。而言路日閉。主勢日孤。他日雖或有欺君誤國之奸。更無爲殿下言之者。可不畏哉。然則今日之能聽諫與否。實邦家興滅之幾也。伏願殿下。每以此惕然爲念。凡君聽善惡時。政得失。雖有直斥之者。切勿遽有怒意。徐察義理當否。所言是則輒即快施。雖或不是。每加優容。使人皆得以樂告之。告之即改之。改之猶恐未盡。益恢從人之量。洞開諫諍之路焉。從諫朝廷之壞亂極矣。頃者權奸當國。縱凶極

惡。無所忌憚。稍知義理者。日見踈斥。吮癰舐痔。蠅營狗苟之輩。逐臭而爭聚。上以欺陷君父。污辱衣冠。豈不痛哉。幸而神人默佑。罪人黜伏。宗社臣民之福。何可量也。但腹心之徒。巧爲立功自免之計。自相彰惡。一向喧啾。反覆之態。醜不足道。而當此殿下深墨百官莫敢不哀之日。何可日日紛紛有若忘君父之喪者乎。廓清妖氛。雖不得已。自當靜而慎之。以待喪葬之畢。有何不可乎。救今之病。莫如先擇銓衡。必得公正正直獨立無黨。士林中第一流。分授其職。收拾善類。主張公論。則彼紛紛不靜之類。自當退聽。而仕路清明矣。不然而若使其徒冒執朝論。進退人物。則是安石雖去。惠卿猶在。激濁揚清。恐無其時。伏願殿下。洞察君子小人進退消長之幾。先清政本。以正朝廷焉。進賢退邪公道與私門。不可並立。公道行則私門閉。私門開則公道廢。此其自然之理也。我國家近年以來。道學不明。仁義晦塞。朝廷禮讓所在。而惟干進是急。搢紳廉恥所尙。而惟貨路是崇。勢之所歸。猶恐或後。交通宮禁。因緣戚里。恬不爲愧。噫。自古正人直士。

未聞有由此路而進。則此輩之為小人無疑矣。是以蠱鄙者登顯列。清直者沉下流。正路日益蕪。邪徑日益通。豈不寒心哉。若不痛革此習。大張公道。則賢人君子奉身而退。畢竟朝廷日亂。國非其國矣。伏願 殿下不以臣言為偶然。細察因緣交通之害。幸或有由宦官宮妾戚里而通名者。一切斥絕之。非但絕之。又從而罪之。快示我 殿下留念公道焉。公道取人臣學術空疎。文辭短淺。誠雖激切。言不中理。何足以感動 聖心。但臣曾忝宮僚。久荷優接。感恩一念。至今撐中。中誠所發。不能自己。伏願 殿下勿以人廢言。一賜採用。則幸甚云云。答。予當留省。○獻納任克 啓曰。臣伏見李德馨之筮。歸咎時事。不一而足。姑舉其不得不卜者言之。一則曰。臨海愚悖。依順和君例。安置于外。一則曰。肆招無賴宗室武夫。聚頑悍叛奴白徒。多集銃劍弓矢。為逋逃主。而招不測之說云。然則只以愚悖招不測之說乎。又曰。干係至親之變。有難遽處。而今乃發矣云。知有不測之謀。而將從容等待使 宗社坐受其禍。而後合於理乎。若以李元翼之平反。鄭述趙

正立之全恩為請。則其所望於 殿下者至矣。今乃不然。而以遽發為咎。是置之於真贗之間。為他日橫議之嚆矢。豈不痛哉。又以二十七日之前。逐日彈論為非。臣其時不在言地。未詳其事。但永慶之罪。既關 宗社。天討之舉。一日為急。况危疑之際。兇逆之人。因執國柄。則意外之變。難保其必無。急擊兇魁。剪其羽翼。容得已乎。又曰。先朝之失政。到今言之。是不忠。論永慶救仁弘為失政。則不亦異乎。又曰。謀危請封。發言於鄭仁弘遠竄之日。則可也。到今言之。是希望也。為 宗社忘死生。惟仁弘一人而已。當時不言之罪。不獨在於小 豈可以不早言為嫌。仍默於可言之日乎。新服之初。臣忝憲職。同叅於永慶加罪之論。所謂希望。臣亦當之。請遞職。小人情狀。明若觀火。而陷賢之辭。巧織至此。苟無林下正議。則李綱秦檜之真偽孰能卜明於後日乎。又遣禮官于鄭仁弘。教曰。曾見卿在道上章。知卿歸意已決。皎皎空谷之駒。寧無繫維之意。顧一切敦迫。非所以優賢。而間關道途。所傷亦多。許卿還山靜攝。蓋不敢不許也。此心缺然。曷嘗須臾忘。所幸卿有再來終事之願耳。君臣之間。貴相

知心。予既以卿之心爲心。聽卿之歸。則卿獨不以予之歸爲心。幡然起來耶。眇予一人。煢煢在疚。未堪多難。若涉大水。其無津涯。不有老成人。其何能淑。粵稽舊典。詢于大臣。方將置卿於帷幄。異聞嘉謨。且欲煩卿調護世子。以昇輔養之任。予不辟雖不足與有爲。國本之重。卿可恕耶。天步艱虞。蒼生望治。卿不得不任其責。始予之許卿還也。人或有言。而予不以爲慮者。固已知卿有後期焉耳。日月逾邁。載臨襄事。小心皇皇。如有求而不得。卿以國之著老。邈在千里之外。喪有所可議。事有所難斷。奚所咨而處焉。想卿還山有日。調息已多。天時不甚熱。登道亦便。乘駟遄行。予日望之。○執義崔有源。啓云云。往在二月。領府事李德馨再遣咸興判官李貴于其時。諫官尹孝先家。極言臨海陰懷異志。禍迫朝夕。懇請面議。又招趙國弼。大言臨海反狀。夫肆之事。舉國藉藉。而德馨之言又如此。三司之啓。蓋出於不得已也。其意爲宗社大計。爲君父除害。安有要功之心乎。德馨身爲大臣。當此大變。苟有所聞。則所當說與大臣連名請罪。而乃敢送

人於無分之言官。區區請見。至於國弼一戚里也。而必與論議。十四日朝。細聞三司將啓之意。及其詣闕。大將趙徹聽兵曹分付。以發軍事。告于都提調李恒福。恒福入言於諸大臣。德馨無一言及此。佯若初不聞知者然。逮啓下賓廳。德馨曰。此言從何出乎。吾則全不聞矣。噫。三司之啓。實由德馨之言。而及其啓下。變其辭說。前後所爲。似出於二人。其爲用心。難免反側。故臣曾見諸宰曰。臨海之事。李德馨既已力言。則三司之啓。不可已也。而李恒福之議。則慮或守臣之不謹救護。以貽他日之悔。此則實出於愛君之誠。可謂得大臣之道矣。德馨則初既大倡。而一日之間。變幻其說。其爲心術。深可惡也。臣又見德馨一家之人。陳此曲折。則德馨自以爲李貴果以此事言於我。我則只惟惟云。貴在遠方。勢難相卡。其所以歸之李貴者。不惟而姑以自已唯唯之說推之。則當初與聞之跡。自不能掩。而面陳於國弼。預聞於十四日者。未知何人賓廳會議之時。若有未聞者。亦獨何心乎。德馨爲人。自少長於才華。及其當國。雖無赫赫之名。終乃

以言去位。人以此多之。又因元兇之濁亂。人皆憤惋。追思原任。屈指德馨。於二三賢相之下。安知今日情狀之敗露。一至此也。吁可惜哉。自知其心跡之難掩。上筭論事。隱然自明。其為計可謂巧矣。臣徒懷嫉惡。不容人過。率爾出口。以致德馨之多談。臣之失大矣。請罷臣職。甚矣偏黨之不幸也。有源答勿辭。甚矣偏黨之不幸也。有源少。有孝行。長。珍。剛。直。庸。倏。鐵。錚。不。無。人。望。今。攻。賢。相。辭。極。兇。恠。無。異。住。黃。之。構。宗。孝。孝。必。欲。置。之。無。所。容。身。之。地。反。與。任。兇。輩。同。情。他。日。埋。骨。燕。山。取。之。疏。雖。得。人。臣。之。義。而。無。足。取。矣。甚。矣。偏。黨。之。不。幸。也。

○武將閔悅道朴名賢高彥伯等皆以通臨海坐死。

五月。右議政沈喜壽伏以。東韓不天。奄遭弓劍之慟。惡逆不測之變。又出於天倫至親之間。不幸之甚。古今所罕有。伏想殿下。樂樂宅恤之中。益切傷痛之懷也。臣於臨海兇謀未著之前。已知有拔扈之漸。私憂過慮。屢形諸疏。箚中被其所狠怒。無所不至。至於上年冬。先王違豫之日。都下洶洶。禍且剝床。臣實痛悶切骨。未嘗食息之頃。忘于心。春間此獄之起。人或疑信之相半。臣獨斷然無疑。意謂滿庭赭衣之徒。輸情吐實。惟恐或

後。而及其究問之際。親信奴僕。既皆狎暱。宗室武弁。一向牢諱。自斃杖下者甚多。數三廝役。端緒乍現之後。亦無尋絳取服之路。閭巷悠悠之談。頗用恠訝。雖有識之人。猶慮其結局之難。此亦常情之所必至也。嘗聞刑威之下。金鐵亦融。痛楚之甚。或有誣服。而以如此明白之獄。認罪者絕少。其故何哉。抑或以經亂之餘。人多習惡。能於堅悍忍耐而然耶。昔年壁書之獄。臣為委官。驗得人心之已如此也。今茲獄情。十分昭著。設使河大謙噤口而死。猶無一毫之可疑。况大謙以心腹最密之人。前後承情之辭。不一而足。兇謀奸計。露盡無餘。正其刑章。萬目咸覩。凡在遠近。莫不痛快。豈非千萬不幸中之千萬大幸也。如其終不得其情。則末世偏隅。義理不明。或不無一種浮囂之議。未必不以為虛捏之作。冤枉之歸。聞於四方。傳于後世。豈不為聖代無窮之羞。挽哉。獄成非所幸。而不得不以為幸。其亦戚矣。臣自初至今。首尾四箇月。監鞠最多。累累殞命之中。未知孰為玉孰為石。無辜橫罹。恐難以一二計。審覆失實之責。臣必當之。言念及此。不覺瞿

然傷感。然此則大獄之所不免也。尙何言哉。全恩之說。已盡於李元翼。李德馨。鄭述諸臣忠愛之章。似不必再贅於其間。且想聖上仁慈惻怛之衷。已有所默定焉者。而事至于此。臣之痛迫危懼之懷。尤不能自禁。嗚呼。人臣事君。當以大舜待象之道。望之於吾君。豈敢以漢文以下之事爲法也。臣雖至愚極陋。一寸丹悃。不在袁盎下。今日所慮。亦豈止於霧露之間哉而已。詩人所稱無相猶矣者。非此之云。而亦願聖明念念在茲。勿爲事關宗社之說所撓奪。屹然爲三代以後處變盡善之主。不勝幸甚云云。答省筭感惕。予甚不幸。遭此罔極之變。日夜憂懼。不知所處。嗟大舜古之聖人。處變之道。予何敢比擬。卿等叅酌善處。俾寡昧有辭於後世。○拜鄭仁弘大司憲。教曰。日者馳十行書。諭予至意。省卿祇受之狀。如卿不負前言。益信賢者不果於忘世也。即今因山有期。攀號莫及。而顧念國勢陵夷。時事判渙。不有負一世喬岳之望者。砥柱乎中流。其將胥溺而後已乎。予爲是懼。用卿爲司憲府大司憲。知卿有壁立千仞之節耳。激

揚頹波。挽回世道。當今之世。舍卿伊誰。至於左右寡昧。調護世子。不得不煩于卿。卿而不得不任也。正值炎敦。跋涉良苦。宜遵前旨。乘駟上來。○執義李慶全等。啓曰。逆賊金天祐。河大謙等。承服正刑。而逆魁肆尙未處置。失刑甚矣。大義極嚴。王法至重。請亟命按律。答。予早失慈母。兄弟二人。相依長成。切擬唐家之宋王。我朝之月山。而由于予不德。致有同氣之變。雖不得已。勉從廷臣之請。竄于外方。而予心之罔極。爲如何哉。縱曰云云。而此不過賦性狂妄。爲兇賊輩所誘耳。况先王遺教。丁寧在耳。何忍割恩。宜勿更言。○三司逐日連章。請按律。答。久陷賊中。喪失其性。又爲凶人所誘耳。大義雖重。天倫亦重。貸死可矣。○李好閔等在北京差通事。齎送禮部咨。本部署部事。楊等題曰。臣民咸已推戴事。在彼國難以遙斷。似當行勘。以求確據。合候勅下臣部。移咨該國會集。通國臣民。公議詳確。明白具奏。一面移文遼東撫鎮官。即差的當員役。前往該國。詳查臣民推戴實跡。具本奏聞。然後會議定奪等因。奉聖旨。是爾部便遵前旨。移

文該國。從公查明。奏請定奪。遼東撫鎮官仍差的當員役。往該國查勘。奏來併儀。又禮科都給事中胡忻等一本。爲看詳章奏。屬國封事舛違。乞勅查議。以重典禮事。奏奉 聖旨。這本說的是立國以長。乃萬古綱常。該國素稱禮義之邦。豈可擅行廢立。自階亂亡。著移文該國。耆老大臣會同軍民。秉公詳議。萬口一辭。神人相合。然後奏請定奪。毋得少有扶同致貽後悔。禮部知道。本國 王大妃金氏。據文武耆老宗室及散班儒生軍民等。聯名狀啓。具奏聞一本。領議政李元翼等會同文職陪臣。海平府院君尹根壽等三百九十五員。武職陪臣知訓練院事李時言等四百五十六員。散班陪臣李成祿等一千二百員。禁軍內禁衛金季玉等三百二十六員。兼司僕高應祿等一百一十六員。成均生員申得淵等九百八十員。中部軍民高得昌等四千三十員。東部軍民朴萬同等二千二百員。西部軍民林得順等三千五百五十員。南部軍民李寶等四千一十三員。北部軍民許億信等二千一百一十員。具奏文一本。宗室定遠君琿等二百二十五員。具奏文一本。專

差陪臣李必榮兼程馳赴。奏文于 帝 攻事 ○兩司啓曰。臣等伏見。告訃使

李好閔等狀啓。禮部覆題。至有差官面質之語。揆以事理。極爲未安。其間

許多難處曲折。引對大臣面議。答已諭大臣。○撫院差自在州知州萬

愛民遼東都事嚴一魁。到國查勘一國臣民推戴實狀。攻事 ○領府事李德

馨伏以。臣重被情外不干之言。貽辱 朝廷名器。不可更抗顏於大臣之

後。屏逐苟度。伏聞告 訃使通齋來禮部覆題之語。中朝該官雖爲福王

而發此言。福王今太子之弟志氣拔扈多有奪嫡之漸故云 其准許册命之意。則必已定矣。至今

臨海上讓本。而撫鎮差官面質。極爲恠愕。今當具陳。以爲我 先王平時。

年長 王子只有 嗣君與兄肆。而肆自少悖惡。早畜群怨。先王爲宗社

付托之重。歎 嗣君仁孝之行。夙定大計。而國人之係望亦久。壬辰之亂。

先王命嗣君監國。而四行告急于 天朝。于時諸處奔竄之民。棄其妻

子。爭相奔走。跋涉扈衛。嗣君助兵繼餉。以圖勦賊。肆則避賊入咸鏡道。

頑戾之性。臨難愈甚。暴虐邊民。民不堪命。乃執以迎賊。陷沒經年。終賴天

將之力得生還。知子莫如父。得乎民爲君。先王之取舍民心之向背。足以知矣。况肆還賊之後。喪性狂易。稔惡尤極。奪人女色。搶人財貨。殺傷人命。有同草芥。一國耄倪。盡爲仇讐。多畜無賴之徒。貽害八道。無所不至。先王在時。肆許多罪狀。已爲難貸。而矜其病重。置之不論。賓天之後。其愆患之徒。恐其群怨爭起。難免刑戮。潛齎兵器。仄入諸。王子廬次。發覺就捕。兇狀昭著。群臣。啓知慈殿。鞠治徒黨。以正常刑。又欲以法處肆。而嗣君篤於友愛。曲全和恩。移置二日程畿邑。得以安住。肆自絕于先王于王妃于嗣君于國人。而。嗣君之處肆至矣。嗣君自壬辰受委監國。不但民望俱定。某年月日。先王具奏。天朝。欽蒙。皇上專勅。使之進駐全慶。簽軍助戰。督糧繼餉。全慶之民。逼於賊鋒。而終不離散。接濟大軍。以成天討。我。先王又於某年月日。遣陪臣某請封。又遣陪臣某申奏焉。一國臣民衆情。具載於某年之奏。又具悉於某年。詔來。朱梁留館時。呈文。本國之號籲實狀者亦累矣。皇上之勅諭。明白如此。先王定計。

預早如此。奏呈頻煩如此。小邦雖以每瀆擾爲懼。惟俟。天朝早晚準許。而國人之推戴。已十七年於此矣。先王久病稍間。乃於二月。卒革不救。而。臨終遺命於王妃。使嗣君襲位。而奔告於。天朝。內自妃嬪。外及臣民。哀疚罔極之中。推念。皇上平日。視小邦如一家。欽恤曲全。異恩稠疊。但俟准封之命。朝夕遄降。而不慮其奏辭曲折有所踈漏。且陪臣發行。亦在肆之亂。未作之先。國之實狀。恐未能暴白於該部也。本國壤地雖小。南隣倭寇。北有虜驚。早蒙。冊命。晝夜經繕。猶恐隣敵之或伺釁也。今典禮遲降。漸稽時月。舉國悶迫之情。曷能盡達於疏奏中耶。竊查該部覆題。軫憂小邦。臨事加審。玆將前後實狀。備細陳達云云。則似或宜當。臨海讓本一欸。事甚無謂所議也。至於面質。則無可質之事。尤涉殊常。差官之來。令通譯解事之宰臣。善辭釣問。臨海前後之狀。明白開諭。使知無可讓無可質之由。然後其間周旋。責之該官。則庶乎可也。且此兩事。善辭於禮部。回咨。差官之來。以咨草示之。亦似便好。差官之回報。只任其所爲。則恐有踈

漏牴牾之患。撫鎮咨文來到。見其辭說。即爲一咨。另差有心計之人。急速齎赴廣寧。備陳事情於兩衙門。而差官歸報之辭。兩衙門轉報禮部之咨。設計聞見。如有周旋之機。則隨便善圖。仍探其報揭而來。則於事有益。而中朝之情。亦可以速知矣。我國大小之事。中朝無不洞知。頃年許多

天將天使。徒見臨海容自言語之俱似人也。不知積惡蓄怨之至此甚。但以風病爲言。則聽之似不信。下語當有商畧。且兇逆之狀。措語不圓。則中朝之人。善於臆逆。意謂。凡叛者必有衆助之爲惡。若疑國人或有助臨海者。則恐似未妥。此亦詳量爲當。臣當國事莫不重大之機。雖退伏私室。晨夜憂慮。敢陳管蠡之見。言無可採。但盡所懷。答省見憂國之誠。深用感歎。當議處焉。頃日之事。卿豈有嫌。須以國事爲急。出而共貞。○司諫李爾瞻等。又連章請按律臨海。不允。自後逐日不止○正言崔暉等。啓曰。伏見李好閔等狀啓及禮部咨文。非但上國致疑。出於千萬慮之外。使臣應對之際。亦多失辭。以誤事機。其間曲折。不可遙度。而啓中云。臣等喚至案前。詰

其何故不及長子。曰。長子風癱。詰其何在。曰。守在喪次。又曰。陪臣苦稱十七年長子業已退讓云。此其失對之尤甚者也。臨海一生積惡不一而足。何不直斥而信聽都工吏孟浪之言。乃以風癱爲對。臨海一王子耳。有何可讓之事。而乃以此對。以致張郎中守喪則非病也。無爭意有讓德之語。則上國之執言。前頭之難處。未必不由於此也。今此更奏之行。前日失對。不容不明。卞事機極重。特遣大臣直進。帝都備陳實狀。俾完大事。答議大臣。且李德馨年富力強。且有才智。左相借衙入送議大臣。李恒福沈喜壽伏承。上教。益歎任使得入。

六月十四日。李元翼伏以。歷代以來。王室至親之謀逆事發者。廷臣必以按律爭之。有以貸死請之。按律之爭。欲舉邦國之常典。貸死之請。欲成君父之美德。二者雖各有所主。而要之皆不背於事理。然而按律貸死。出於各人之說。則可。一人而兩說。則告君之辭。不幾於變幻無倫乎。臣曾於去春。病伏私室。得聞逆獄被訊者。多有吐實之人。不勝其區區。遽以貸死

之意。及於筭中。厥後獄畢。臺諫以魁首獨免爲失刑。據法論之。是固討逆之常典。臺諫爭之而不得。則廷臣相率而伏閣。又是事例之當然也。無狀小臣。忝在首相。欲論之。則是前後變辭。臣雖不自恥。聖明當謂臣爲何。欲默默而已。則以臣冒據之故。而廢朝廷之公議。寧有是理。臣衰朽癯病。呻痛度日。兼又事勢狼狽如此。而妄意國有大喪。差官又至。臣子辭退。恐非其時。遲回隱忍。以至於今。不敢出一言。陳乞遞免。玆者公議益激。物情益鬱。臺諫啓辭。以此爲言者屢矣。至此而臣之叨冒之罪。尤無所逃。請亟命遞職。以便公私。答。卿以宗戚大臣。死生休戚。當與國共之。目今差官入來。國事憂虞甚多。卿於此時。忍發辭退之言乎。予甚缺然。大臣臺諫體面不同。全恩執法。言各有理。卿宜安心。終始輔予。○兩司啓曰。李好閔等。只令推考。臣等請反覆焉。嘗聞主憂臣辱。主辱臣死。今日之事。豈但憂辱而止哉。使我無憂而憂。無辱而辱。非天朝爲之。好閔等爲之也。風癰之言。何所聞而發。居喪次之說。何所據而對也。况退讓一語。尙忍

出口。而面質之詰。專由於此。不知好閔等之意。以爲自何地而退何地。而將何有。而讓於誰耶。所謂面而質之者。因其意而驗其實也。使天朝生疑於不疑。使我國致誤於機事者。孰使之然哉。讓本具來之請。發於狀啓。則果是偶然言語間錯語之比乎。臣等以李必榮。不可先送者。賫去之奏。實欲卞明。好閔謊謬之說。則不可更付既誤之手。益致前頭難處之患也。今日差官之來。舉國奔走。首相伏候道傍。親自呈文於馬跡之下。臣等亦叅號訴之列。到此景色。不覺心腐。好閔誤國之罪。至此尤極。請命拿鞫。答不允。○差官入京城。○李恒福伏以。臣曩處盟府。嘗因禁府啓事。議處肆之宜。末云放之不齒。既嚴公議。思以安全。合申私恩。以是獻之。伏覩李元翼筭。深以前盟異辭爲不可。懇乞遞免。黨與伏誅。只舉恩義者。猶尙如是。獄辭未具。經請全恩者。當復謂何。蹲池不去。坐鬱公議。則厥罪益重。伏乞聖明。亟許鑄免。答勿辭。○沈喜壽伏以。臣纔線無長。蚊山難負。年踰耳順。病痼脚攣。玷辱名器。人多指點。匍匐班行。衆笑且憐。此皆不可

得以掩之者矣。舜殿纔閉。滕廬始居。謬恩遽及無狀之臣。微臣當效力於罔極之日。黽勉拜命。迫不得已而猶以恐不克趨走於因山之前。得罪於嗣服之初。及至今日。賤疾益甚。不能行步。爨曠居多。震惕罔措。加以頃者敢將忠愛之悃。仰勸全恩之德。天地鬼神。昭布森列。豈有一毫他意於其間。而揆諸討賊之義。治逆之典。不可懸絕之甚乎。凡於議論之際。如其細微事宜。則或棄舊圖新。或去短從長。不可爲嫌。而至於重大處置。各有所見。豈容朝矛夕盾。搖攘不定。有若出於二人之口也。近者正論方張。義當勝恩。曾未有。大官建言爲百僚倡。豈非如臣固陋亦厠具瞻而然也。李元翼李恒福之說。略及於起獄之初。而臣則顯陳於河大謙承服正刑之後。其膠守愚見甚矣。病旣如此。罪又如此。豈可以卒哭之未過。差官之方駐。而仍因冒據。致妨公共國之言。伏願天地父母。亟賜鑄罷。答。卿明慎按獄。罪人斯得。結以貸死。不肯恩義。勿辭。○十六日。接待都監大臣啓曰。差官到館後。頗以自上。不即相會。嗔怒。臣等率多官伺候於館裡。差

官坐堂。即令臣等入行拜禮。多官令退去。使臣元翼恒福德馨坐於西邊。行茶。仍語臣等曰。我等奉聖旨來此。必欲見臨海。不見以何辭回奏。且非欲令臨海與嗣王一處面質。只一見臨海。可以完事。何以如此遲延。嗣王旣不郊迎。到館後亦不來見。主客之禮。果如是乎。辭意截然難犯。臣等慰以小邦遠行之辛苦。因告曰。小邦之禮。異於天朝。雖在士庶。穿孝者不先見客。主上哀毀慘慟之中。先王靈柩纔發。心緒荒亂。且拘國俗。不敢來見。反覆論難。而差官之意甚峻。臣等又曰。臨海罪在宗社。出處於外。小邦亦有科道官。以爲謀逆之人。其死雖貸。面見天官。於理大未安。爭論不已。將此意已奏上聞。申報撫鎮兩老爺。望亮察。且接伴陪臣在開城馳啓。以爲老爺當欲致吊。主上擬受兩位之吊。不料兩位先令來見也。差官答曰。科道雖以此爭之。聖旨如此。豈有不見臨海而回報之理哉。旣云罪在宗社。則率來王点。我當斟酌。急令率來于城外。一見事即了矣。我們在開城。意先王在殯。嗣君在側。欲往吊矣。今聞已爲

出葬。我不須往吊。嗣君不來見我。畢竟不得見而去。大事何以得完。臣等拜辭。差官謂曰。嗣王今日雖晚須來見我。若終不來。則急速回報。臣等出來後。又令家丁傳言曰。嗣王欲來見我。則喪服來見無妨云云。觀其主意。牢確難動。臣等說話。難以得入。與多官會議。則彼爭以主客之禮。無辭可拒。一番接見。所不可已。臣恒福廷龜以爲我國大小人民。所重喪禮。主家有喪。客先來吊。無主人先見之禮。不謹於是。貽譏一世。今老爺責以賓主之辭。嗣王聞之。瞿然不安。明日即欲伺候于館外。望老爺俟。嗣王到館。即於幕次先行吊禮。寡君受吊畢相見。庶正賓主之禮云。亦不聽。故敢啓。答。不幸遭此變禮。雖在衰絰中。似當接見。但今日月食也。行相見禮。未穩之意。善辭微喻。以觀其意。且要見臨海不己。則固無難矣。既見之後。又有大段難處之事。則何以結末。卿等深思善後之道。○是夕。上接見差官于館。還宮後。差官即行回禮。○副護軍崔有源疏曰。朝廷以逆魁移來城外。臣不勝痛心焉。面質一事。臣子不忍聞。差官雖以聖

旨爲重。在我豈無善處之道乎。既見殿下。又見逆魁。則難免面質之名。大義掃地。天朝因此若加怒。則臣請先往受罪。埋骨燕山。不欲見今日有此事也。答。省蔬嘉歎。當議處之。○鄭仁弘承命赴京。駐漢濱。又辭以病。上問疾醫來。教曰。聞卿上來。國其庶幾。啓沃輔導之任。振肅頹綱之責。專倚於卿。卿何未入國都。遽上疏章乎。予甚缺然。調護入來。以副予望。○鄭仁弘伏以。臣病伏村舍。今晚得見朝報。禁府都事兵曹郎官廳傳教而出。始知致逆魁於中道。臣竊意。皇朝遣差官求見臨海者。以使臣失對。今逆魁伏辜。圍置絕島。差官雖不見逆魁。亦不失皇勅本意。況逆賊之罪。不容天地。蠢民庶猶不欲見其面目。可以皇朝使命屈辱於中路。接見凶惡之一物耶。宜將此意往復。差官必欲見之。則大臣臺諫亦當以死自分。差官行還之日。隨後而行。待命於義州境上。則聖天子宜有洞燭之望。而急遣都事。拿致使臣。使知失對之罪。則國家事情。不待卜說。而昭昭如天日云云。答。聞卿嬰病。憂慮方深。今見憂國之誠。病裡益

篤。但此時使臣拿鞠非便。姑置之以待其回。○刑曹叅判鄭述伏以。臣前於待罪憲府。深感遭遇之盛。不勝愛君之誠。敢上情笏。因請貸死。今者鞠事已畢。論議大張。按律之嚴。凜若秋霜。皆以全恩爲非。臣窃慚懼。思欲自效。而山陵之後。差官又來。遑遑之中。不敢仰瀆。彷徨累日。悶默待罪。時論益峻。物議愈騰。伏願 命黜。以安私分。答。勿爲辭退。共濟時艱。○鄭述。臣奉職無狀。言而失中。致有物議。久愈藉藉。玷累明時。辜負 盛恩。不於此時瀝情乞退。貪戀榮寵。苟冒徊徨。則益致四方非笑。重爲後世詆訶。伏乞 聖慈。特許鑄罷。不至大狼狽。則天地父母。殞結難報。答。再見筭辭。具悉。卿懇。安心勉留。匡予不逮。○遣領府事李德馨。戶曹判書黃慎等。齎領 大妃金氏奏文一本。靖察先令陳奏事意。亟降明旨。冊封嗣子。承襲國王。妻柳氏爲王妃。差官發行之後○鄭述。臣猥將危衷。屢于疚聽。天語丁寧。感極涕零。臣獲叨不世之遇。惟思畢精之報。強辭清朝。歸縮窮廬。豈臣之本心哉。第惟人臣發言失當。罪犯不韙。則邦有常憲矣。物論將發。指目交

盛。則身便不保矣。合被常憲。亦旣不容。則幸身乞退。所不得已。寧可苟冒非笑。徊徨朝著。上累主眷。下乖所守哉。臣之求退雖懇。而 殿下之許留亦勤。第恐 殿下牽於一時之 聖懷。不許臣願。一朝公論驟發。使臣狼狽顛躓。則 殿下其何以曲護而安全乎。當彼時。臣之爲 殿下累。其可勝乎。且去就之義。非愚臣之所敢議。而人臣之所常勅勵。思有以自盡者。未嘗不在於是。故古人有言。進退儒者之大節。蓋不唯其人得失之。亦可占本朝之清濁。然則與其留而玷及明時。不若退去罪止。臣身。此臣所以昧死決去云云。○鄭仁弘。臣病伏村舍。今垂一月。未謝 恩命。曠廢官職。罪戾深重。無地自容。辭遞本職。已至于三。而更加給由。遞命久闕。又念臣旅寓荒涼。濱於飢餓。賜以食物。數日優厚。此誠千古未有之事。臣之無狀。何以得此。臣頃論唐官要見臨海事。若聽查考。則十七年已定之名位。不免有虛撓之恥。多費銀蔘雜物。以貽唐官。而抑其與奪。有若酬直而貨取者然。皆是使臣失對辱國之故也。彼使臣輩。平日以臨海爲伯夷之德。

儲位爲不義匪據之地耶。至索臨海讓本於本國。欲使魁首讓國於殿下。而殿下受國於逆魁。欲以伯夷待臨海。則又將何以處殿下乎。逆獄起於十四日。而使臣二十三日發程。則移置喬洞。或可委於不知。遠配珍島。乃所明知。而乃以尙在殯側爲對。致有差官面質之命。與國初李楚等所爲。不幸近之。誠使都事馳赴義州。使天朝知有本國拿命。則失對之實。自明於中朝。庶幾不虧國體。愚妄之見。偏及於此。敢以拿致使臣爲言。伏見聖批。以爲非便。又見李必榮賚去奏本。極言殿下仁孝之德。逆魁惡逆之狀。齊等比較。立角訟卞。初若情僞未定者然。雖使稱譽聖德。賢於堯舜。猶不免爲萬古之差。輕許面質。拿致使見。陰符使臣風癰之對。了無片言失對一節。但草草言臨海之非讓而止。臣始疑大臣知有使臣。而不知有國體。欲護欺負之私黨。不復有君父威加之義。而殿下之教。不及拿見之不可。而終不以奏本之得失爲意。臣旣失聖明之旨。又忤大臣之意。偏滯之性。不達時宜。如此而尙可冒昧恩命。覲就言地。不自

爲之所乎。伏願遞職。賜臣骸骨。歸伏田廬。死葬先人臺側。一以全愚臣之分。而無憾於天地之大。一以獎進恬退之風。而或可從隗始。此亦殿下用臣之一道。而臣之所以報殿下者。不必持爵祿享榮貴。行呼唱於內庭外衢。然後可也。答。知卿忠憤。病裡益篤。使臣之罪。予非不知。姑待回還。亦有微意。至於奏文中事。於予似逼。一任朝廷所爲。目今國事多虞。卿於此時。當作頽波之砥柱。長夜之日月。豈容爲辭。○宗室順寧君景儉等三十五人上疏。請按律臨海。以明大義。答。凡我宗戚諸卿。咸聽予言。惟予兄弟同腹。有幾人哉。孔懷之情。實倍常倫。而由予不德。致此大變。日夜慚疚。無面對人。臨海還自賊中。失性已甚。加以被人誑誘。或有悖妄之事。豈出於本心哉。朝廷咸曰。罪關宗社。故予不得自由。出置于外。王法固已行矣。終貸其死。予之至情。執法之論。又出宗戚之中。予甚瞿然。無以爲懷。大義雖嚴。天倫極重。卿等毋爲掩恩之義。少慰予心。○李元翼初度呈辭。答。惟卿先朝宿德。朝野所依。行其志足以激濁而勵俗。展其蘊可

以尊主而庇民。司馬入朝。衛士加額。富弼當制。朝縉相慶。茲起卿式端首。揆明審克允。亟正討逆之義。諒予至情。不變全恩之言。天討天顯。自不相害。矧今國事多難。爰象可憂。山陵甫畢。而呻吟未息。封典未降。而冠蓋相望。西有建酋之信。南構島夷之釁。是其憂之已形者。而未形者尤可憂。譬如操危舟而航大海。不得不仰于運柁之人。卿何說之辭焉。卿宗戚也。與國共休戚。而無可去之義云。○沈喜壽初度呈辭。批。卿欲棄予而退耶。忘責任之重。而惟自逸之求耶。事有大不安於心。而不欲自顯。故引疾而退耶。惟予任之不專。不得安其位歟。國勢厭厭。如日下山。危亡之兆。慘焉溢目。此非大臣求退之日。而卿而忍爲之。以其予爲不足助而爲理歟。嗚呼。卿以孤忠。結先王之知。以清才爲一時之推。天章奎璧。是卿之華藻也。礪操冰孳。是卿之素履也。頃當王子驕肆之日。嘗進訓飭之意於先朝。此一時敢言者之所難。而獨卿能之云云。○百司百官。逐日連章。請殺肆拿使臣。

秋七月。鄭仁弘。臣不敢供職之義。不勘留官之情。前後一二陳請。而爵命不遞。恩遇轉加。至有愚分所不勘者。砥柱日月之批。肉粟館舍之教。必有曾子子思之賢。聖足以處賓師之位者。然後可也。臣是何人。偃然處此。而自安於心。臣尤自蹙然欲去之速也。況今之臺官。一言之失。一舉措之差。引嫌自避。已成規例。臣年踰七十。衰病已甚。唐官之查考。辱及君父。而不能正救。使臣之誣罔。請命拿鞠。而未蒙俞旨。此是大段。當避之嫌。而反矇然冒昧。不爲避乎。臣平生下欺朋友。上欺君父。盜名窃爵。常自慄慄。豈謂今日蒼顏白髮。遲暮殘生。乃復覩面於朝班。呼唱於市道。無補於國。無益於時。不免輕侮於人。而埋沒平生之志乎。臣所以屢乞骸骨而不知止也。獨念國家艱虞。册使未來。而遽請退去。固不自安於心也。雖使臣尙留。亦不能爲有無。伏願遞職。以遂志業。窃見國勢如蟲心之木。一枝一葉。無不受病。逆魁肆罪。入不道。天討當加。王法難貸。奈何全恩之說。發於其間。物情因以疑惑。國論以此二三。將有不可言者。臣窃以爲全

恩之說。起於逆狀未明之前。固不免掠上之美歸恩於己也。出於逆形已具之後。則此二字。不當出於人臣之口也。渠魁就擒。黨與輸情。而曰全恩。曰亂言者。獨何心也。人臣討逆之義。果如是乎。誠使 殿下天怒震動。必欲致刑於逆魁。則大小臣僚。有能抗顏於雷霆之下。請全兄弟之恩者乎。以此而言。獄成之後。以全恩發口者。非有護賊之私。則不有 殿下也。彼將以逆肆。欲同之於福鳳城兩王子之寃乎。以今日公議。欲同之於乙巳奸兇之胸臆乎。討逆者。臣子之公議。天下古今不可易之經義。伸恩者。人主之私情。一是君父念鞠愛之美意也。舜之處象。周公之誅管叔。石碻之誅石厚。先儒固有定論。今日之事。與舜之處象不同。不必引以爲說。元聖之誅管。不特以宗社爲重而已也。上有成王。身爲臣子。在周公則誅之而已。未聞以叔父之親兄弟之恩。請全於成王也。逆肆私養家兵。陰謀不軌。通國臣民。所共憂慮。而搢紳之人。反謂不知。以全恩終始爲請。其心未可知也。伏願 殿下。遞臣之職。許臣之退。則是終始保全之恩也云云。 答。

具見忠直。日月爭光。人心如面。不同所見。因以有異。其歸莫非愛君之誠也。安心勉留。終始輔國。○禁府經歷朴逸賢等伏以。逆魁肆惡。盈於天地。天地之罪人。罪關於 宗社。宗社之罪人也。其兇悖奚啻管蔡。而獨見貸於今日之周公乎。伏願斷以大義。○鵝城府院君李山海判中樞府事尹承勳等六十六員啓曰。罪人斯得。天誅尙稽。宗戚三司。至于庶官。無不籲呼。而 天聽邈然。群情愈往愈鬱。伏願俯從公論。 答。予以薄劣。荷 先王簡拔之 恩。叨承丕緒。日夜憂懼。天倫之變。遽出哀疚之中。俯仰慚痛。無以爲懷。既曰罪關 宗社。出置海邑。法已行矣。何可按律。○李元翼再度呈辭。批。唯卿赤心天知。素履玉潔。立朝明輔。百僚式而萬民瞻。茲外勤施惠。時雨遍而和風允洽。清名旣播於夷夏。獨行無愧於鬼神。當 先王聖明之臨。宅首揆台衡之峻。楚令尹之毀家紓難。本出宗支。唐泝公之進規獻忠。愛自貴戚。伊彌綸之未究。輒方園之見妨。洛社閑居。轉盛兒童之誦。橋庄偃息。久鬱士民之情。迫茲訪落之初。卑以經邦之責。圖任克盡於

勿貳。丐閑或慊於未孚。駭來章之無因。諒此時之何等。况挹之風。雖可尙於末丑。大公之舉。深有望於宗臣。○沈喜壽再度呈辭。批。唯卿喬木故家。精金夙稟。羽儀鴻儒。非一二計。績綵龍袞。餘四十年。肆先朝既擢中台。乃今日再屈右揆。承元兇距脫之後。立朝可觀。在大逆首實之時。按獄唯審。諫長宰相之事。異致同歸。執法全恩之言。並行不悖。孤忠耿耿。有素一念。斷斷無他。庶醫疾而醫國。由愛身而愛君。○李恒福再度呈辭。批。卿之辭章。一之不可。胡遞至再。明日領相乞免。明日右相請退。又明日卿又求去。三台之座。一時俱空。此近古未有之事也。朝廷有難。誰與共議。邊鄙有警。誰與共議。於戲。慎定浮俗。非卿不可。調劑士林。非卿不可。拯救生民。非卿不可。卿之進退。豈不重乎云云。○李元翼三度呈辭。批。惟卿識著。著龜望重。喬岳拔俗。數千丈。志操玉潔冰清。立朝四十年。忠貞天知鬼質。迨茲嗣服之日。重卑鼎軸之司。東山起謝安。鎮物之德足尙。元祐相司馬。加額之慶方隆。那知微恙。遽爾再辭。於戲。予之於相臣。當待之以誠。而

慎其始。卿之於國家。必報之以忠。而圖其終。○李元翼四度呈辭。李恒福三度呈辭。批。雖有一時未安之節。但當說播心事。循國不渝。力疾勉出。以紓予憂。○沈喜壽三度呈辭。批。唯卿雅量淵澄。英姿玉潤。夙占崑甲之選。早受先王之知。出入乎烏府薇垣。幾進諷諫直諫。從容乎鳳閣蘭省。每懷啓心沃心。茲深魚水之歡。遂峻台鉉之位。陳諸宮之橫恣。足見念民之誠。慮群工之睽乖。首發救時之論。追張良之慕赤松。欲遂勇退。異斐度之歸綠野。故許暫休。休無疆。恤亦無疆。曷予言之多誥。勢可去。義不可去。惟卿意之深思。○沈喜壽伏以。難治之疾。罔赦之罪。咸萃臣身。既不能運步行公。又無以舉顏立朝。區區危悚。聖鑑固已洞燭。而拘於常例。久闕罷命。公私悶迫。度日如年。伏願罷斥。答。此時何忍固辭。善攝出仕。○陞鄭仁弘崇政。拜左贊成。仁弘伏以。臣以區區之情。屢上章疏。乞賜骸骨。輒下不堪當之。批。今者更加崇秩。臣衰朽癯病。不足以應務。瞿然驚懼。逡巡却步。不欲留也。臣頃將使臣誣罔之罪。大臣護黨之情。全恩之失。再

陳直斥。殿下優容兩可之。批。旋以崇秩處臣。位升二公。於大臣地。嫌勢倡。前後所言。侵及已多。疑於有意涉於希望。辭小而取大。請退媒進。形跡如此。自今不能爲國家言。大臣之失。箝口結舌。徒享爵祿。亦非平生之志也。然則今日。新命適使老臣。尤欲速去。只見南歸一路。爲此身自處之地耳。伏願亟收。成命。答天爵之脩。人爵至。卿何辭焉。○李元翼伏以。仰承。聖批。責諭丁寧。臣不勝痛迫之至。慈殿違豫。聖候失常。人臣分義。非有大不得已。豈有引疾堅臥之理。臣雖駑劣。待罪大臣之後。大臣非庶官之比。苟有人言。不可冒處於具瞻之地。况臣奉職無狀。前後被劾。罪名狼藉。俱係重律。屏伏席藁。恭俟刑章。又安敢舉顏奔走。以供職務。臺評如此。而猶且不退。則臺臣風采。因此銷落。士林廉恥。緣茲而喪。聖明將安用喪廉恥之大臣。以爲國哉。臣職是首相。裁斷議論。首相爲重。今日議罪。臣當爲首。臣之癘病。固未可言。而事勢至此。斷不可在職。伏乞罷斥。答。大臣體面。與小官不同。詎可徒懷一截之嫌。而苦爲辭退之計乎。予爲

卿等。不能無憾云云。○李恒福伏以。乞退非臣心也。雖曰非其心。非欲貪榮。苟冒爲膠固計也。只以今時則不可。故姑此逡巡。欲有所待。乃決去矣。則優遊黃間。不過爲時月間客耳。坐此不敏。益速官謗。至于今日。心跡逆施。標榜爽實。平生愛君之誠。反爲後君之惡。夫掠上美爲私恩。是臣掩君也。在春秋爲無將有犯乎。此臣義謂何。斥以謬妄。臣亦無辭。殿下視臣。豈市恩於賊者耶。凡執跡而議罪者。當先究其思慮所發源處。故曰源情。今不識始言全恩者。其愍然之端。何自而生乎。爲君上歟。爲罪人歟。今而曰云云。則恩之所歸。其終奈何。有臣如此。尸諸市猶輕。而前後。聖批。曲譬而兩全之。臣以是益知。殿下決不以是爲然也。今以後臣乃得生矣。伏奉。聖諭。曰。但當說播心事。循國不渝。臣敢發口言乎。嘗讀古書。公三宥之。不對走出者。有司之職也。使人追之。雖然必赦者。帝王之仁也。故先儒論此事曰。臣執法宜堅。君用法宜寬。臣讀書至此曰。此足以斷公族大辟矣。後見漢史。劉長之反。張蒼馮敬請論如法。袁盎諫載輜重。異時蒼之

賢過盜甚遠。而至議淮南之獄。二人寬猛若是。後儒論之曰。蒼敬俱為御史大夫。理當執法。暨我宣宗皇帝即位之元年。漢王發兵反。親征擒之。群臣請正刑典。刑上不允。後觀皇朝子集中碑誌。其時有為尚書者。勸帝勿誅。終致消遙城句上仆地之變。其為尚書者。猶無恙在官。不以為罪。臣愚見二事。意謂。郎將尚書。猶且如此。況不為郎將者。宜無所拘忌。適因獻議。畧陳愚見。始焉自以為忠。不悟更以為罪。至於二公之處。周公先儒之論。似不如說者之云。而多以為不可知也。周公之處。變亦有區區嫌疑。有所不避。未可以淺俗之心窺之。則尤臣之所未嘗講及者也。九原難作。臣莫由承顏而稟質。今何敢逆探其千載之微意。遽定為難稽之舊典乎。雖然。已事難追。即事可虞。以殿下聰明睿智。其於三臣者之狼狽。必已燭照而契數矣。其身雖在位。其勢已去。其罪已誅。然且牛維馬繫。必欲待柱後。惠文彈治而不饒者。非殿下之心也。不然。循常習謬。必合一呈再呈。至於十數。如計朔遷官之為。然後始乃許退。以示繾綣之意。又非所

以處今日之勢也。不出此三者。而相持引日。居必退之勢。待必罪之日。臣身不暇計。顧於國何利焉。今兩殿愆和。三揖懷憂。二邊多聳。百務稽滯。臣獨以無病敢稱病。有罪若無罪。罪實萬死。然非臣罪。勢不得不爾也。伏願亟許罷免。以快公議。答。具悉廣達之議。良用嘉焉。張袁之論。寬猛懸殊。不害於當時。無譏於後世。今日恩法之議。並行何妨。前後勤諭。意實在此。宜諒予意。速出匡國。恒福終以護逆被構出在抱川庄。嘆曰。人與松皮同耳。打松皮為餅。打人為逆賊。又謂村人曰。汝等以何事被侵耶。曰。外方烟役極煩。李嘆曰。點城護逆亦重。○李元翼五度呈辭。備忘記。卿無云戀闕傷時。常掩門涕泣。未久蒙宥。○李元翼五度呈辭。備忘記。卿無可去之義。前後諭盡。卿不諒予。控辭不止。病裡之懷。尤用缺然。勿為更辭。調攝出仕。○沈喜壽四度呈辭。備忘記。予之待卿。誠意淺薄。前後懇諭。皆歸文具。予實愧焉。此誠何時。而卿等一向引咎。期以必解職務。為得計。大臣同休戚之美。恐不當如是也。卿等雖切於自逸。寡味將誰與為國。善攝出仕。毋用困予。○李元翼六度呈辭。李恒福沈喜壽五度呈辭。備忘記。執法嚴正。臺諫之責。導君寬仁。大臣之道也。卿等按獄明慎。罪人斯得。則

全恩之議。實出於愛君之誠。卿等何嫌。至於守經之論。雖或似重。亦不過明大義立王法。彼此無非公耳。說破已盡。毋庸執此以爲固辭之張本也。予病劇矣。國事危矣。防秋節迫。邊虞倍前。以元老大臣。一向辭退。罔戎陰雨。脫有一夕之警。卿等置宗社於何地耶。力疾勉出。共儕艱虞。傳曰。承旨一員。以此備忘。敦諭三公。○領議政李元翼伏以。無狀賤臣。過蒙眷遇。至遣承旨責諭丁寧。臣非木石。寧不震慄。慈殿違豫。聖候愆常。人臣分義。非有大不得已。何敢一向退伏。不遵嚴命。臣之呈告。適出於同僚並辭之日。故其跡相混。無以相別。臣實非專由於事勢也。臣少有身病。病發或驚呼出奔。四年之後。方得差愈。而壬寅年死病。心疾復作。晝則稍定。夜必惴慌。至有叫號不省之時。自在先朝。多在村庄。閉戶靜養。至有今日。年齡漸衰。氣力漸盡。無日不痛。無夜不悸。外而肌肉消燦。內而方寸攪擾。喜怒言笑之微。亦失其常。又安有畀以職務。而不至僨敗者哉。陵事未完。差官又至。忍死奔趨。軀命尙延。今之乞退。是素志也。至於事勢之

嫌。臣又大異於同僚。臣以首相。裁斷論義。種種罪戾。臣實當之。以病以勢。臣當先退乞命。首罷臣職。亟卜他相。以便公私。答。予意諭之已盡。願卿善攝以出。○告訃兼請承襲使延陵府院君李好閔。副使同知吳億齡。書狀官護軍李好義。失對誤國之罪。並罷職。下吏曹。因百官逐日連疏。廢臨海爲庶人。○右議政沈喜壽七度呈辭。答。調理出仕。喜壽劄曰。伏以。臣於議政三人之中。才猷望實。萬不近似。犬馬之齡。與李元翼差少一年。而脚蹇難行之病。臣獨有之。今日謗議之行。均有所傷。而臣最甚焉。議政三人。一時呈告。前所未有。而臣之情事。尤有所不容己也。每蒙聖諭丁寧。一樣優容。不許遞免。臣恐聖明或未能洞燭於此。故乃敢冒昧瀆擾於靜攝之中。臣罪至此。又萬死矣。臣之妄陳伸恩之說。乃在於河大謙承服正刑之後。兼且推鞠廳啓請告廟社教中外者。亦臣所起草。而只舉河金兩賊之事。不爲並舉逆魁之罪。物議因此兩事。輒指臣爲護逆。頗有專攻之意。臣雖頑蠢之甚者。能不瞿然震惕而思。所以自處之道。臣之陋

意以爲起獄之初。固有數三臣僚貸死之論。而河大謙以腹心之親。已盡輸情。殲厥巨魁。在所當舉。勸聖上全盛德之心。油然而發。不暇念虞舜周公爲一己爲宗社之有敢異進。寂寥短筭。以効區區愛君之愚忠。非謂聖上仁慈惻隱之發。必待臣言而有所助也。環一國大小人心。夫豈有救護臨庶人之惡者。而設有絲髮救護之私。則其中先自不足。必不敢干冒天威。開喙以饒他之請。其理甚明。不須卞也。及其推鞠廳啓事之際。三司按律之論。朝暮且發。自當有處置兇魁之路。臣不得已。只將正刑兩賊。請先行告教。磔肉爭敢。以特壓於先朝慈愛之篤。莫敢下手。臣於其時。不爲滔天之虐焰。人所共知。況於今日獄成大憝。身爲腐鼠之後。乃反受護惡之名。不亦寃痛之極乎。人臣無將。將以必誅。討逆莫嚴於春秋。此實天地之常經。古今之通義也。歷觀前代有司執法之論。不謀同辭。固出於天理人心之正。而如遇王室至親之變。則或不無伸恩之說。袁盎之於劉長。過爲大言。固是去古未遠之致。成濟之於豕乾。敢發得終天年之

語。尤爲人所難言。如是之類不少。而未聞其終陷護逆之罪。論議弛張。古今異議。未可以一槩視也。茲者言責論事之外。上自宗戚公卿。下至郎署庶官禁旅三醫。莫不奮袂抗章。滿庭號籟。以必正王法爲請。而臣等數人。方在百僚之右。未嘗倡率多官。以申沐浴之請。豈非可恠之甚哉。蓋以當初立論。稍異於人。中難遽變其說。最後則詆訾紛興。不少容恕。雖欲棄短從長。通爲公共之舉。而跡涉圖免罪責。匿情苟同者。然亦非大臣體面所宜行也。噫。滿庭臣僚。未必無臣等全恩之意。臣等數人。亦固有滿庭臣僚執法之心。而特以劈頭。不日馴致。揭號懸殊。臣等之尙道刑章。亦云闕典。自古及今。安有大臣負如此之大罪。受如此之峻謗。而能保其位。察其任者乎。國事艱虞。日以益甚。危機敗證。已至十分地頭。當此時。雖使韓富呂馬之賢。居輔弼之地。猶懼其不能共濟。况如臣庸庸碌碌。無學識無器局。有大端痕咎者。豈容一日因冒匪據也。即辰兩殿起居。俱屬未寧。伏聞証候大畧。委爲非輕。慈殿滋補之方。從權一事外。更無他策。設廳侍藥。

恐不可緩。而臣忝長內院。退在私室。視臣職務。有同他人之事。瘳曠之誅。亦所難逃。憂惶悶感。度日如年。伏惟 聖上。天地父母。察臣言非矯飾。憐臣情甚切迫。將臣本職及兼帶內醫院司僕提調。特賜鑄罷。以授其人。公私幸甚。 答。累見辭章。具悉卿懇。但予言已盡。卿何多辨。國事艱虞。不止於疾病之憂。此非大臣引嫌辭退之日。斯速出仕。益堅循國之志。○李元翼九度呈辭。李恒福八度呈辭。 答。宜遵前旨。安心出仕。○鄭仁弘三度呈辭。遣內醫看病。 教曰。卿以貫日月之精忠。有安社稷之大計。寧有一朝長往之理乎。無乃病中居處不安。或出在江上舊寓耶。因予有病。未得一番接見。擬待暑退病蘇。親訪至治之道。豈意遐棄寡昧。浩然不顧。若是其遽乎。此實由予禮賢之誠意淺薄。不能以永今夕也。深用缺然。茲令禮官馳諭予意。冀停出晝之行。仁弘因登道。政院 啓曰。鄭仁弘處遣內醫看病。仁弘已發向嶺南。不得看病而來。 上又教曰。卿果棄予而去耶。予之望卿。至此懃懇。而卿之視予。一何邁邁耶。始聞卿之出郭。意謂住在

江上。以便調攝。及聞卿行浩然。窮日之力而去。予甚缺然。已遣禮官使之追挽。續諭政院。道予至意。未知能至否乎。待予病蘇時。且涼生。願一相見。親聞至論。誠意淺薄。不能留之於適官之日。願乃眷眷於冥鴻遐舉之後。惡在其禮賢之道乎。予實多負。深切慚恨。第念憂時愛君。賢者素志。濟世安民。君子所期。目今予甚病矣。時且棘矣。邊憂未息。民困方極。此豈忠賢長往之時。而抑卿展布之志。將欲待於何日耶。茲竭哀忱。又此馳諭。翻然改圖。賁然來思。○鄭仁弘在道。陳筍曰。臣區區請退之意。前既悉陳。今復以不可少留者。仰瀆 天日之鑑。臣雖無才器。可以備明時之駟策。而血氣之身。豈不知 聖恩之孤負也。第以衰朽如此。癘病如此。絲毫性命。半在在世。半在鬼鄉。一朝溘然。生行而死歸。固知 殿下宜爲之愍然。必不終始靳臣之去也。不獨此也。臣前日所陳地嫌勢逼之說。初出於一身自處之情。而今見李元翼李恒福辭職筍子。俱以臣論劾爲意。決不欲相容。臣雖病未就職。既以陳官被 召命而來。則見 朝廷討賊全恩之角立。

相爭。矇矓陳奏之。護逆辱國。偏滯之性。豈能容默。不効微衷乎。大臣若不
休休有容。而屑屑於是非之間。則思欲因避。發於言辭筆墨間。亦其常情
也。臣竊意。當初大臣發全恩之說。雖無他意。然大臣痛齒於前。小官效颯
於後。士林又從而捧腹焉。其流之害。不可忍言。有若營護逆魁者然。至於
劔椎斧斤變起。殞側之教。亦或以爲誣。若以逆魁爲抱冤者然。欺罔
天朝。誣陷本國。而若初無罪咎者然。大臣一言一事之失。其眩是非誤人
心。將至於亡人之國。故臣不得不效淺見。卞其是非。自以爲言責者不得
不爾。畢竟以臣之言。而大臣俱不安其位。臣亦豈得自安而不求去也。夫
三大臣者。先朝之舊。柱石邦家。股肱王室。此三句十二字。不但一時之公論。實後來千萬世不易之正義。仁弘
知之而欲去之。痛矣。是誠何心而殿下時乘御天之日。夙夜盡瘁。勳望夙著。臣山野踈
遠。衰朽無用之物。而妄言直斥。撓殿下柱石。毀殿下股肱。古人不曰新
不可間舊小。不可加大乎。臣不自量。初欲報先朝之恩寵。而觸犯兇禍。
猶不知戒。思報殿下之知遇。而又忤此三大臣。偏滯之性。不能包容。堅

忍。其無器識。灼然可見。臣豈合與大臣較得失爭是非。強顏於殿下之
朝廷乎。朝廷可無臣。不可無三大臣。此臣決不可不去。殿下至此而
無以處臣。幸勿以臣之不俟終日爲意也。第念聖候之不豫。有日。遼界
之聲息甚惡。冊封之詔使未來。螻蟻之念。常自懸懸於此。此固非人臣
去之日也。然秋涼已至。積傷稍解。乃瘳之慶。宜在朝夕矣。天命之人歸之。
十七年已定之名位。雖天朝不應鄙邑我千乘之國。而中朝不爲無
人。大事保無他虞也。天朝知遼將跋扈之心久矣。豈有聽其所爲而附益
其勢者乎。遼將一動。時有遼將奇天朝必有討叛之舉。奴賊或有擣虛之
患。則西路宜無朝夕之警。而廟堂亦有宿定之筭。則臣雖不去。亦將不
能爲有無矣。臣有不復濡滯之意。而無外難不可去之憂。殿下宜不以
臣之去爲無義而大速也。臣自念事君之日無多。去國之勢已迫。區區平
日願爲殿下言者。雖不能毛舉。亦不得不就其尤大者。一二陳聞而去
也。伏見殿下銳意圖治。收用遺才。如臣衰病。亦不遽棄。不知殿下果

有大有爲之志。思臻不世有之治乎。臣恐當今之世。無能爲。殿下任此責者。三大臣足在此責而今日無可如欲因循舊規架漏牽補而已。則臣謂實不知三賢相之忠賢矣。聞一時人物。足以辦一世之治。朝廷之上。宜有勾當此事者。殿下何少於肉食而必留垂死之身也。殿下曾見賢人君子大行於時。施澤於民者。古今天下有幾人也。以孔孟之聖。栖栖諸國之境。有圍匡之厄。戒心之患。其危極矣。宋之程朱。道德俱爲聖門高蹈。同氣相求類聚。而當時目爲朋黨。倍陵之行。請斬之効。其禍慘矣。今日搢紳間偏黨習錮。傾軋風成。一國一君一朝廷。而分裂爲秦吳楚趙之敵。常懷妬婦之心。欲售吞噬之計。雖使孔孟程朱更作於今日。亦不欲一日立於朝廷之上。况如衰朽鴛劣者乎。殿下如欲收拾人才以成治功。則必先去黨比之習。此在人主一舉措一取舍之間耳。伏願留意焉。臣蒙被殊恩。優施糧饌。旅寓之中。喫猶不盡。路上之資。亦復餘裕。頃受夏等之祿。一依數目。峙在所寓之舍。秋等新祿。亦不敢受。具告本曹云云。答朝因醫報。知卿已爲出郭。差

人追挽。兼致予意。即見劄辭。尤用感歎。卿之終始憂國之誠。眷眷若此。而予不能使卿一日安於朝廷。予實負卿。慚痛良深。願卿少回歸意。勉留旬朔。俾予利見親聞。至論吁世道日頹。國事危急。此豈賢人君子長往不顧之時也。須臾予意。庶勿遐棄。仁弘因下嶺南。遣禮官問。教曰。觀卿兩劄。憂時陳戒之意。益切於去國之日。孤忠勁節。卓爾難及。自古賢人君子。非果於忘世。只緣時君待之不誠。終致懷寶山林。未能行道濟世。良可歎惜。予因邁疾。未即引接。豈料冥鴻遐舉。白駒難繫。竟未回其遁思也。賢者不樂仕於朝。實非國家之福而生民之幸也。予甚瞿然。若有所失。更遣禮官。以諭予意。卿其乘駟上來。以副予望。○宗廟重修告成頌赦。教曰。上祀先公之所。即與太宗俱新。中興十年之餘。聿見縉儀猶舊。雖舉國而稱慶。顧在予而增摧。言念奉而周旋。粵自剪焉。傾覆出黃海。歷江原之際。幸得免兇鋒。自寧邊移定州之時。何知有今日。尙苾芬之不替。奈灰燼之靡遺。先朝方且營之。末命嗟何及矣。茲乘已成之績。遂奏垂畢之功。茲

妥靈之盛舉。過卒哭而斯行。乃於本年六月二十九日。自權奉處所。移安于永寧殿。若宗廟乃先王所大欲也。於人心得無悛乎。自本月初八日昧爽以前。見赦規○獻納任克。啓曰。國事峴峴。百孔千瘡。有如大厦將傾。面面皆風。台位俱空。史局久闕。分朋角立。黨同伐異。一介山人。亦不得安其位。今之國勢。可謂殆矣。岌岌。愚臣不稱所職。請罷。○賜柳永慶金大來。李弘老等死于謫所。盡誅其子。其後永慶等追施典刑。○琉球國中山王移咨曰。弊邦與貴國。雖有風馬牛之隔也。然自同稱臣于天朝。視之則共在覆載之內。以心相照。以神相馳。屢蒙厚貺。歲問不絕。弊邦何修得此。于下執事哉。弊邦邇年。荷天朝頒賜冠服。襲封王爵。始能與貴國締兄弟之雅。同藩天朝。爲股肱臣子。自今以往。請結永盟。貴國爲兄。弊邦爲弟。以弟兄而仰事天朝。歡睦聘問。願與天長地久之耳。仍將各色布絹等物送來。啟事

己酉

春三月。帝遣行人司行人熊化。賜祭諡及賻。又遣太監劉用。賜封王詔。有曰。朕凝命乘符。聲教暨及。雖在遐方異域。莫不尊親。矧茲禮義之邦。久荷幟幪之德。置君司牧。所以溥皇仁也。舊典具存。推行宜準。故朝鮮國王李諱。早年嗣爵。藩守東方。易危爲安。朕實有造。邇者陪臣告訃。例當請封。順舉國之民心。揆立賢之大義。特封故王之次子諱。爲朝鮮國王。俾承先緒。本國大小臣民。其悉奉教令。以佐王。脩身立政。纘服安民。振揚累葉之休聲。沐浴中朝之雅化。特茲詔示。咸使聞知。又降勅諭。得奏爾父王諱薨逝。爾兄病癘。通國臣民合辭請命。應爾承襲。朕順輿情。特從所請。茲特遣司禮監管文書內官監太監劉用。齎詔示爾國人。封爾爲朝鮮國王。繼理國政。仍封爾妻柳氏爲國王妃。佐理內政。并賜爾及妃誥命。冕服。綵幣等件。爾宜服茲新命。紹爾舊封。益堅忠順之心。永保藩垣之業云云。遣陪臣李光庭奉表謝恩。事攷○日本差玄蘇平景直。修書來謝。欲假道路修貢。大明本國備咨撫鎮等衙門。事攷○昌德昌

慶兩宮重脩告成事

秋八月二十五日。東北隕營頭星。太白晝見。漢水又赤。○遣陪臣申欽等請封世嫡事。奏聞于帝。事○上尊號。體天熙運俊德弘功。○正言

金致遠啓曰。臣頃忝本院。以論事乖當。累承嚴教。退伏私室。方切戰慄。聖教如天。復叨言地。臣實何人。謬恩至此。反覆思唯。若隕淵谷。因念本職。非但庶官之比。旣以言辭爲責。則言雖狂妄。不合事宜。亦當罄竭愚悃。以備殿下之採擇可也。惟我先王聰明睿智。遺大投艱于殿下。使輯寧我邦家。殿下受命。無疆惟休。亦無疆惟恤。固當兢兢業業。夙夜憂懼。廓轉圜之弘量。來批鱗之鯁直。凡所以安國家利百姓者。無所不用其極。然後庶不負先王付托之重。而殿下能事畢矣。殿下視今日爲何如也。今日之事。可言者多矣。大賊蓄銳而伺釁。邊備日就於空虛。南北之邊事棘矣。國計不支於一年。誅求已盡於錙銖。生民之塗炭甚矣。倫紀不明。義理晦塞。無恠乎是非之顛倒也。宮闈不嚴。賄賂公行。無惑乎

朝廷之紊亂也。講筵久廢。羣情未達。言路塞矣。祈禳是事。厩馬不閑。左道興矣。珠玉段匹。遠賈中華。而諫官而爭之。天聽不允。奢侈之風。自禁掖倡矣。繩愆糾謬。專責臺閣。而少有違拂。輒加嚴譴。鯁直之氣。始今日消矣。凡茲數事。甚非昭代之美事。而乃新服之大累也。至於太白之見。漢水之赤。兩西之風災。畿甸之枯旱。皆前古所未有之變。而今日之所當恐懼脩省者也。國家之勢。如器半欹。未墜於地。可謂岌岌乎殆哉。殿下即位。數年于茲。而一未嘗與儒臣正士。講論經學。咨訪國家大事。而日與近習嬖幸。寢處於深宮之內。居移氣。養移體。勢之必然也。殿下之心。焉得以無私。殿下之德。焉得以無累也。若此不已。竊恐殿下清明純粹之心。終至於轉輾而梏亡也。司馬光十年居洛。民間疾苦。朝政得失。靡不洞知。凡所以爲邦之道。莫不揣摩於胷中。而其爲相。首以開言路爲先務。陸秀夫舟中講學。在漂泊崖海之日。誠心言路。不可以一日塞也。聖學不可以一日廢也。春初兩司交章。請開經筵。自上以春寒尙峭。以待後日爲

教。厥後詔使繼來。不遑他矣。今者炎勢漸退。秋氣初涼。開筵講學。正在此日。今若遲延。更待後日。則日月云邁。冬寒又迫。竊恐殿下之講學。終無日也。國運屯遭。時事孔艱。氣像愁慘。危亂將至。殿下何不惕然動念。引接儒臣。廣開言路。思所以求之之策乎。與治同道罔不興。與亂同事罔不亡。此安危治亂一大幾也。可不慎哉。可不懼哉。臣前以妄言。遞差本職。纔閱一月。又忝重地。臣之一身。猶也。不可更爲冒據。請命罷斥臣職。批曰。啓辭中。倫紀不明。義理晦塞者。指何事也。宮闈不嚴。賄賂公行者。指何人也。予自遭喪以來。不脫布衣。宮中人皆常着素服。頃日尙方之請買。乃是禮服之具也。禁掖之倡奢侈者何事。三年未過。予未嘗入內寢。常獨居外殿。嬖幸之與予同寢處者誰也。必有所聞之實。而爲此啓也。願聞其詳。使之分明。書啓且祈禳之事。自內雖或爲之。而此豈予所盡知者乎。所謂左道者何道也。并問啓。○回啓曰。國有大逆。不能正刑。得保首領。則可謂倫紀不明。外間雜類。交結內人。有所請囑。則可謂宮闈不嚴。錦玉雖曰

禮服之具。而不必遠買於中華。則尙方之買。是奢侈之漸也。聖上雖或寢處於外殿。而近習使令於前。則所謂嬖幸內臣之輩也。祈禳之事。聖上雖不能盡知。而既不是正道。則是亦左道也。答曰。觀此啓辭。外視沽直之態。而中懷嫁禍之計者也。既以發端。則所當盡言不諱。及其下問。泛舉難明之事。糊塗塞責。誠非諫官風采也。如是辭之。依啓。致遠湖南。扶安人也。○探蓼華人四十餘名。攔入田子洞地方行走。權管洪仁成領軍追捕。被華人打死軍兵等。並被打傷。移咨鎮江衙門。申明江禁。以絕弊患。攷事

庚戌

春。追崇恭聖王后。奉安于奉慈殿。因行親祭。後四十三年乙卯。以皇帝之命。祔太廟。是爲成陵。○陪臣申欽等。回自京師。齎到禮部咨。本部右侍郎吳等題曰。朝鮮國王請封世子。查有前例。相應題請合照例。封爲朝鮮國王世子。恭候命下。臣部行移翰林院。撰勅一道。欽命內臣一員。齎勅前去本國授封。奉聖旨是。○帝遣太監冉登。齎勅封世子。恩賜

紆絲等物。其勅書曰。朕惟自古以來。有爵土者。莫不先定繼嗣。以繫群情。蓋其重也。近得王奏。本國臣民議欲立王嫡長子李諱為世子。王不敢專。請命于朝。具見忠敬。章下所司。以古事覆允。玆命司禮監管文書內官監太監冉登齋。勅併紆絲紗羅等件。封諱祗為朝鮮國王世子。夫王家世以禮義作藩東海。恭順之美。必能繼承。惟是外患未消。內備尙弱。封疆之事。急在綢繆。今既立世子。王宜明示此訓。以保邦家。毋替朕命。遣陪臣李時彥奉表謝恩。事改○秋設號牌都監。令各道各官定限督促。越三年壬子還停。只括成冊。中白徒充保吏。緣為奸。未有紀極。○因兩司成均館三學士及各道士子等疏章。特許五賢從祀。五賢文敬公寒暄堂金祖文獻公一蠹鄭汝昌文元公晦齋李彥迪文純公退宏弼文正公靜庵趙光溪李滉自先朝累上疏章。猶未蒙允。至是命下。○改忠清道為公洪道。忠州有賊子殺父母之變。降為西縣。故也。

大東野乘卷之一二十九終

大東野乘卷之三十一

亂中雜錄五

趙慶男撰

辛亥光海四年
明萬曆廿九年

秋黃海道鳳山郡守申慄上變告。削職文臣金直哉。潛與晉陵君為異謀。遣都事拿鞠。直哉與晉陵不得申卞。皆死之。晉陵順和君繼後也。拿鞠黃赫栲掠殞命。因施孥戮。緣坐之律。○進士任叔英對策。諷論時事。辭意懇惻。考官懼而不敢棄。自上親覽。怒命拔去。兩司爭之。自春徂夏。不得放榜。至秋蒙允。幼學權鞞有詩曰。宮柳青青鶯亂飛。滿城冠蓋媚春輝。朝家共賀昇平樂。誰遣危言出布衣。宮柳蓋指中殿也。鞞。廢科傷時。憤戚里用事。有鞞亦被拿遠。謫朔方道。鞞見勸。為權駭。傷之。外寓家。有壁。謫南海。臨行。有一盃酒。出陽關無故人。鞞見勸。為權駭。傷之。外寓家。有壁。謫南海。臨行。有一岐別。有無窮恨。慈母今年八十三。一時悲臨。

冬設量田。定八道左右均田使。湖南左道權緝右道朴燁酷刑煩○遼東遣指揮使黃應陽巡檢本國。應陽到京。因巡視兩南而還。所檢八事。軍務修否。要害守否。號令行否。士卒鍊否。糧餉儲否。人心和否。器械整否。

癸丑

殺延興府院君金悌男。先朝國舅廢永昌大君。曦安置于江華。時年八歲先是。故首相朴淳子應瑞。商山君朴忠侃子致仁。致義。與徐羊甲沈友英等。為死生之交。連居驪江。自稱江邊七友。陰為偷攘之事。人久不知之。至是。應瑞與商人下東萊。買販回來。於中路殺害同僚。竊取銀錠至京。為人所告。逮捕拷訊。應瑞方納端直招時。韓希吉鄭沆為捕盜大將。故緩鞫。引誘應瑞曰。爾若如此如此。則不但免死。大功可成。爾當深思更招。應瑞翻然改招曰。我等非是竊盜。將奉大事。欲備糧械。曾與七友。潛通國舅。謀奉大君為主耳。沆等忻然。構辭入啓。即拿鞫悌男賜死。丙辰追施極刑廢囚永昌于江華。因加悌男孥戮緣坐之律。致仁羊甲等皆伏誅。惟致義逃免。令八道設賞窮捕。得

致義者。士子則除戶曹判書二品職。賤人則木二百同賞給。應瑞以告變

蒙宥。沈希吉為首勳。出義信都正備口傳或云應瑞被囚自構逆○右相

鄭仁弘。筭論先除七臣。以折永昌羽翼。七臣韓浚謙黃慎朴東亮申欽徐

昌之命○全羅道羣山倉失火。燒盡稅米。屬邑民結。再備納。○秋停量田

役。竄黃慎于海西。聽仁弘計也。○臺官丁好寬鄭造尹訥等。交章請殺永

昌。以絕後患。自是三司百官。協請殺曦。逐日不停。社稷勳臣李元翼李恒

福李德馨沈喜壽。冒死連筭請全恩。○進士李偉卿幼學黃德符等。連疏

醜詆。大妃強請廢黜。尹訥鄭造等合啓請廢。光海欲許彼論。而畏人言

不敢遽允。

七月。生員李命達等上疏大槩。鄭造尹訥乃倫紀之賊也。使倫紀之賊久

假凶喘。舉朝無人。莫敢請誅。今日三司皆造訥也。○初九日。執義申景洛

啓曰。頃日鄭造等避嫌之辭有曰。得罪宗社。母后之道絕矣。在殿下雖極

母子之恩。於宗社顯有當絕之惡。為今日臣子者。其將以國母待之乎云

云。此雖因一時無前之變。而發此顛錯謬妄之說。以至於有乖倫紀。臣非不知明卞。而討逆方急。恐涉搔擾。且待疏筭之下。欲爲陳列而引避。今見生員李命達上疏大槩。以三司皆造訛爲言。顯被譏詆。臣不可苟冒言地。請罷臣職。答曰。今日羣僚罔念討逆之義。朝廷之上。只作爭鬪之場。交象不吉。爾亦效之耶。予以否德。遭此宮闈莫大之變。當叅酌處變。豈可以造訛之說有所輕重於其間乎。造訛等雖輕發不當言之事。惹起鬧端。以致朝著不靖。討逆不嚴。予甚痛焉。造訛等措語雖緊。旣以各處兩宮結末。則平時大妃。移御別宮者多矣。只不採而已。有何深治之罪耶。今也爾以明卞告君。爾亦一命達耳。勿辭。○大司憲尹孝全啓曰。鄭造等大槩因一時無前之變。措語謬妄。不自覺其有乖倫紀也。今見命達等疏。顯被醜詆。請罷臣職。○大司諫宋錫應啓曰。大槩當初鄭造等避嫌。非不知措語之謬妄。而此不過因一時無前之變。言不知裁。不自覺爲乖倫紀而已。欲待疏筭之下。自斥引避矣。遽被醜詆。不可仍冒云云。答。大司憲大司諫曰。

儒生妄言。何足動念。卿等勿辭。益嚴討逆之義。○掌令姜翼文啓曰。伏見儒疏大槩。則極口詆斥。念茲逆變。振古所無。而欽恤之德。務從寬假。網漏之患。間或有之。緊出賊口之李燧。爲賊囿主之黃愼。得免常刑。假息都下。昨日發言於席上。則僚議皆快之。將通諫院。欲爲合啓之際。大司諫入叅親鞫。未及通議矣。鞫逆未畢。得保首領者非一。而乃以久假凶喘之說。加之於鄭造等。臣不敢知鄭造等有何極惡。有甚逆亂之儔。而攻之至於此耶。被詆至此。不可苟冒云云。○司諫崔東式獻納李弘望啓曰。伏見生員李命達等上疏大槩。舉朝無人。倫紀之賊。莫敢請誅。三司皆造訛也云云。臣等非不知造等避嫌之辭。有乖倫紀。而討逆方急。未假他及矣。顯被詆斥。請罷臣職。○掌令金質幹持平趙存道金克誠等啓曰。大槩鄭造等之言。雖出於過謬。而執此爲罪案。并及三司。欲爲拊制網打之計。不亦慘乎。橫被醜詆。請罷臣職。○正言曹挺生啓曰。大槩當初鄭造等。雖爲過謬之言。而執此爲罪案。乘機網打。欲售其計。橫被醜詆。請罷臣職。已上皆答領相曰勿辭

李德馨欲極論時事。恐禍延老父。趨起不敢決。父知之曰。子早年立朝。位極人臣。死生休戚。當與國同之。何乃有懷含忍。辜平生忠愛之志乎。領相於是拜哭。永訣。上筮論事。言人所不能言。天怒震赫。且有三司合啓請罪。命削官職。門外黜送。領相即日馳出楊根庄。連日不食。晝夜號泣。未旬日發病卒。光海聞而悼之。乃令復秩。停朝市。賜禮葬。吊祭。領相方出楊根時。到江頭。有大虎。俯伏馬前。先導而行。至家而去。鰲城輓漢陰。領相自號淪落村閭。舌欲捫。自公長逝。暗銷魂。題詞不敢分明語。薄俗窺人喜造言。時鰲城亦以全恩之責。罷散村落。聞漢陰棄世一國含血無不隕淚。况白沙之同。時傳誦莫不欽嘆。○遼東遣李差官。傳指揮于本國。巡檢兩西而還。○兩界膏雉飛入京中。不可勝數。或有死於市井云。

甲寅

春正月元日。三暘在東。白虹貫日。○以鄭沆爲江華府使。沆又爆殺永昌。○京山僧海寧過吏判趙挺家。言國事如此如此。公何如此如此。盡論薄

待天親殘傷同氣之事。挺入告。按寧殺之。寧必與挺有知分故言之言之實。意也。吟詩而悼之。無父無君。味大倫。誰知胸裡。前正言鄭蘊疏。嗚呼。以有偏仁。滿朝肉食。皆含舌。可惜敢言。獨殺身。

殿下仁聖之德。不幸遭人倫之變。欲盡其處之之道。而終不得自由。未免假手於龔悍之武夫。其爲聖德之累。不旣大矣乎。今之論議之罪者。一則曰禍本也。一則曰奇貨也。其言固不爲無理。而試以濟王竑之事。援而比之。則亦有說焉。濟王初爲皇太子。見嫉於奸臣。退處藩邦。未幾。爲賊徒所擁。黃袍加身。約誓已成。雖知其事之不濟。旋有討平之功。而身負惡名。則有之矣。以今觀之。當時禍本莫若竑也。凶賊奇貨亦莫如竑也。彌遠陰謀殺之。可謂有安社稷之功。而時人冤其死。後世非其殺者。何歟。觀夫真德秀之言曰。三綱五常。扶持宇宙之棟樑。而奠安生民之柱石也。人而無此。冠裳而禽犢。國而無此。中夏而夷裔矣。其言之痛切如此者。誠以竑之跡。雖或云云。而其心無可疑。故原其情而雪其冤。因請追封立後。古之君子。不計一時之利害。惟論義理之當否。而惓惓於倫紀之或紊君德之或

愆。告戒而勸導之者。爲如何哉。今璣一王子耳。心跡與此懸殊。只出賊口。未嘗有擁立之跡矣。蒙無知識。亦安有謀逆之心乎。如使德秀之輩立乎本朝。則其不肯請殺明矣。恭惟殿下深憐童子之無知。仰體先王之遺教。思所以保護安全之者。蓋無所不用其極。百僚盈庭。三司交章。自去年迄今春。凡幾日月。惻念難遏。俞音終闕。嗚呼。殿下之於璣。豈不知其終不相容也。然而留時引月。愈久而愈拒者。豈不以逆賊之子。猶有待年之事。況於幼稚之弟。豈忍遽施刑杖。安置江都。待其年長。觀其志行之如何。而徐爲之計。未晚也。聖意所在。灼然可知。而推鞠諸臣。經年入侍。無一人將順其美。三司多官。善爲雷同。無一人愛君以德。其視君德之得失。不翅若越瘠之秦視。噫。殿下之勢。可謂孤立而無助矣。尤可痛者。殿下待之以不死。鄭沆待之以死。朝廷論之以其法。鄭沆迫之使死。使殿下不能如大舜之處象。而未免爲漢唐以下人君處置。未盡合理之歸焉。噫。殺人者死。國法至嚴。凡殺人無辜。猶且罔赦。況殺吾君同氣之親乎。

臣愚以爲。不斬鄭沆。恐殿下無面目入於先王之廟廷也。嗚呼。既往之咎。猶不可諫。將來之美。庶或可追。生不相容者勢也。死有贈典者情也。昔宋太宗之於廷美。既置之死。而旋有封爵恤孤之恩。真宗之於元祐。只誅首謀。而追封於久廢之中。此盛德事也。仁人之於弟也。不藏怒焉。不宿怨焉。況殿下之於璣。既無可藏之怒。焉有可宿之怨乎。其死之冤。路人猶悲。況殿下哀痛之懷。當復如何。近日玉候之靡寧。知其出於哀傷之過也。臣愚以爲。宜命有司。追復永昌之號。葬以大君之禮。又下哀痛之教。使四方臣庶。昭然知殿下至誠友愛之本心。則上可以慰先王在天之靈。下可以解萬民聽聞之惑。傳之後世。亦將有辭。今日清明之朝。必無章壑之檄詔。殿下何憚而莫之爲乎。抑臣之私憂過慮。又有甚於此者。不得不盡其說焉。善乎宋臣韓琦之言曰。父母慈而子孝。此常事不足道也。唯父母不慈。而子不失孝。孝乃可稱。大妃雖或不慈於殿下。殿下安得不盡孝於大妃乎。況璣已死矣。復何疑間之有哉。設有當誅之

罪如管蔡。可廢之惡如武后。爲言官者。所當先議同僚。次通他司。上告大臣。下詢諸宰。待其議論歸一。然後發於啓箚。乃所以重其事也。頃者鄭造尹。訥丁好寬等。首發廢母殺弟之議。而不議於同僚。不通於他司。不告於大臣。不詢於諸宰。而竊發於完席之上。遽曝於避嫌之中。曾不若論人守令。劾一庶官之爲。猶或持難。此其心不難知矣。蓋自近年以來。倖門一開。勳名大濫。貪功樂賞之徒。接跡而起。至以吾君之至親爲自己富貴之餌。比如逐獸者。擠人獨走。冀得先殺之名。噫。爲人臣者。是可忍也。誠願繼自今。斥折奸邪之言。杜塞交構之路。如有奸細之徒。敢以不好語及於大妃。則付有司。論以重律。殿下亦宜供爲子職。不廢問安之禮。毋怠視膳之誠。務得大妃之歡心。重見母子之如初。則豈不足以掩前失而明新和乎。臣本以孤遠之蹤。猥蒙聖明之知。既忝勳盟。又側清班。自料材力無他報效。惟將勿欺犯三字。爲平生事君之節。而竊自負於莫如我敬王之義也。方大論之發。或在罷散。或以疾病。一未隨叅於百僚之後。日者人

言罔極。目以護逆必置之死地。臣自念職非言責。堂有老母。與其徒死於讒鋒。曷若一言而死於雷霆之下哉。力疾就列。一啓乃退。思懷尺疏。仰叩闔闔。庶幾曝微臣之心。補袞職之闕。構思未就。以至今日。不及揀正之罪。臣實有之。請殺無辜之罪。臣亦難免。伏願殿下先正臣之罪。以彰其不忠。臣雖萬殞。不敢怨悔云云。疏入。被罪竄濟州。原任沈喜壽左相鄭昌衍。交章申救。不報。自後稱蘊之義者。輒指以逆人。莫敢言。後癸巳蒙恩以司諫還朝○鄭仁弘陳箚。比慈殿於哀姜文姜。力請廢黜。

秋慶基殿成。遣左承旨李好義禮曹叅議金闔于寧邊。奉 辟容于全州。九月十八日。奉安于本殿。二十一日。設庭試。壬辰奉往寧邊未還○命禮曹查覈京中及八道科榜。時科弊尤甚。字標相應。預題宿構。塲屋通頭。故考官必擇親厚權勢。納賂之人。舉子不關能通涉妙作。只以枉得爲務。一榜之中。公道十無二三。此皆李爾瞻金闔許筠三賊所作。備而爾瞻爲禮判。查考亦無實焉。○進士邢孝甲連疏請殺鄭蘊。孝甲居昌人蘊安陰人受學於蘊且有戚分○進士宋

興周前正言吳長上疏申救鄭蘊俱被罪。○前大司憲鄭述前兵使郭再祐請尊奉大妃不報。

乙卯

李元翼上疏請尊奉大妃。曰。臣以前朝老臣。忠不及於鄭蘊。死未先於德馨。負國欺君。萬死難道。尹訥奮臂請殺。不允。鄭造等論斥不已。乃命罷黜。中道付處。久留忠原。常自仰天太息。親舊救給。升斗不受。自織葦席。以奉家人。○東學儒生趙慶基等疏。伏以。臣聞孟子曰。非堯舜之道。不敢以陳於王前。古今天下。明君誼辟之。可稱道者何限。而必曰堯舜者何也。君不能以堯舜之道自處者。不盡君之道者也。臣不能以堯舜之道引君者。不盡臣之道者也。今者國運不幸。連遭禍患。亂逆之變。交發而并作。推戴之秘計。擁立之兇謀。指摘於璣。則此宗廟之禍根。臣民之大讐。殿下雖以天倫之重。同氣之親。其於王法。不得出入者也。至於慈殿。非璣之慈殿。乃殿下之慈殿也。則不可以璣之故。有所輕重於其間也。

爲臣子者。誠宜導聖明以堯舜之道。躋聖明於堯舜之治矣。進士李偉卿等首倡陳疏。醜詆母后。前掌令鄭造。尹訥之徒。誣引經傳。同惡引避。觀其悖惡。固有紀極。或比於哀姜之遜于邾。哀姜之嫁于魯。莊公不能防閑其母。越禮逾時。取仇人之女。則人倫之始。旣不能定。故及後通慶父弑二君。爲魯臣子者。義不可共戴天。是以經書遜于邾。薨于夷。齊人以歸夫人之喪。至自齊者。所以深絕哀姜也。先王之嘉禮。可謂亂人倫之始者歟。慈殿之過失。亦有哀姜之惡者歟。或比閔后之遷離宮。閔后之失。雖不一而足。孫程之弄權。旣非君子之自處。廢立之舉。又非濟陰之與知。則敢以爲證於當代耶。設令三賊之說皆是。父爲子隱。子爲父隱。直在其中。故爲尊親賢者諱者。亦春秋之義。則不當向殿下而倡慈殿之失也。然則其曰母子之道絕矣者。何所取也。其曰顯有當絕之惡者。何所指也。其曰其將以國母待之歟者。何所見也。三賊之於先王。豈無恩遇者也。今日之負先王。亦他日之負殿下也。雖然。三賊之兇悖。固不足道也。

大臣 殿下之股肱。而視之而不言。三司 殿下之耳目。而安之而不諍。政院 殿下之喉舌。而順之而無納誨之道。只以論議立異爲功能。遞易本職爲事業而已而止。則其他隨行逐隊。旅進而旅退者。尙何足道哉。諸葛亮謂漢後主曰。侍衛之臣。不懈於內。忠志之士。忘身於外者。蓋追先帝之殊遇。欲報之於陛下也。彼大臣及三司政院之官。皆先王殊遇之臣也。所當圖報於殿下之朝。忘先王之眷遇。狃三賊之兇悖。使天討不行於有罪。兇喘假息於兩間。臣等謂大臣三司政院舉有罪也。嗚呼三賊萬無可售之理。然渠之設計。則萬代之後。使殿下爲何如主也。然則彼李偉卿鄭造尹訥等。不惟殿下之罪人。實先王之罪人。不惟先王之罪人。實萬古綱常之罪人也。臣等故曰。不斬尹訥等三賊。則三綱淪而九法斁。禮樂崩而夷狄橫。幾何其不爲禽獸也。臣請李偉卿鄭造尹訥等。付之有司。置諸極典。以慰社稷在天之靈。使一國之人。咸知大聖人純孝。豈不盛哉。豈不快哉。○生員鄭昌言疏。伏以無賴人趙慶基等。聽人指喉。假

托儒名。紹述永慶救護悌男。乃以綱常罪名。加諸討逆之人。削籍館學。儒生數十餘人。必欲盡殲一代義類而後已。吁亦慘矣。所謂綱常之賊者何也。爲君父嚴討逆者賊耶。背君父護亂逆者賊耶。以渠之罪。反加於人。臣未知孰果爲賊耶。當初永慶謀危國儲者爲璣也。逆肆之構亂宮闈者爲璣也。直哉只引太慶者諱璣也。三賊之謀。悌男無不預知。而三賊之所恃以爲逆者。亦悌男也。悌男據國舅之任。挾大妃之勢。內以逆璣爲奇貨。外以三賊爲羽翼。及三賊繼戮。又與羊甲等陰圖不軌。欲售前謀。幸賴祖宗默佑。兇跡敗露。逆徒駢首就戮。悌男獨保支體。罪人旣得而失刑。大義欲明而還晦。神人之憤。至此而極矣。諸賊之招有曰。慈殿有已物。豈不給哉。慈殿雖夫人。度量不如府院君矣。又曰。守宮將士奉大妃教書。某日舉事。又曰。下遺教聚長安城中人。掩襲東郊。奏聞天期。名正言順。又曰。圖出大妃教書。推戴大君。伏奉舉事。又曰。上達于大妃。圖出內軍器。又有垂簾聽政金帛出給等說。外應逆謀之跡。如此其明白。至於

咀呪之事。雜出於高成應璧等招。其邪穢兇怪之物。狼藉於宮屏之間。耳不忍聞。內作巫蠱之狀。又如魯之哀姜。預弑二君。幾於亡國。則經書姜氏遜于邾。胡傳以深絕之。漢之閹后。廢太子。貪立孺孩。則綱目書遷太后於離宮。發明以罪辭稱之。彼引以爲說者。非敢以此爲證。欲行於今日也。先王擇賢立德。置諸儲位。功著中興。業承大統。而大妃欲立已出。謀害聖躬。是違先王之志。聖上踐祚。皇冊所封。國儲正位。帝命是膺。而大妃百計謀害。欲立二君。是棄天子之命也。此古今天下所未有之大變也。通謀賊臣。矯稱遺旨。聖上置而不問。已過五年。咀呪巫蠱。遍滿宮闈。聖上諱而不言。俾勿傳播。此無非聖孝出天。欲掩慈過。以身當禍。終始不怠。而大妃猶不感動。謀害至此。則人母之恩。亦已絕於殿下也。今日之臣子。乃先王之臣子也。乃殿下之臣子也。社稷爲重。君爲輕。大妃於殿下。有三從之道乎。傳曰。魯之臣子。義不共戴天。今日之臣子。當何以爲心也。永慶餘孽。悌男黨類。尙側朝端。多執要權。兩賊

親屬。連結中外。雄唱雌和。首尾一身。義理晦塞。綱紀滅絕。不知討逆之嚴。唯以護逆爲事。故太學生李偉卿等。獨懷憤疾之心。敢陳忠義之言。掌令鄭造尹訥等。因此疏欲陳處之啓。而爲同席所沮。避嫌之際。忠憤自激。未免措語率爾。而要其結末。則只以各處兩宮爲言。玉堂所謂同出愛君之誠。深明處變之道者。是也。廢之一字。初不出於偉卿等。亦不出於造訥避嫌。彼兇悖之輩。從何做出此語。以爲陷人之大機。穿乎。疏儒所引遜于邾。張柬之等語。亦有所見。昔孔子修春秋。屢書國母之事。直書不諱。孔子魯之臣子。魯乃夫子父母之邦也。聖人豈不知君臣之義。而必以直書者。非欲以臣而罪其國母也。誠以諱之。則倫紀將絕。大義不明。而國非其國矣。偉卿等亦學孔子者也。豈不知臣子之分義也。所以直書。大妃之事者。繼春秋不諱之義也。沐浴請討。穢者。取綱目嚴討逆之義也。其所引之語。實出於此也。安有以臣子而對嗣君。敢廢母之言乎。古之聖賢。有完廩浚井。捍笠匿空而出。亦有大杖則走者。况人主一身上。以承宗社。下以托臣

民。一身之安危。即一國之存亡也。苟有肘腋之變。蕭牆之患。迫在朝夕。則寧處之晏然而不爲移避之計乎。母子之間。同處者常也。而一朝移避。自非處人倫之大變。則不可也。人倫大變。事涉暗昧。則雖在一世之人。必有不知其曲折。尙有疑之者。況在後世。愈久而愈疑者乎。此偉卿等不得不引經史大義。并及於討璣之舉也。偉卿等愛君之誠。至此已極。而兇悖之徒。指偉卿等爲倫紀之賊。所謂賊者。不知以直書母后爲賊耶。是春秋之罪人也。以討璣爲賊耶。是綱目之罪人也。此不過摭撫疏中之語。做出廢置之名。欲爲綱打之計矣。此殿下之所洞燭。一國之所共知。豈待臣等區區之卜乎。且兇悖之徒。假托倫紀之說。脅制君父之心。使殿下嫌於是非。不敢出言。而渠敢掩蔽大妃之事。眩亂處變之道。起疑於當時。取譏於後世。此可謂忠於大妃。而不忠於殿下者也。嗚呼。偉卿等之直書母后者。欲殿下之善處變也。其爲殿下大矣。兇徒之諱言母后者。欲殿下之得惡名也。其負殿下也深矣。其所以諱之者。乃所以扶之也。

扶之者。扶母后也。扶逆璣也。其心在於扶璣。則此實永慶逆肆直哉悌男之餘孽。而將爲後日地也。倫紀之賊。非此輩而誰。兇輩所以極力攻偉卿者。必欲使殿下不敢自言。使國人亦不敢開口。而坐殿下於咀呪巫蠱之中。而不能避。甘受其毒而後已。此輩陰謀害上。有甚於稱兵犯闕者也。噫。韋布之士。耳目之臣。忠義憤激。如偉卿造訛者。有幾人乎。此則殿下之臣子也。彼攻偉卿造訛等者。皆永慶悌男之餘孽。此則大妃與璣之臣子也。以大妃與璣之臣子。攻殿下討逆之臣。宜無所不用其極。偉卿造訛等。雖死於凶悖之手。爲宗社也。爲君父也。死亦甘心。第恐殿下之臣。一網打盡。左右前後。無非永慶悌男之餘孽。殿下孤立無依。將何以爲國乎。恒福所謂。豈不太寂寥者。將驗於此矣。慶基疏入之後。太學生鄭復哥等。力主邪論。首倡兇議。以得罪綱常。作爲題目。削籍生員李偉卿等十二人。即爲通文四學。盡削前日叅疏幼學黃德符等八人。又將陳疏繼請三臣之罪。脅制君父而爲快。倫紀之賊。果有大於此者乎。戊申年間。

永慶以離間兩宮爲罪案。構陷士類。今者餘孽又以動搖。慈殿爲執言。網打正倫。陷人之目。前後一揆。紹述之稱。渠安得免乎。嗚呼士類。夫豈有私怨於彼輩。每以討逆。見憎於亂逆之徒。伏弩連發。幾死者數矣。而所恃者。聖明也。所恃者正論也。殿下若不明好惡。卞邪正。使鬼恠之輩。跳踉於白日之下。則是非不明。逆順無別。亂靡有定。國隨而亡。可不痛哉。可不懼哉。伏願殿下。體離明之斷。振乾剛之威。痛斥慶基之邪論。亟治陷人之罪狀。一以正倫紀。一以安社稷。云云。逆黨昌言。不但陷賢士於罪網。至欲引其君於邪徑。人可欺也。天可誣乎。今雖如是。後將奈何。黃德符李偉卿其中尤極兇險。首發廢母之論。同惡登科。爲大北鷹犬。驟登清要。○除拜郡守邊將內職外任。銀程洞開。多少有限。吏判則價高難擬。故與叅判俱闕。獨叅議李挺元阿附兇黨。締結宮掖。獨政七八年。富擬王公。上自監兵水使。下至權管察訪。千兩百兩皆有分數。從直注擬。落點亦同是數。金尙宮執筆擅斷。上不得自由。六侍衛十昭媛。聚首乞點。瞰尙宮之無金。來則散。嗟嗟時事。笑至此哉。貸銀于市井。微價于民。結○北

青門岩穴流出。如酒餅之物。食之依似真。又有家猪產人石佛動舞之言。六月大赦。親行祈雨祭。○夜書于都承旨韓纘男門云。明經賢士盛於斯。二百年來始見之。七大文通從自願。暗中蹤跡鬼神知。纘男與李許結爲。心腹大爲國試之。變。宜不失天理之常。而或不得爲人倫之至。似有未免後世之譏者。其爲聖德之累。不旣大矣哉。臣聞人倫有五。而父子居先。故百行之源。孝一字而已矣。舜之所以爲法於天下。可傳於後世者。以其有頑嚚之父母。而克諧以孝。能使底豫而已。若使瞽瞍無有頑嚚欲殺之心。而舜之所以事之者。又無蒸乂克諧之誠。則是舜之身上。固無大孝之名。而法不爲於天下。傳不及於後世矣。慈殿雖不慈於殿下。而殿下獨不能以大舜之所以事親者事之乎。今之數慈殿者。一則曰。母道已絕矣。一則曰。顯有當絕之惡。痛矣哉。言乎。夫人子言父母之過。雖於閭巷小民。且有所不敢爲。而敢於吾君之前。忍舉慈母之惡。是以不敢對閭巷小民者。待吾

君不以爲法可傳之道。望吾君也。不敬莫大於是。宜置大不敬之律。而律不加。爵帶華顯。此臣民之所以駭耳目。崩心志。不能自己者也。惟其如是。故國言藉藉。置疑於不當疑之地。見聞所及。不敢以隱。致有元翼之筭。則聖批有曰。不肖之尊奉。百僚之朝謁。無異前日。而卿於何處得聞荒說。形諸文字。以駭衆聽云云。臣私語於心曰。我殿下至誠尊奉。如此其極。而猶不免云云。則言之罔極。何至於是。莫不以元翼爲老妄。而不復致疑於殿下矣。奈何移御以後。兩宮各處。視膳久闕。定省亦廢。一念誠孝。雖或無減於前日。而耳目聞見。或不能無惑於臣庶。此臣之所以引領跂足。欲殿下庶幾者有月。而惻念無聞。曉征終闕。臣之惑至茲而甚矣。記曰。父母之所愛亦愛之。至於犬馬盡然。況於人乎。以此觀之。則殿下之於大妃。在所當愛乎。在所不當愛乎。先儒有言曰。舜之所以能事瞽瞍。底豫者。共爲子職。以期底豫之地乎。嗚呼。大妃乃殿下之慈母也。母子恩情。天賦常性。寂寥舊宮。與鬼爲隣。隔離天日。三月于茲。憂危心事。血泣

形影。則先王之以大妃托殿下者。必不欲如是。而乙夜之間。殿下之心。亦無惻然於中乎。臣以爲不奉。大妃於一宮。不奉定省之禮。不行視膳之誠。惟罪元翼。以爲昭雪之地。則是猶用湯止沸也。烝又克諧之孝。爲法可傳之道。恐不如是也。嗚呼。九重天闈。深拱冕旒。大小外間之議。何以知之。其爲臣子者。所當遑遑汲汲。知無不言。而乃其職也。而大臣無納誨之道。三司有逢迎之意。留時引月。無一人語及。乃使至孝之聖心。以至於漸不克終之舉。則將焉用彼大臣三司哉。伏願殿下留心於母子之情。無惑乎奸邪之言。奉養慈殿。更見如初之盛德。則豈不足以掩前失而明新化乎。噫。前者疏儒。亦慮有今日之舉。而語及慈殿。重被雷霆。自此之後。人皆結舌。以言爲戒。殿下不見其形。願察其影。臣聞癸丑秋。答執義申景洛啓辭曰。平時大妃移御別宮者多矣。臣固知有各處之心。而未見其終。只自私痛而已。及其移御之後。即當陳疏達懷。而看過今日遽至於此。不急求正之失。安得免也。伏願殿下先治臣遲緩之罪。

又責大臣之不言。三司之不爭。繼下哀痛之詔。使一國之人。咸知大聖人誠孝與虞舜無間焉。則不但明萬古既壞之綱常。傳之後世。亦將有光矣。伊尹曰。我不能使是君為堯舜。其心愧耻。若撻于市。孟子曰。我非堯舜之道。不敢進於王前。堯舜之道。孝悌而已。臣之所言。實出於此云云。稷時年二十大北奸黨以承宗所喉繫獄多年刑○進士蘇鳴國益山人賦性陰險。處鄉多悖惡之行。居館有凶邪之事。本郡士子連名疏告。兩司臺官合啓請罪。逮下義禁府推鞫。鳴國密告曰。掌令尹趙正言楊時進等。與府使申景禧。潛謀不軌。擬推戴綾昌君。臣聞知其端倪。故先除臣欲滅口。即拿趙等諸人。鞫問不服。並置極典。安置綾昌君于喬桐殺之。鳴國蒙宥。其後以怨望死。綾昌定遠君之第二子

閏八月十三日。成陵附太廟。上尊號隆奉顯保懋定重熙。設增廣。光海親母曾於庚戌受○八道大饑。命許各道災傷半減公債。以待有年。○星州人李昌祿痛光海薄待。慈殿有言。人之無良。我以為君。鄭仁弘上變。拿鞫殺

之。論以大逆。革本府附高靈。未久降為新安縣。○生員李慶林疏。景禧逆狀。已盡昭著。而三司曲庇。至死相救。問事壅蔽。任意筆削。推官亦為積威所恟。觀望聲勢。竊恐罔測之變。卒起於朝夕。而有不及救者。臣等於昨日往泮宮。以討逆之意。發論於食堂。則齋任及其徒數十人。相顧厲氣高聲。而扣之。食堂後屯聚兩齋。嚴防下人。使不得往復。臣等不得已。更入齋房。申之以討逆之意。坐中之人。或有酬酢者。而獨生員申垵攘臂大言曰。平陵豈是逆賊乎云云。臣等憤惋而出。宿泮村。今日焚香後。入叅齋會。復發昨日所論。則其徒黨同聲唱和。數十多士盡為削籍。一時驅逐。沮遏公論。嗚呼。太學賢士所關。而今為護逆者所據。使討逆正論。不得上徹於九重。今日之勢。可謂危矣。伏願殿下。快施乾斷。亟治館儒。恟逐多士。營護凶逆之罪。使堂堂討逆大義。復申於天日之下。則宗社幸甚。○進士閔澈疏。國家不幸。逆變繼起。羊甲纔伏常刑。景禧又發今日。宗社之憂。臣民之痛。庸有極乎。景禧之於蘇鳴國。糾結親比。合為心腹。朝為兄弟。暮作仇敵。撲

殺之計。猶恐不及。其欲滅口之狀。敗露無餘。且尹趙以景禧一家之親。鼓唱妖說。叩成凶謀。其間問答之語。有不忍聞者。沐浴之討。不容少緩。而三司結舌。敢爲歇後之語。侮弄君上。一至於此。討逆之義。果如是乎。伏願聖上。快加雷斷。以嚴討逆之典云云。○生員李顯門疏。景禧獄事。招辭歸一。三司循私。擬以誣告咫尺天威。恣行欺蔽。其心所在。有不可測。臣忠憤自激。昂入太學。以陳疏討逆之義。發言於食堂。渠輩相顧。大言折之。使不得發論。食堂既撤。禁其下人。使不得私通。臣入言於齋中曰。爾等景禧之黨。極力營護。罪可免乎。渠輩揚臂而言曰。汝叅鄭澤雷凶疏。汝是護逆之人。何發討逆之論乎。臣曰。景禧主張廢。大妃因其人心之失。欲舉不軌之謀者。出於鳴國之辭。廢。大妃事我自當之云。則以。殿下至誠無間之孝。致此閭巷云云之說者。無非爾等之譸張也。渠輩橫加齋罰。削名儒籍。盡爲驅逐。其計不亦慘乎。伏願快施乾斷。亟誅兇黨。幸甚。○生員許從善等疏。月初一日焚香後。東西齋掌議生員柳昌吉邢孝甲等。方議討逆。

生員李顯門李泓李慶林進士柳淑權純慶等十餘人。亦在諸生之列。許國等突入昌吉前。大言曰。汝等能討逆乎。昌吉曰。永慶危。宗社。我等討之。悌男謀大逆。我等討之。賊蘊洪茂績澤雷孝誠賊稷等。捏造無根之言。陷君不測之地。我等皆討之。前後討逆。果非吾等事乎。顯門曰。先除景禧之黨。然後可議。昌吉曰。汝等乃澤雷凶疏中餘孽。慶林乃告廟賊宋驊妹夫也。亦一逆黨。安可以逆討逆乎。顯門大倡曰。汝等贊。主上廢。大妃失人心。吾等救。大妃收人心。何者爲逆乎。在座七十餘人。咸憤曰。吾等今當討逆。可以先去目前之賊。乃削顯門等六人。噫。顯門之罪。豈止於削籍而已哉。孝誠昌祿之凶。亦未有甚於此。伏願拿致嚴鞫。以正常刑。國家幸甚。從善顯門未知其孰是孰非而先看從善賊蘊賊稷等語○鄭仁弘後觀仁弘欲殺顯門元翼等言則從善真是凶黨中卒徒○鄭仁弘以左相赴京。上曰。卿上來。國家之福也。仁弘曰。近年逆獄踵起。聖上每在憂慮中。小臣晝夜煎悶。上曰。由予不德。逆獄繼起。日夜憂慮。罔知攸濟。仁弘曰。治獄不嚴。誣告者不施反坐之律。故初爲嘯聚之賊。及其被繫。以

逆自處。以爲偷生之地。故逆獄踵起。臣在鄉家。駭聞昌祿事。今來都下。聞亦有如此之變。大小之人。皆懷二心。至於儒生輩。在首善之地。發盜跖之言。不得已討逆至嚴。刑一人而千萬人懼。可以止逆矣。上曰。治獄不嚴。何指而言耶。仁弘曰。嚴畏之下。咸服其罪。雖無可言。而若網漏吞舟。則細瑣之徒。日殺而無益。古人曰。雖雷霆之威。日日轟轟。則人亦不畏。人臣於君父之前。不可進以刑殺之言。然一心循國。舉朝纔一二。而懷二心者。十常八九。使人君孤立於上。豈不寒心。上曰。人心何以至此。仁弘曰。臣於戊申年間。見護逆者多。討逆者小。人心携貳。分爲二黨。只以排擊爲事。不以國事爲念。悠悠度日。民心安可收。天意安可回乎。上曰。何以則保民乎。仁弘曰。以誠愛民。民亦盡心。樂民之樂者。民亦樂其樂。憂民之憂者。民亦憂其憂。君民一體。豈有異哉。臣在太山長谷中。不知民事。在途始見之。則無一畝一束。可以收穫。湖南尤甚。十三邑之民。皆流散。散之四方。乘船沿南海。入慶尙道云。此等百姓。無救活之道矣。今之賑飢。萬無長策。以慶

尙道觀之。巡察使買販屯田。別措備之穀數多。以此賑貸。則庶有一分之惠。而巡察使視以私物。不爲國用。若非此穀。尤無賑活之路矣。承旨金闔曰。都城內國儲亦竭。無頒祿給料之路。仁弘曰。國無三年之蓄。非國矣。況無一年之儲乎。上曰。江華之穀。何以乏耶。金闔曰。還上分給後。士大夫在京受食。年貧不能即納。以是欠縮云矣。上曰。近觀朝廷風色。以黨論爲尙。不見其有憂民也。仁弘曰。聖教允當。植黨固不可。亦不能無黨。君子以君子爲黨。小人以小人爲黨。先卞君子小人。則國家扶持。百姓便安。只在明用舍而已。金闔曰。左相所奏。討逆不嚴之說。誠至論也。先朝鄭彥信以政丞干連逆獄。不饒刑訊。人臣小有所犯。則死不可貸。若果冤枉。則即許申雪可也。仁弘曰。亂逆非匹夫之所可爲也。其勢力足以操權擅命者之所爲。闔曰。昌祿雖已正刑。而趙稷輩至今保存。只在縲絏之中。此亦治獄不嚴之一也。仁弘曰。此輩不須更論。顯門等言元翼之論有甚矣。上曰。當令禁府處置。金闔曰。趙稷年少。似無知識。必有指嗾。而囚久不

問。今雖鞠問。必已彌縫矣。上年盲人告變。囚公洪道人百餘名。而忠原之人尤多。其時盲人下送本道。對辯之際。行到天安。不意身死。不能面質。經年未放。臣恐上年之旱。未必不由於此也。仁弘曰。喚御史已為承服。李雲祥之罪極大。不即正刑。不下一杖。止於定配。此亦召天怒也。顯門等在囚。係云。此兩人亦如昌祿正刑云。上曰。卿所言皆當。體念。因命便坐。賜品。饌行四爵。上曰。旅寓荒涼。卿可以此服之。賜給阿多叱介一部。徽皮紗帽耳掩一封。喚御史構海且使李雲祥妓也累年囚翰送中朝圖出立長以嫡之命云。雲祥譯官也。慘刑殺之。酷陳筭勸勉。使其重而弘道。債敗坐致。昭昭之患。不遠後命。為人君為人臣者。尚鑑于茲。轍。○仁弘筭曰。殿下問以亂逆之由。臣以為必罪首惡之人。又誅顯門等。然後亂逆息矣。而狂言歸虛。何面目更留城中云云。首惡指完平諸○十一月二十九日。三暘在東。白虹貫日。竟夕相持。晦夜天動。

丙辰

春正月二十七日。白虹貫日。○更設營建都監。作慶德壽聖兩宮。毀民家數千區徵督八道宮木調發。○殺海州牧使崔沂。先是韓纘男仇人在海州。纘男密送鷹犬。俞世曾于沂。百端誘脅。欲陷其人於謀逆。沂不聽。纘男自其逆狀。以沂為謀首。上變拿鞫。贊招沂父子。同日受刑。因加孥戮。緣坐之律。冤死者數百人。人莫不痛之。○設西江龍船充兵械。以備避敵。○申欽春川韓浚謙忠原。朴東亮牙山。付處。從仁弘除七臣計也十一月二十四日。三暘見。白虹貫日。○進士尹善道疏。伏以。臣聞人君御下之道。莫大乎摠攬權綱。故書曰。惟辟作福。作威。宋臣真德秀有言曰。為人君者。豈可一日失其操柄也哉。旨哉言乎。為人臣者。苟有專執國柄。使其腹心布列。要津威福出於己。設使賢而如此。猶不可也。如其不賢而如此。則國家不亦危乎。當今。聖上臨御。君君臣臣。宜無如此之人。而臣竊見禮曹判書李爾瞻所為。不幸近之。竊怪焉。臣一介腐儒。既愚且賤。雖居城市。有同遐氓。其於朝廷之事。百不知一。只以耳目所及。仰達冕旒。伏願

殿下留神焉。臣伏見近來爲股肱耳目喉舌之官。論思風憲銓選之任者。無非爾瞻之腹心。間有一二非其輩流。而參錯於其中者。必其爲人軟熟。行已脂韋。相持周容。隨波低仰者也。故凡臺閣啓辭。殿下必以爲出於臺閣。而其實出於爾瞻也。銓曹注擬。殿下必以爲出於銓曹。而其實出於爾瞻也。玉堂筍子。殿下必以爲出於玉堂。而其實出於爾瞻也。或承望風旨而爲之。或受其指揮而爲之。或雖事之可者。必須稟之。同然後爲之。至於館學儒生。無非其徒。故館學疏章。亦無非陽爲矯激。陰實附麗者也。夫如是。故異己者。雖物論所重。而必斥之。同志者。雖物論所鄙。而必用之。凡事稱是。雖難枚舉。可以類推。其爲專權亦云至矣。渠雖不在輔弼之位。殿下信之任之。渠當盡忠國家。如唐之李泌陸贄。而乃反負國如此。臣竊痛之。聖明深居九重。不知其專權之至此乎。抑雖知其專權。而以其人爲賢。委任不疑乎。如以爲賢而不疑。則臣雖愚暗。可以辨矣。臣聞后非賢罔乂。雖使聖君在上。而任用之臣不肖。則無以爲治。故以堯爲君。

而繇治水不績。是故國家治。則可知任用之臣賢也。國家亂。則可知任用之臣不肖也。殿下視今爲治耶亂耶。頃者日變疊見。地震累作。冬霧四塞。此皆災異之大者也。古人云。不見其形。願察其影。臣恐此乃當今之影也。日者衆陽之宗。而人君之表也。故曰。艮乃天行之常度。而春秋每食必書。書傳曰。或婦乘其夫。或臣子背君父。或政權在臣下。或夷狄侵中國。皆陰盛陽微之證也。况白虹貫日之慘。不可比諸日食。變不虛生。豈無所召。然真德秀之言曰。忠臣之心。猶恐人君不畏災異。魏相之以逆賊。風雨告宣帝是也。奸臣之心。猶恐人主知畏災異。國忠謂霖雨不害稼。以欺明皇是也。蓋人主畏天災。則必求已過。必更弊政。必去小人。此忠臣之所樂。而奸臣之所不便也。故其操術不用如此。近世王安石遂有天變不足畏之語。使爾瞻忠也。則已。使爾瞻奸也。則凡今之災異。或移於他國。或證以他事。或直謂之不足畏。而臣亦以高遠難知之事。必歸至於渠。故臣不敢多談。但當今邊圉虛疎。而國勢甚危。下民怨咨。而邦本不固。人心極儉。世道

日下風俗大壞。廉耻板蕩。上而簪笏之徒。下而市井之輩。臣不能詳知其所爲。而至於士子間。則臣所遊處。而日相接者。臣豈不知乎。挾册操筆者。徒知有侈祿。而不復知有仁義。至於科舉。乃士子發身之初。逕皆懷躁進之心。競爲苟得之謀。借述附勢。交主客之說。人皆公言無所忌諱。父詔其子。兄勉其弟。朋友相招。往而不返。滔滔皆是。而間有百中一二反是。則反冷笑之。譏議之。至於怒其異己。而詆毀之者。亦有之。嗚呼。士氣乃國家元氣。而至於如此。可勝痛哉。初見君父之時如此。則異日立朝。其患得患失之心。爲如何哉。臣愚以爲。殺父與君之賊。無則已。有則必出於此輩。忠君愛國之人。無則已。有則必不出於此輩也。先儒有詩曰。所用是人行是道。不知何日可昇平。臣嘗讀此詩。而仰屋竊歎者也。爾瞻得君。如彼其專也。行乎國政。如彼其久也。災變如彼。國勢如彼。民怨如彼。風俗如彼。士習如彼。是果賢耶。否耶。漢元帝時。石顯顯權。京房嘗見問上曰。幽厲之君。何以危。所用何人耶。上曰。君不明。而所任者巧佞。房曰。知其巧佞而用之耶。將

以爲賢耶。上曰。賢之。房曰。然則今何以知其不賢耶。上曰。以其時亂而君危知之。房曰。若是則任賢必治。任不肖必亂。必然之道也。幽厲何不覺悟。而更求賢。曷爲卒用不肖。以至於是。上曰。臨亂之君。各賢其臣。今皆覺悟。安得危亡之君。房曰。齊桓公秦二世。亦嘗聞此君而非笑之。然則任豎刁。趙高。政益日亂。何不以幽厲卜之。而覺悟乎。上曰。惟有道者。能以往知來耳。房因免冠頓首。盡言其時災異。及盜賊不禁。刑人滿市等事。曰。陛下視今。爲治耶。亂耶。上曰。亦極亂耳。房曰。今所任用者。誰耶。歟。上曰。然幸其愈於彼。又以爲不在此人也。房曰。前世之君。亦必然矣。臣恐後之視今。猶今之視前也。今我 殿下。亦將謂幸其愈於彼。又以爲不在此人也。歟。臣謂以 殿下之聖明。不如漢元帝見也。渠旣不肖如此。而專權如彼。末流之弊。有不可勝者。其禍之所至。臣不敢占也。至如科舉不公之說。爲今日不可諱之常談。而爾瞻乃敢發明。臣竊痛之。字標相應。試卷爲標。塲屋通頭。預出試題之說。頗多往來行言。而人之爲言。何可盡信。然前年式年之講

經也。畫數多者甚衆。至於優過十畫而下第者有之。殿下曾見如此之時乎。昔日學焉者。無不盡其力之時。而尙未聞多畫如彼其衆。而至今士風不古。人鮮勤讀之時。乃反如此。是豈理也哉。然則字標相應之事。不可保其必無也。今年別試殿試。考官之兄弟子侄。其族屬得叅者。多至十餘人。殿試雖無相避之法。自古豈有一榜中相避人得中者如許之時乎。臣恐爾瞻之利口。黃廷弼之巧舌。必不能得相避人及第者。如許衆多之時。而爲證也。然則試卷爲標。塲屋通頭。亦不保其必無也。泮宮之試。時刻有限。急於星火。故自昔雖有才藝出衆。積功最多。水湧山出。若或相之者。倒多僅得成篇。或因朋泮之助而足之。故雖其擅當時之才名爲一榜之壯元者。所作不滿人意。或有違簾之句。或多擦改之字。而臣觀今日泮試。懸題纔罷。名紙即寫者甚多。當今塲屋間。固未聞振古所無如此卓越之才。而設使自外臨時製入。則雖神相鬼輸。必不能如彼其敏捷也。而况厥後聞之。其所作頗有富麗不可容議者云。以理揆之。誠不可知。然則預題宿

構之說。其亦有所自矣。進士閔藻乃臣父同年之子。而臣未嘗見面者也。於泮試前數日。請臣之故舊前僉知宋熙業之書。來見臣之事文類聚。臣不欲盡秩借之。問其所欲看之卷。則曰清明節附卷也。其卷適在臣之書室。取而與之。藻曰。又欲見他卷。盡秩出之。問其所要者。則燈燭部也。臣曰。此則莊在親家。藻曰。令人取來。臣曰。無人搜出。藻曰。吾可往搜乎。臣曰。莊在內裏。非外客可搜。藻曰。子騎吾馬取來。臣曰。方對他客。不可去也。藻茫然自失。不肯起。良久無可奈何。持其卷而歸。入塲之前。僅得推來矣。後日入塲。乃逢榆柳火。考之事文類聚。則清明節所賜也。又於燈燭部。多有可觀之辭。臣始恠之。心語口曰。寶座親臨。天威不遠於咫尺。而敢爲預出之題。則無君之心著矣。爾瞻其至是耶。過塲之後。臣嘗見臣之七寸叔尹惟謙。語及閔藻之事。則惟謙曰。泮試前數日。有一友生。亦借此兩冊於吾處云。問其姓名。則亦爾瞻之黨也。臣素性踈慵。絕交遊間出入。於世百事。有同盲聾。而臣之所知。猶若此。則未知他人所見。復有幾多條款也。舉此一

隅而反之。則道路行言。似亦各有所據矣。爾瞻四子皆以預題借作。謀取科舉。國人皆言之。蓋以其四子或無衆所共知之才。連占壯元。或有全然不文。而取科第如拾芥故也。然而爾瞻徒黨。既以科第爲己物。則爾瞻子弟之事。不足多卞也。故臣不復云云。臣言之至此。固知不免於澆薄。且屬於細瑣。而科舉之如此。關係國家甚大。此不可顧也。爾瞻以官爵籠絡搢紳。以科第收拾儒士。勢焰薰天。舉世奔波。靜言思之。令人骨驚。昔齊田氏。雖無大德。而有施於民。晏子諫景公曰。家施不及國。大夫不收公利。夫官爵科第之施。如何粒米之施。搢紳儒士之歸。亦何如蚩氓之歸。眞德秀曰。田氏之禍。在公世猶可爲也。及其既久。則不可爲也。其可卞之不早乎。嗚呼。豈獨此乎。李元翼我國之司馬光也。李德馨一心循國之人也。沈喜壽雖無大端才德。而亦能特立不撓。其亦有關於社稷者也。爾瞻並嗾三司。論執不已。相繼竄逐。幸賴聖明曲全。不售招致廷尉之計耳。柳希春朴承宗。居家不約。律已不嚴。可謂龜庸者也。見爾瞻將危國家。而曾不極言。

竭論以死爭之。可謂惻懦者也。然而同爲國戚。各無大過。其亦以與國家同安危者也。而爾瞻視以仇敵。必欲中傷。其意慘矣。其所以陽爲和好。要絆昏姻者何也。渠與承宗。同是昏家。而亦不能相好。豈不知其無益也。蓋欲緩柳之心而圖之。且欲示人以若無勢畏柳而請好之態也。其計巧矣。古之欲專執國柄者。必先滅世臣公族。及其才能功德出於己者。然後乃敢肆其志。田恒趙高李林甫及其他小人之事。班班可考也。夫金悌男等爲逆之狀。昭不可掩。天地人臣所共誅者。李元翼輩誠非病風喪心之人。何心曲護大逆而負我聖上乎。爾瞻以護逆二字。爲一巨網。見其忠君愛國不與我同惡者。則便以此打之。一加此名。無言可白。無計可脫。小人傾陷善類。其爲計類多如此。吁。可畏也。洪茂績鄭澤雷金孝誠亦打此網。爲世大累。永杜言路。元以坤不知何許人。而犯一世之忌諱。敢言人所不敢言者乎。然臣亦得觀其疏辭。其言畏首畏尾。氣餒神疾。似不出於剛直也。况名竊洛陽少年之語。乃塗聽塗傳之說。而至塵於絀續之下。宜其

爲爾瞻飾詐自明之奇貨也。然草野言事之人。至於受刑。後日雖有危亡立至之事。誰肯舍生而言之。是故言者雖有狂妄之失。聖人不治。而銀臺啓辭。臺諫論列。竟至於桎梏圓扉。考掠受楚。此何異於李林甫諷御史殺陳璋乎。臣所謂喉舌耳目皆其腹心者。以此亦可知。其所以得布腹心於要津者。用何術也。我國古例。堂下清望。皆出於銓郎。堂上清望。雖非全出於銓郎。銓郎而沮之。則不得爲銓郎之任。不亦重乎。夫如是。故必須廣取公議。務得一代名流。望實兼備者。以爲銓郎。而人莫敢容私焉。朴弘道。朴鼎吉。於爾瞻如骨肉。於大燁等有同天倫。而爾瞻置兩人於銓郎。弘道少不如意。則斥之。且使其大燁益燁。相繼入銓。夫銓郎之重。如前所陳。而苟非爾瞻之如骨肉者。及眞骨肉者。則不能得之。以此推之。則前後銓郎。必其皆如骨肉者也。弘道鼎吉如骨肉。而置諸銓郎之語。亦非臣所做出者也。大燁爲執義時。啓辭中有此說話。此乃 聖明之所鑒也。夫銓郎皆如其骨肉及眞骨肉。則出於銓郎之注擬者。皆其腹心。不難知矣。以

此推之。凡科舉考官。亦必以腹心爲之也。至於館學儒生。皆爲其徒黨者。以科舉收拾故也。黃廷弼疏辭。似無異於漢人頌莽功德者。臣不忍見。嗚呼。爾瞻之黨。日繁於下。 殿下之勢。日孤於上。豈不岌岌危哉。然無一人爲 殿下言之。嗚呼。我國家三百餘郡。曾無一人義士耶。如柳希奮。朴承宗。義同休戚。而猶以全軀保妻子爲心。坐視君父之危而不救。其忘君負國之罪大矣。他人尙何望哉。伏願 聖明。細察愚臣前後辭說。更加睿照。先正爾瞻。擅弄威福之罪。次治希奮。承宗。忘君負國之罪。其他爾瞻徒黨。則或用盡除黨與之律。或用脅從罔治之法。 宗社幸甚。春秋傳曰。蔓難圖也。今已蔓矣。圖之實難。伏願 殿下。慎之慎之。臣雖至愚。亦非不卞黑白者。豈不知言發禍隨乎。洪茂績等。略不直斥爾瞻罪狀。而禦魅海外。元以坤少。陳科舉不公。而被謗下獄。臣之所言。俱非前輩之所陳。而舉一國無一人敢言者也。其禍之輕重。亦可坐而卜之也。眞德秀之言曰。奸人擅國。必先壅塞言路。使人主惛然孤立於上。而盲然無覩於外。然後得以恣

其所欲爲大而篡國。小而專政。無不可者。故李斯死而趙高肆。王章僇而王鳳熾。杜璉斥而林甫橫。此亦臣之所素知也。古者言事之人。君上含容而不之罪。則奸臣必須陷以巧計。或以佗事陰中而殺之。或竄逐而令守宰殺之。此亦臣所素慮也。聖人有言。遜之戒有保身之道。此義臣亦粗聞之矣。然而危言若是者何也。臣三世食祿。受國厚恩。脫有緩急。義不可不赴死於國亂。且念奸臣誤國如此。而國家之危難如此。南夷北狄乘釁而來。則雖欲避亂偷生。亦無善策。蹙蹙無所聘。與其死於無益之死。無寧今日爲殿下而死乎。殿下可臣之言。則宗社之福也。生民之幸也。雖不以爲可。而臣至於死。其於史筆有光矣。臣料之熟矣。但臣有老父。既老且病。悶臣爲此百般。喻止臣細卞死生之理。如上面所云。而又陳君臣之大義。臣父欲禁。則恐負國家。欲聽。則悶子就死。惘然而坐。默然無語。逮臣之辭出也。執臣之手。涕泣嗚咽。臣雖勇決。於此地頭。能不悲哉。伏願聖慈。雖置臣於重典。無使延及於老父。永爲天下後世忠臣孝子之鑒戒。不

勝泣血祈懇之至。臣所欲陳者。不止於此。而辭不達意。掛一漏萬。殿下於細氈之上。岑寂之中。試取大學衍義辨人才條。虛心細玩。則君子小人之情狀。尤了然。臣不知朝家格例。言多不次。尤不勝惶恐屏營之至。疏呈被竄。去咸鏡道慶源。行至洪原。有妓名趙生。持酒肴迎曰。余以子知有此行。善道吟詩以謝曰。吾事固非時。汝知吾不知。讀書不及汝。吾乃天生癡。

丁巳

癸亥蒙宥入爲東宮洗馬疏辭切至似盡時事而但少不及君上薄待天親之惡欠矣

慶運宮有投書。多有罔測之辭。領相奇自獻棄位。出去江陵。右相韓孝純呈辭出江上。爾瞻亦呈辭。上牌招之。皆復視事。許賊筠奸巧詐譎。與爾瞻表裡相應。陰懷逆謀。動搖國脉。投書交構。實筠所爲。慶運大妃所○幼學李洞疏。伏以。臣生逢聖世。沐浴清化。不可無絲毫報效也。且念凡有關係。宗社安危。而朝廷無敢言者。則其責當在於草野。豈可諉以出位而含默以負我君父乎。臣以近日疏儒尹善道之事。爲殿下略陳其梗槩。

焉。禮曹判書李爾瞻擅弄威福之狀。已盡於善道之疏。臣不敢更瀆。第爾瞻權傾一國。勢逼人主。道路以目。人莫敢言。而善道以一介書生。目見宗社之危。敢進瀝血之疏。凡有血氣者。莫不聳動。咸仰聖上廊揮乾斷。則爲爾瞻者。所當席藁待罪之不暇。爲其腹心徒黨者。亦宜恐懼之不暇。而爾瞻略無顧忌。益肆兇焰。至於三司政院之官。泮宮四學之儒。唯知有爾瞻。不知有君父。怒目攘袵。構虛捏無。必欲陷善道於死地。汲汲然猶恐或後。其心所在。路人所知。都承旨韓纘男者。父子不文。而取科第。人言藉藉。且其一子登科於前年式年。所謂字標相應。正指此人等輩。則尤當恐懼引避。而偃然仍冒。恣其胸臆。聖批未下之前。敢進凶慘之啓。上試君父之意。下爲立幟之地。昔我先王他日立朝。用心可知之。教至此益驗矣。噫。今日政院三司。非殿下之政院三司。乃爾瞻之政院三司也。今日泮宮四學。非殿下之泮宮四學。乃爾瞻之泮宮四學也。善道之所謂今已蔓矣者。不亦信乎。圖之不早。勢將安歸。言念及此。不寒而慄。彼所以

構善道者。其語雖多。其要有三。護逆也。醜行也。受人指喉也。夫護逆者。便是逆也。豈憂國忘家愛君忘身如善道者之所爲也哉。張軾有言曰。於犯顏敢諫之中。求伏節死義之臣。善道冒瀆嚴威。敢言權奸。則犯顏敢諫莫此若也。護逆豈此人所爲乎。彼所謂樹大功於逆黨。所謂爲永慶報效之地。爲悌男馘獄之計者。蓋欲惑亂聖上之聰明。而必置言者於不測之地也。其言極凶且慘。不忍聞。不忍言。而非臨之在上。質之在傍。聖明想已洞燭。不足多卞也。夫李傳芳疏中所構三司啓筭所捏善道父子惡行。皆是通天極地之罪也。而又曰。國言藉藉。設使此人真有此行。而國言藉藉。則削籍可也。停舉可也。風聞考掠可也。三省交鞫可也。渠之黨魁。專執國柄。渠之黨與。布列刑憲。而曾不爲此。今始言之。殿下深居九重。雖不知外間事。而以此思之。則其爲誣罔。了然無疑矣。善道極言權奸。豈不知奇禍之立至乎。死生亦大矣。其肯受人指喉而就死地乎。況其所謂其父之勸者。萬無此理。不須卞說也。其言憤發。凜凜勃勃。必非聽受於人而強

爲者也。然則其不受人指喉亦明矣。噫。譽爾瞻黨爾瞻疏。則何不受人指喉而言。爾瞻奸狀之疏。則獨謂之受人指喉乎。其爲羅織網打之計。昭然明矣。至於幽厲二世之說。京房援古引今。泛然所論。非特時君也。其言深切著明。最合於告君。故真德秀載之大學衍義。進於其君。爲人臣得如德秀之敬王亦可矣。是果可忘之語乎。夫善道被誣。非臣之所當卞白。而卞白此事。然後三司政院館學之同惡爾瞻。而構陷言者之意著矣。著此然后可知爾瞻徒黨之衆。勢焰之可畏。國家之危急也。夫如是。故敢陳其一二也。吁。古昔盛時。賞諫者以開言路。而敢陳者猶未易得。况置言者以重典可乎。治言者以重典。猶不可也。况於治言者之父兄可乎。世間不顧其身而敢言固鮮矣。安有不顧其親之被大禍而敢言者乎。臣愚以爲。小人壅塞言路之術。莫此爲甚也。自古直言觸諱於君父而被罪者有之。猶無緣坐之法。今善道於爾瞻。將被緣坐之法。信乎古人之言曰。言人主之過易。言權臣之過難也。以此推之。則三司政院館學之待爾瞻。可謂過於待

君父。而爾瞻可謂權傾人主矣。自古豈有權傾人主如此之極。而國家不危之時乎。臣之憂慮有及於此。而不勝憤惋憂懼之至。欲將尺疏仰叩闔闔。而爾瞻因人得聞。使其所親朴安謙致語於臣妻四寸大父盧稷曰。子未可止李洞之疏耶。其實圖之。又翰林徐國禎來見臣之妻五寸叔母夫李克讓曰。子未可止李洞之疏耶。洞若不止。必被重禍。且曰。子何不求官乎。吾當爲子圖于禮判也。夫爾瞻既喉三司。極治言者。又使所親刼止言者。何其欲杜言路。至於是乎。右議政韓孝純乃因收議之命。粗陳言路之重。其爲措語亦甚可哀。而三司詆斥。略不饒貸。所以首相言病不敢獻議。原任杜門莫敢問口者也。爾瞻之權勢爲如何哉。爾瞻之黨不能卞白爾瞻。擅弄威福。行私塲屋事。而每以孝友清白一心討逆爲言。臣竊怪之。夫孝者始於事親。終於事君。渠之事君如此。則可謂孝乎。夫清者不貪。權不樂勢。渠之專擅如此。則可謂清乎。又有一說焉。設使渠真有孝行。豈無他日。而渠身未死。先立旌門。職在宗伯。又撰已行。孝者果如是乎。渠之四子

文名未著。連捷崑科。家世素貧。甲第連薨。清者果如是乎。而况討逆乃天地之常經。人臣之大義。夫爲臣子。孰不盡誠。夫永慶以來。諸賊謀逆之罪。人人得以誅之。固非渠等所得請討。而貪天之功。爲己之力。且以護逆二字。爲陷人之機筭。其陽爲國計。陰斥異己之謀。巧且慘矣。景禧陰謀爲逆之狀。畢露於鳴國之招。屢屈於對卞之時。則其爲謀逆。無異諸逆。而爾瞻營護三司。噤默者何也。萬一爾瞻與景禧。素甚交密。而其子又出於賊招。故也。一心討逆者。果如是乎。爾瞻之黨。又以爾瞻有定策衛社之功。矜誇自古有大功於王室。而終不利於王室者。無其人乎。此不足深信也。嗚呼。自善道論權奸。奸黨以死自誓。蜂起嘅嘅。構陷之慘。如彼其極。而幸賴聖鑑孔昭。尙不能肆其兇計。中外之人皆謂。殿下已知爾瞻之罪。舉欣欣然有喜色。而相告曰。我國其庶幾乎。然而臣之憂懼。亦有甚於前日。其故何也。自古權奸。若知君上知其情狀。則死中求生之謀。無所不用其極。今我 聖上。既不從其言。而罪善道。則奸黨之心。爲如何哉。臣之憂懼有

甚於前日。其以此也。臣固知奸黨之構陷。臣身必如善道。而言之至此。無所忌諱者。蓋不勝愛君憂國之誠。不能自己。而亦有恃於 聖明之在上也。伏願 聖明。俯察愚臣危懇。洞燭善道之忠言。亟正爾瞻擅弄威福。肆兇焰之罪。且治三司政院館學黨惡。誣上之罪。以爲 宗社億萬年無疆之休云。疏入。光陽。癸亥。三月。蒙 宥配。

二月。江原監司書狀。三陟府使呈雞兒孳息一雛。四足四翼。已成出羽者。朝報。○宗室龜川君晬。錦山君胤。伏以。臣等俱以宗戚之臣。其於朝著間事。有同盲聾。百不知一。而有或粗聞一二。而其害之不至於 宗社危亡。非臣等所敢言也。至於是非得失。有大關於 宗社危亡。則臣等皆是國在與在。國亡與亡之人。安得坐見 宗社之危亡。而畏禍含默。若越人視秦人之肥瘠乎。自近年以來。禮曹判書李爾瞻。奸回邪毒。偏愎巧詐。廣植私黨。屏黜忠良。擅弄國柄。威權日盛。附己者。則雖頑鈍無耻。言行悖理者。必引而進之。不附己者。則雖明經行修。爲世所重者。必斥而退之。勢焰

燻天。道路以目。忠良結舌而縮頭。邪佞攘臂而雲集。大小朝臣雖或不附於其勢者。若終始不謁其門。則鮮能保全。故夜則仰屋長嘆。晝則婢膝。其門如歸市焉。至於同惡之人。或有一二事小乖於其心。則百計陰中。必斥然後乃已。人之愛君。不如愛身。誰肯忘死生觸勢焰。爲殿下發一言乎。是以爾瞻之威。日盛於下。殿下之勢。日孤於上。危亡之禍。迫在朝夕。而殿下無從而得知也。縱有忠臣義士發憤慷慨欲陳如此情狀。而言發於口。大禍立至。徒死無益。故至於父子兄弟同坐一房之中。言及於爾瞻。則掩口揮手。以滅族相戒。嗚呼國勢至此。豈非大可憂者。草野臣尹善道。慷慨抗章敢言之事。雖宋之胡銓。何以加此。政院先發。三司繼起。四學泮宮同聲相應。一則曰黨逆。一則曰陷賢。所謂逆者逆於殿下耶。逆於爾瞻耶。其所謂賢者果誰耶。若以攻渠之言。指以爲逆。則無君之心。至此著矣。嗚呼擅弄威福。人臣之極惡大罪。此名一加其身。則爲爾瞻者所當席藁飲水以俟鈇鉞之不暇。而偃然在家。益肆其毒。招集三司。指揮館學。

小無忌憚。自贊其身。至比於裴度韓琦。嗚呼爾瞻則已矣。三司者殿下之耳目。館學者公論之所在。而同惡相濟。稱譽爾瞻。無所不至。未知今日之三司。殿下之三司乎。爾瞻之三司乎。國柄之已歸爾瞻。據此可知。昔王莽之倒持太阿也。張禹孔光杜歆谷永之徒。相與贊成。上書頌莽者。多至四十八萬。奸臣專國。威權下移。諂佞成風。古今一揆。不可以贊譽之多至。盡謂之公論。章章明矣。奈何三司館學反斥直言之人。稱譽奸邪之爾瞻。至此極也。若此不已。後日之禍。恐難測也。伏願殿下垂察焉。夫人君聽言之道。言可用則用之。不可用則置之。言者所論。若以不合於時議。而便斥之深治之。則奸邪之當國所進之言。必皆諛佞之辭。而忠直之論。無從而至矣。古語曰。大奸似忠。大詐似信。殿下眷倚爾瞻。無乃聰明有所蔽耶。今之救爾瞻者。必謂之討逆之臣。討逆天下之大義。古今之常經。殿下之朝臣。誰無討逆之心。孰非討逆之人乎。設使有人於此。朝有可紀之功。夕犯難宥之罪。則謂之有功。而不治其罪乎。爾瞻奸邪如此。威權如

此擅弄國柄如此。國家之危急如此。人心憤鬱如此。而無害於宗社者。臣未之聞也。嗚呼。爾瞻構成虛語。斥逐異己。科舉美爵。收拾人心。趨勢嗜利之輩。布滿要津。識者之寒心。庸有極乎。噫。征利之極。必至於不奪不厭。患失之心。必至於弑父與君。聖人先事之戒。嚴且切矣。殿下以善道之事。收議於大臣者。必欲知物議之如何。而領議政臣奇自獻。怵於兇焰。稱病不議。右議政臣韓應寅。亦畏其勢。氣乏語澁。略陳言路數字。而三司之攻擊。不遺餘力。忘君護黨。一何至此。閭巷之愚夫愚婦。莫不扼腕痛心。而唯殿下深居九重。尚不聞知矣。今者善道之疏。一陳冕旒之下。爾瞻擅弄之罪。聖鑑想必已燭。而獨不能乾斷屏黜。則他日之憂。恐有甚於今日也。宋臣司馬光有言曰。人主之於臣下。患在不知其奸。苟或知之。而復赦之。則不若不知之為愈也。何以言之。彼或為奸。而上不知之。猶有所畏。既知而不能退。彼知其不足畏。則放縱而無所顧矣。是故知善而不能。知惡而不能去。此人主之深戒也。臣等以為。光之此言。正謂今日發也。臣

等與爾瞻。本無讐怨。且無爭權傾軋之事。彼雖得志。於臣等何害。彼雖失志。於臣等何利。但臣等皆以同休戚之臣。坐視宗社之危亡。而不達所懷。則宗子維城之意。安在哉。臣等固知朝進此疏。夕被三司之請罪。有甚於善道。而忠憤所激。言不知裁。伏願殿下。亟黜一權奸。以安宗社。治三司黨惡之罪。則宗社幸甚。生民幸甚。疏呈。皆遠竄。錦山在南海辛酉春病卒上憐之命四道監司護喪禮葬龜川在順天○大小北相會一場。置酒行成。爾瞻先吟曰。辛酉蒙宥還京并復舊秩○不是尋常樂事忙。只要相會話心腸。梅花亦解吾人意。先占天和送暗香。承宗次日。十日相尋九日忙。向來懷抱幾回腸。梅寒竹瘦同清標。盡醉芳樽內。醞香希奮次曰。憑君休道異門忙。但願彌堅鐵石腸。李白桃紅都未管。歲寒期保姓名香。李昌後繼曰。曹筵禮罷出門忙。請得仙茶潤肺腸。此會應知非偶爾。果場頃記小梅香。廣昌大北巨魁密昌文昌小北之首世○日本關白源秀忠。又遣使要利。何意也。且水李慶全調濟兩間擬使相和如此。云而厥後益甚。難合是

日壬辰犯順之賊。為上國今盡蕩滅云云。以文臣玉堂吳允謙兼通信。刷還使朴梓為副。李景稷為書狀。下嶺南待風。

五月初七日大雨雹。禾穀傷損。○刑曹判書許筠包藏禍心。欲先立功專執國柄。常幻無據之言。令朝家顛倒。至是回自京師曰。中原有林居漫錄。

宗系蒙誣。至今未雪。光海聞而驚惑。即令逆筠委往申辨。逆筠多載金寶。似往似來。偽署彼此。御府文籍。定奪回報。光海大慶大赦。設增廣科。

百僚朝賀。上尊號叙倫立紀。明誠光烈。原任沈喜壽知賊情狀。謂同僚曰。前於己丑。已盡昭雪。不知今日又卜何誣。筠賊甚啣之。構誣斥逐。喜壽出門潛然曰。出官非是。棄官歸。回首江山何處依。欲買小舟無片價。傾箱猶

有舊朝衣。漢陰逝完平逐鰲城棄賢相。今又去噫。勳舊盡矣。

六月咸鏡監司狀啓。月十三日。白蝶自東北流入。如長蛇陣。連二日不止。北青甲山馳報。朝報。○祇受。欽賜恭聖王后冕服。光海生母

秋七月。通信使吳允謙等渡海至日本。關白秀忠。方率眾酋。請封於倭皇

之時也。我使適至。喜待殊款。刷還我人四十餘名而還。

冬十月。慶尙左道有白馬賊。永川郡捕其魁李景基囚之。其黨攻破獄門而出之。命拿鞫郡守趙纘。韓以柳斐代之。纘韓到京蒙宥。因差討捕使。下

稷山執得景基。以布為馬衣。夜行則寵之。故人謂白馬賊。○初二日。卯時有霧氣。午時太白見於

卯方。四日夜。流星火出奎昌上。入艮方之際。狀如鉢。尾七八尺許。白色。三

更五更沉霧。朝報。○幼學朴夢俊疏。金悌男妻正刑事。呈政院。朝報。夢俊

助南朝。當以一枝兵先往云云。十一月二十二日。大雷震。○賊筠欲使光

海僨事傾國。潛誘其黨儒生百僚。倡起凶議。幼學李志浩韓輔吉尹惟謙生員金宇成等。連疏請廢。大妃繼而館學三司連日庭請。乃命收議。臣僚領議政奇自獻。劄論不可。出西江待命。其劄曰。諸疏下廟堂事啓下矣。臣本無學識。才劣望輕。而適會乏人。備員政府。臣若主張。遽爾廢之。國史記之曰。某也擅廢之云。則非但得罪於萬世公議。亦必為殿下之羞矣。